

•JAHON ADABIYOTI TURKUMIDAN•

Sog‘inib kutaman tunlarni

Hikoyalar töplamı

JAHON ADABIYOTI TURKUMIDAN

SOG'INIB KUTAMAN TUNLARNI

Hikoyalar



ZIYO NASHR

Toshkent

2022

UO'K: 821.111(73)-32

KBK 84 (7Amer)-445

Sh 78

Tahrir hay'ati:

**Naim Karimov, Erkin A'zam, Kurshid Do'stmuhammad,
Suvon Meliyev, Shuhrat Sirojiddinov, Dilmurod Quronov,
Nurboy Jabborov, Uzoq Jo'raqulov, Ulug'bek Hamdamov,
Abdurahmon Jo'rayev**

Tarjimonlar:

Qandilat YUSUPOVA va b.

Shopen, Keyt

Sh 78 **Sog'inib kutaman tunlarni.** [Matn]: hikoyalari /
Keyt Shopen; tarjimonlar: Q. Yusupova va b. – T.:
„Ziyo nashr“ nashriyoti, 2022. – 128 b.

ISBN 978-9943-8577-6-6

Keyt Shopenning „Sog'inib kutaman tunlarni“ nomli hikoyasi bilan nomlangan ushbu to'plamdan iste'dodli adiblarning bir qator hikoyalari o'rinni olgan. Turfa xil insonlarning taqdirdan so'zlovchi bu hikoyalarni sizga ma'qul kelishiga ishonamiz.

UO'K: 821.111(73)-32

KBK 84 (7Amer)-445



ISBN 978-9943-8577-6-6

© Q. Yusupova va b. (tarj.).

© „Ziyo nashr“ nashriyoti, 2022.

NASHRIYOTDAN

Biz o'tgan mingyilliklar davomida jahon sivilizatsiyasiga ulkan hissa qo'shgan, uni o'zgartira olgan xalqmiz. Madaniyat, san'at, axloq, falsafa, fan va adabiyot sohasida buyuk ajdodlarimiz qoldirgan ulkan meros hali-hamon dunyoning barcha rivojlangan mamlakatlari tomonidan e'tirof etilib, o'rganib kelinadi. Imom al-Buxoriy, Imom at-Termizi, Burhoniddin Marg'ioniy, Ahmad al-Farg'oniy, Muso al-Xorazmiy, Abu Rayhon Beruniy, Abu Ali ibn Sino, Abu Nasr Forobiy, Bahouddin Naqshband, Abullays Samarqandiy, Yusuf Xos Hojib, Ahmad Yugnakiy, Mahmud Koshg'ariy, Ahmad Yassaviy, Alisher Navoiy, Zahiriddin Muhammad Bobur, Boborahim Mashrab singari yuzlab ajdodlarimiz borki, biz ularni hech ikkilanmasdan jahon miqyosidagi mutafakkirlar deyishga haqlimiz. Ammo bugungi avlod ularning buyuk shaxsiyati, tarixi, jahonshumul shon-shuhrati bilangina cheklanib qolmasligi lozim. Ajdodlarning madaniy, ma'rifiy, ilmiy, ijtimoiy, adabiy faoliyati, hayot tarziga doimo hushyor nighoh va ibrat ko'zi bilan qarashimiz maqsadga muvofiq. Tarixiy manbalarni sinchiklab o'rganadigan bo'lsak, mutafakkir ajdodlarimiz jahon madaniyati, ilmiy va badiiy tafakkuri bilan doimiy tarzda hamqadam, hamnafas bo'lib kelganlar. Jahonda ro'y berayotgan birorta madaniy-intellektual o'zgarish, biror badiiy tafakkur namunasi bobolarimiz nazaridan chetda qolmagan. Ajdodlarimiz ularni o'qib, uqishar ekan, o'z milliy madaniyatlarini rivojlantirish, jahon xalqlaridan ortda qolmaslikni maqsad qilganlar. Ko'plab xorijiy tillarni bilganlari, xorij mutafakkirlari yozgan asarlarni tarjima qilganlari bu o'rinda qo'l kelgan. Eng muhimmi, xorij madaniyati, badiiy-ilmiy tafakkuri namunalariga nisbatan shaxsiy to'xtamlari, xulosalari va tanqidiy nuqtayi nazarlari bo'lgan.

Biz bugun, mamlakatimiz Prezidenti kitobxonlik madaniyatini takomillashtirishni davlat siyosati darajasiga ko'targan bir paytda, o'tmishda yashab o'tgan buyuk ajdodlarimiz an'anasisini izchil davom ettirishimiz, jahon madaniyati, san'ati, adabiyoti namunalari bilan izchil va tizimli tarzda tanishib borishimiz zarurdir.

Xalqimiz ijtimoiy-madaniy hayotidagi mana shunday ulkan ehtiyojni nazarda tutib „Ziyo nashr“ nashriyoti bir xayrli ishga qo'l urishga bel bog'ladi. Ya'ni joriy yildan e'tiboran jahon nasri namunalarining yuz jildligini chop etishga kirishdi.

Mazkur nashrda siz turk, rus, ingliz, italyan, fransuz, nemis, hind, xitoy, arab, eron, yapon, amerika adabiyoti namunalari bilan tanishasiz. Yuz jildlikda Ch. Dikkens, L. N. Tolstoy, A. Dyuma, N. V. Gogol, O.de Balzak, A. P. Chexov, Gi de Mopassan, J. London, G. Flober, M. Sholoxov, G. G. Markes, A. Kuprin, V. Shukshin kabi siz muhtaram o'quvchiga nisbatan tanish yozuvchilar asarlari bilan birga, S. King, U. Folkner, V. Vulf, Mo Yang, Chan May Txyun, V. Losa Mario, T. Bug'ra, Dundar Alp, Dino Butssati, R. Akutagava, I. Bunin, K. Chandr, Abdul Muis, Y. Zamyatin singari jahon xalqlari tomonidan e'tirof etilgan-u, ammo o'zbek kitobxonlarining aksariyati ilk bor uchrashayotgan yozuvchilar asarlarini o'qishga tuyassar bo'lasisz.

Mazkur yuz jildlik jahon nasrining deyarli barcha janrlarini qamrab oladi. Unda siz jahon o'quvchilarini hayratga solib kelayotgan romanlar, qissalar, novella va hikoyalardan bahramandlik hissini tuyasiz.

Tarjimalar ichida Abdulla Qahhor, Zumrad, Odil Rahimiyl, Qodir Mirmuhamedov, Vahob Ro'zmatov, Ozod Sharafiddinov, Ibrohim G'afurovdek mashhur tarjimonlar tomonidan o'girilgan asarlar qatorida umidli yosh tarjimonlar ijod namunalari ham o'rinni o'rganan. Albatta, tarjima asarlar tarkibida rus tili vositasida amalga oshirilganlari ko'proq. Bunda biz tajribali, mahoratli tarjimonlar o'girmalariga bo'lgan ishonch va hurmatni bosh mezon qilib oldik. Shu bilan birga, ingliz, fransuz, nemis, turk, arab, fors tillaridan qilingan original tarjimalarning mutaxassislar tomonidan tan olingen namunalarini ham qamrab olishga urindik. Eng muhimi, bu o'rinda badiiy tarjimalar sifati, milliy tilimiz jozibasini qanchalik aks ettirganiga asosiy e'tiborni qaratdik. Yuz jildlikni tayyorlash jarayonida imkon darajasida xalqimiz ma'naviyati va axloqiy mezonlariga muvofiq keladigan asarlarni tanlashga harakat qildik.

Ammo shuni alohida ta'kidlashni istardikki, „Jahon nasri namunalari yuz jildligi“ni chop etish nashriyotimiz uchun ilk tajriba. Shunday bo'lgach, mazkur yirik loyihaning kamchiliklari, maromiga yetmagan jihatlari bo'lishi tabiiy. Bu jarayon muttasil davom etib, tajriba va mahorat, texnik imkoniyatlar oshgan sari kamchiliklar ham bartaraf bo'la borishiga ishonamiz. Va, umid qilamizki, xayrli niyat bilan boshlayotgan ishimizdagi juz'iy kamchiliklarni aziz kitobxonlarimiz ma'zur tutadilar. Muhtaram adabiyotshunoslarimiz, adiblarimiz va adabiyot muallimlarimiz keyingi nashrlarni amalga oshirish jarayonida o'zlarining qimmatli maslahatlarini ayamaydilar, degan umiddamiz.

Yaratgan Alloh ishimizni xayrli, ajr-mukofotlarga loyiq, joy-najon xalqimiz uchun manfaatli qilsin!

DUNYODAGI ENG BAXTLI O DAM

Jessi yig'lab yuborishga ham tayyor edi. U Tomni telefonidan bo'shashini kutaverib xunob bo'lib ketdi. Tom uning qaynog'asi. Holi xarobligidan o'zining ham yuragi ezilib o'tirardi.

To'g'ri, ular besh yildan buyon bir-birlarini ko'rishmagandi, ammo Tom hozir besh yoshga ulg'ayganday ko'rinardi, bor farq shunda, xolos. U hali ham Tomligicha turibdi-ku. Xudoyim-ey! Yoki u shunchalar o'zgarib ketganmikan?

Nihoyat, Tom Braket telefon go'shangini joyiga qo'ydi. U o'rindig'iga yastangancha o'tirarkan, gumondor va sovuq boquvchi kichkinagina tiniq moviy ko'zlar bilan Jessiga bir qur ko'z yugurtirib chiqdi. U qirq besh yoshlardagi basavlat erkak bo'lib yetilgandi. Braket o'tkir biznesmenga o'xshab ko'rinar – uning asl kasbi ham shunday edi. U Jessiga vaqtini ketkazishga arzimaydigan odamga qaraganday sovuq bepisandlik bilan ko'z tashladi.

– Xo'sh? – dedi Braket to'satdan. – Xizmat?

– Meni tanimading chog'i, Tom, – deb o'ng'aysizzlandi Jessi. – Men Jessi Fultonman. Ella senga salom aytib yuborgandi.

Braket o'rnidan turdi-da, chaqirilmagan mehmoni bilan yuzma-yuz bo'lish uchun u tomonga

bir-bir bosib keldi. U esiga tushgan qiyofani topishga harakat qilib Fultonni boshdan oyoq ko'z-dan kechirdi.

– Ha, rostdan ham Jessi ekansan, – dedi Braket oxiri. – Lekin juda ham o'zgarib ketibsan.

– Yo Rabbim, axir oradan besh yil o'tib keta-di-yu, o'zgarmay bo'larkanmi? – dedi Jessi. – Buning ustiga sen meni faqat bir-ikki bor ko'rigan bo'lsang kerak. O'zgarmay qolarmidim? Hamma ham o'zgaradi-ku, to'g'rimi?

– Sening qarashlaring jiddiy edi, – deya so'zida davom etdi Braket mayin, ajabsingan ohangda. – Sezishimcha, biroz ozgandaysan?

Jessi miq etmadi. U Braket uning jig'iga tegish uchun o'zini har ko'yga solayotganini fahmlab turardi. Biroq burgaga achchiq qilib ko'rpani kuydirishdan foyda yo'qligi sababli o'zini og'irlilikka olardi. Sukunat cho'zilgan sayin Jessining ichini itataladi. Braketning vijdoni uyg'ondi chog'i, tuyqusdan mulozamat yo'liga o'tib oldi:

– Qani, o'tir-chi. Yaxshi kelibsanda, kuyov, – deb Jessining qo'lidan tutib, qisib qo'ydi u. – Seni ko'rGANIMdan xursand bo'ldim, hech narsani o'ylama! Negadir ko'zimga siqilganroq bo'lib ko'rinyapsan.

– Hammasi joyida, – deb ming'illadi Jessi. U stulga o'tirarkan, barmoqlari bilan jingalak sochlarni taragan bo'ldi.

– Nimaga oqsoqlanyapsan?

– Bitta toshni bosib olgandim, qirrasi tuflimning tagini teshib yubordi.

Jessi oyoqlarini stulning tagiga tortdi. U tuflilaridan uyalayotgandi.

Braket bo'lsa Jessining oyoqlaridan ko'zlarini uzmay o'tirardi. U kuyovining ko'nglidan nimalar kechayotganini anglab turar, unga qarab yuragi ni achinish hissi qoplاب borardi.

– Ha, mayli, qulog'im senda, – deya so'z bosh-ladi Braket, – hayotingdan gapir. Ella qalay?

– O, u o'ynab-kulib yuribdi, – deb javob ber-di Jessi parishonxotirlig bilan. Uning mayin bo-quvchi kulrang ko'zları bilan uyg'unlashib ket-gan yumshoq, itoatkorona, anchagina tortinchoq ohangli ovozi bor edi.

– Bolalar-chi?

– O, ular ham zo'r... Bilasanmi, – endi biroz qat'iyat bilan ilova qildi Jessi, – kenjatoyimiz tas-ma (ikki yelkasidan o'tkazilib shimga taqiladi) ta-qadigan bo'lib qolibdi. Bilasan, u o'zi pul topol-maydi. Ammo juda ham uddaburon. Rasmlar soladi, u-bu ish qo'lidan keladi, bundan sening ham xabaring bor.

– Ha, – deb ma'qullab qo'ydi Braket. – Bu ish-lari yaxshi. U ikkilanib qoldi. Oraga bir nafas jim-lik cho'kdi. – Jessi, Ella menga ishlaring yomonligi haqida aytganida, ehtimol, senga yordam bergen bo'larmidim.

– Xudo sendan rozi bo'lsin, – Jessi mayin ohangda minnatdorlik bildirdi. – Sening ham ish-laring boshingdan oshib yotibdi-ku, to'g'rimi?

– To'g'ri. – Braket o'rindig'i orqasiga suyandi. Uning qizg'ish yuzlari g'amgin va achinarli tus oldi.

– Tom, qulog sol, – deya muddaoga o'tdi Jes-si. – Men bir maqsad bilan bu yerga kelgandim. – U yana barmog'i bilan sochini tarab qo'ydi.

- Menga yordam berishingni istayman.
Braket shu gapni kutayotgandi.
 - Men senga ko'p pul berolmayman. Haftasiga o'ttiz besh dollar topaman, xolos, bunga ham o'lganim kunidan shukr qilib, bir amallab yashab kelyapman.
 - Albatta, bilaman, – hayajonlanib ta'kidladi Jessi. Uni tag'in tong-sahardan beri yuragini egal-lab yotgan yovvoyi g'ulg'ula chulg'ab oldi.
 - Bilaman, sen bizga pul tomondan ko'mak berolmaysan. Lekin biz sening qo'lingda ishlay-digan bir kishi bilan ko'rishib qoldik! U bizning shahrimizga kelgan ekan. O'sha kishi seni menga birorta ish topib bera oladi deb aytgandi!
 - Kim aytgandi?
 - O, nima uchun shuni menga sen o'zing aytma-ganding? – Jessi mana endi ginaxonlik bilan yorildi. – Nimaga aytmading, axir, men bu gapni eshitganim zahoti yo'lga chiqqandim. Mana, ikki haftadirki, xuddi devonaga o'xshab yo'l yurib keldim.
- Braket baland ovozda ingrab yubordi.
- Sen meni ish bera oladi, degan umid bilan Kanzas Sitidan ikki hafta ichida yetib keldingmi?
 - Bo'lmasam-chi, Tom, albatta-da. Qo'limdan boshqa nima ham kelardi?
 - Jessi! Hozir o'lik mavsum. Ustiga ustak, sen bizning ishimizni neft bilan bog'liq ekanligini ham tushunmaysan. Bu esa juda muhim. Mening bu yerda ham do'stlarim bor, biroq ular ayni damda hech narsa qilib berisholmaydi. Men senga im-koniyat tug'ilishi bilanoq ish aytgan bo'lardim, shu o'y sening ham kallangga kelmadimi?

Jessi dod deb yubordi.

– Lekin sen qulq solsang-chi, o'sha odam seni odam yollaydi, deb aytdi! U sening qo'lingda yuk mashinasini haydarkan! Senga har doim erkaklar kerak bo'lar ekan!

– Oh!.. Sen idoramni nazarda tutyapsanmi? – deb so'radi Braket past ovozda.

– Ha, Tom. Shuni aytyapman!

– O, yo'q, sen idoramda ishlashga hech qachon chiday olmaysan, – Braket unga o'sha past ovozda man qildi. – Sen uning nima ekanligini bilmaysan ham.

– Yo'q, bilaman, – Jessi o'z fikrida qat'iy turib olgandi. – O'sha erkak menga barchasini tushuntirib berdi, Tom. Sen yuk jo'natuvchisan, shundaymi? Sen chetga dinamit ortilgan yuk moshnalarini chiqarasanmi?

– Sen aytayotgan o'sha odam kim edi, Jessi?

– Everet, Everet edi, yanglishmasam.

– Egbertdir, balki? Mening gavdamdag'i erkakmi? – deb so'radi Braket ohista.

– Ha, Egbert ekan.

– Albatta, ish bor. Agar istasang, hatto o'sha Egbertning ham joyi bo'sh turibdi.

– U ishdan ketdimi?

– Yo'q... o'ldi!

– Oh!

– Ish paytida o'ldi, Jessi. Judayam bilging kehayotgan bo'lsa, bu ish o'tgan tunda sodir bo'ldi.

– Oh!.. Nima bo'lsa, bo'lavermaydimi, lekin menga baribir!

– Unday bo'lsa, meni eshit! – dedi Braket. – Men senga kelishingdan avval so'rashing lozim

bo'lgan bir-ikkita narsalarni aytib qo'yay. Sen haydaydigan yuk mashinasidagi dinamit emas. U nitroglitserin!

– Lekin bundan mening xabarim bor edi, – dedi Jessi uni tinchlantrib. – O'sha Egbert menga maslahat bergandi, Tom. Meni hech narsadan xabari yo'q ekan, deb o'ylama.

– Bir daqiqaga gapirmay tursang-chi, – deb buyurdi Braket g'azab bilan. – Eshit! Sen shunchaki bu nitroglitserin sho'rvasiga bir nazar solib ko'rding, tushundingmi? Sen shunchaki qattiq yo'talganding, shundan keyin bu sho'rva qaynab, mana endi toshib ketyapti.

– Meni eshitsang-chi, Tom.

– Hozir, bir lahzaga shoshmay tur, Jessi. Bilaman, ishga o'lguday muhtojsan, biroq sen tu-shunib olishing kerak. Bu mahsulot faqatgina maxsus mashinalardagina ketadi. Qoq tunda! Ular maxsus yo'naliш bo'yicha qatnaydi! Birorta ham shahar ichidan o'tisholmaydi! Buning qanday ish ekanligiga aqling yetib turibdimi?

– Men ehtiyotkorlik bilan haydayman, – dedi Jessi. – Men yuk mashinasini qanday qilib boshqarishni bilaman. Sekin haydayman.

Braket oh tortdi.

– Sen Egbertni ham ehtiyotkorlik bilan haydamagan yoxud yuk mashinasini qanday boshqarishni bilmagan deb o'ylaysanmi?

– Tom, – dedi Jessi shiddat bilan. – Sen meni qo'rqioltmaysan. Men miyamga faqat bitta gapni mixlab oldim! Egbert aytdiki, u bir mil masofa yo'l uchun bir dollardan ishlar ekan. U: „Yarim oylik xizmatim uchun bir oyda besh yuz-olti yuz

dollardan topardim“, – deb aytdi. Men ham aynan shunday haq olamanmi?

– Albatta, shunday olasan, – dedi Braket unga vajohat bilan. – Bir mil uchun bir dollar. Juda oson-a. Biroq nima sababdan sen kompaniyani buncha ko‘p to‘lashi kerak deb o‘ylayapsan? Osonligini qara – xuddi Egbertga o‘xshab old chiroqlar-ni yoqquningcha qandaydir toshni bosib ketasan. Yoki bo‘lmasa, ko‘zingga nimadir kirib ketadi-da, g‘ildirak aylanib ketib, mashinaga shikast yetka-zasan! Xudo biladi, tag‘in yana qanday ko‘rgilik yuz beradi! Biz Egbertga qanday kor-hol yuz bergанини aniqlay olmadik. Biror-bir dalil beruvchi hech qanday mashina yo‘q edi. Hech qanday murda ham topilmadi. Hech vaqo yo‘q! Ehtimol, bir kuni kimdir makkajo‘xori dalasidan bir parchagina ma-jalangan po‘lat topib olar. Lekin baribir, biz hech qachon haydovchini topolmaymiz. Bor bilganimiz shuki, u jadval bo‘yicha yetib kelmadni. Keyin polit-siya bizni chaqirishini kutib turdik. O‘tgan tunda qanday voqeа yuz bergenini tushundingmi? Ko‘priк ustida qandaydir bir ishkallik chiqibdi. Balki, Egbert tajang bo‘lib turgandir. Balki, u bir tomon-ga mashina g‘ildiragining qanoti bilan borib sol-gandir. Endi bo‘lsa hech qanaqa ko‘priк ham yo‘q, mashina ham yo‘q, Egbert ham yo‘q. Endi tushun-gandirsan? Bir mil yo‘l uchun o’sha Xudo urgan bir dollarni qanday qilib topish yo‘li shu bo‘ladi!

O‘rtaga bir lahzalik sukunat cho‘kdi. Jessi uzun, ingichka barmoqlarini bukib, yozgancha jim o‘tirardi. Uning og‘zi ochilib qolgan, yuzi esa alamdan burushib ketgandi. Bir mahal ko‘zlarini yumdi-da, ohista so‘zlay boshladi:

– Meni nima bo'lgani bilan ishim yo'q, Tom. Sen hammasini tushuntirib berding. Endi esa menga bir saxovat ko'rsatib, ish bersang.

Braket qo'lini tugib, stoli ustiga qahr bilan qattiq musht tushirdi.

– Yo'q.

– Qulq sol menga, Tom, – dedi Jessi bechora holda, – sen shunchaki tushunishni istamayapsan-da. – U ko'zlarini ochdi. Uning ko'zlar yosh bilan to'lib qolgandi. Bu nigoh Braketni undan yuzini o'girishga majbur qildi. – Menga bir qaragin-a, Tom. Senga iltijolarim kamlik qildimi? Tom, men ortiq bu ahvolda yashayolmayman, tushunsang-chi, axir!

– Sen aqldan ozibsan, – deb ming'illadi Braket. – Har yili beshta haydovchidan bittasi o'ldiriladi. Bu o'rtacha ko'rsatkich. Shuni havas qilib keldingmi?

– Ayni damdag'i mening hayotim havas qilgulikmidi? Biz uyda shundoqqina ochlikdan qurbon bo'lyapmiz, Tom!

– Buni menga ilgariroq aytishing kerak edi, – deya xitob qildi Braket cho'rt kesib. – Bu sening aybing. Odam oilasi och turganida soxta dabdaba bilan yurishga aslo haqi yo'q. Men birortasidan ozroq pul qarz olib turaman-da, uni Ellaga telegraf qilib jo'natib yuboramiz.

– Xo'sh, keyin nima bo'ladi?

– Keyin kutib turasan. Sen qarib qolganing yo'q. Bu hayotingdan yuz burib ketishga haqing ham yo'q. Biror kun ish ham topib olarsan.

– Yo'q! – Jessi o'rnidan sapchib turib ketdi. – Yo'q! Oldinlari bunga ishonardim. Ammo endi isho-

nolmayman, – baqirdi u kuyib-yonib. – Sen yuragimdagi birdan bir umidimsan.

– Aqldan ozyapsan, – ming‘illadi Braket yana. – Men bunday qilolmayman. Xudo haqqi, bir lahzaga bo‘lsin, Ellani ham o‘ylasang-chi, axir.

– Uni deb qayg‘urayotganimni bilmayapsan-mi? – so‘radi Jessi ma'yus. U Braketning yengidan tortdi.

Braket oyoqqa qalqdi.

– Sen Ella to‘g‘risida o‘layapman, deyapsan. O‘lib ketsang, uni qay holga tushishini ham o‘layapsanmi?

– Balki, o‘lib ketmasman, – iltijo qildi Jessi. – Ba’zan omadim ham kulib turadi.

– Hamma ham shunaqa deb o‘laydi, – javob qildi Braket e’tiborsizlik bilan. – Bu ishni boshlashing bilan omading ham so‘roq belgisi bo‘lib qoladi. Bir narsa aniqki, ertami-kechmi, baribir seni o‘ldirib ketishadi.

– Unaqa bo‘lsa ham mayli, roziman, – deb baqirdi Jessi unga javoban. – Lekin bu orada biror nimali bo‘lib qolarman, to‘g‘rimi? Hech bo‘lma-ganda, bir juft oyoq kiyimi sotib olarman. Menga qara! Bitta kostyum qancha turadi? Sigara chekishga pulim yetar, hech bo‘lmasa. Bolalarim uchun biror shirinlik xarid qilarman. O‘zimning og‘zimga ham biror nima tegib qolar. Ha, Xudo haqqi, biroz shirinlik yegim kelyapti. Kunda bir mahal bir stakan pivo ichishni xohlayman. Ellani yasantirib qo‘yishni ham. Unga haftada uch marta, ehtimol to‘rt marta go‘sht yedirishni istayman.

Braket joyiga o‘tirdi.

– Oh, bo‘ldi qilsang-chi, – dedi u.

– Yo‘q, – dedi Jessi unga mahzun, ammo jo‘shtiqin ohangda, – sen meni to‘xtatib qololmaysan. Eshit, Tom, – u o‘tinib so‘ray boshladi, – men hammasini o‘ylab ko‘rdim. Oyiga olti yuz dollardan topsam, qara, qancha pul jamg‘arar ekanman! Atigi uch oygina ishlab qo‘ysam, qara, qancha pul bo‘ladi – ming dollar-a, balki, undan ham ko‘proq yoki kamroq ishlarman. Balki, ikki yil ichida Ellaga haqiqiy hayot lazzatini in’om etarman!

– Bu sening fikring, – deya uning gapini bo‘lib qo‘ydi Braket. – Taxminimcha, sen „Bunaqa ishda ekanman, u maza qilib yashaydi“, deb o‘layasan-da?

– Men hammasini o‘ylab bo‘lganman, – javob berdi Jessi hayajonga to‘lib. – U bu haqida sira bilmaydi, tushunyapsanmi? Men unga faqat qirq dollar ishlab topayotganimni aytaman. Sen qolgan pulni uning bankdagi hisobiga o‘tkazib turasani, Tom.

– Ey, bas qil, – urishib berdi Braket. – Baxtli bo‘lamani deb o‘layapsanmi? Har daqiqada, uyg‘onganingda ham, uxlayotganingda ham „Ettimol, ertaga o‘lib ketarman“, degan xavotir ichida azoblanib yashaysan.

Jessi kulib yubordi.

– Men baxtli bo‘lamani! Tashvish qilma, men shu qadar baxtli bo‘lamanki, hatto kuylab yuborraman. Xudo guvoh, Tom, yetti yil mobaynida birinchi marta o‘zimdan o‘zim faxrlanib ketyapman!

– Ey, bas qil, bas qil! – deb baqirdi Braket.

Oraga tag‘in jimlik cho‘kdi. Braket ikkala qo‘lini ham boshi uzra ko‘tarib, kaftlarini chakkalari-ga bosdi.

– Tom, Tom, – dedi Jessi.
Braket uh tortdi.
– Oh... yaxshi, seni ishga olaman, Xudo me-
ning mushkulimni oson qilsin. Agar shu kecha
yo'lga tayyor bo'lsang, bugun tunda mashina hay-
daysan.

Jessi javob bermadi, berolmasdi ham. Braket
unga qaradi. Jessining yuzidan ko'z yoshlari du-
malab tushardi.

– Soat oltida bu yerga qaytib kel, – dedi Bra-
ket. – Mana senga ozroq pul. Tuzukroq ovqat olib,
yeb olgin.

– Rahmat!.. Rahmat, Tom! – dedi Jessi. – Ha,
aytgancha, Tom.

– Nima deysan?

– Men shunchaki, – Jessi gapisirishdan to'xtab
goldi. Braket uning yuziga boqdi. Jessining ko'z-
lari hamon yosh bilan yaltirab turar, biroq yuzi
endi yashnab ketgandi.

Braket undan yuzini o'girdi.

– Men bandman.

Jessi ko'chaga chiqdi. Ko'zlaridagi nam ko'-
rishiiga xalal berar, biroq butun dunyo hozir unga
tilladay bo'lib yarqirab ko'rinaridi.

– Men dunyodagi eng baxtli odamman, – deb
shivirladi o'ziga o'zi. – Men butun yer yuzidagi
eng... eng baxtli odamman!

Qandilat YUSUPOVA tarjimasi

YOMG'IRDA QOLGAN MUSHUK

Mehmonxona oldiga kelib tushgan amerikaliklar atigi ikkitagina er-xotin muhojirlar edi. Ular o'z xonalari tomon yo'l olishar ekan, yo'llarida, zinalarda uchratgan odamlaridan hech qaysisini tanimadilar. Muhojirlarning ko'm-ko'k dengiz tomon yuz tutgan xonasi ikkinchi qavatda joylashgandi. Yana katta bog' bilan bitta urush yodgorligi ham xonaga ro'para yerda edi. Bu ulkan bog' ichida o'sib yotgan bahaybat palma daraxtlari hamda yo'lklalar chetiga o'rnatilgan o'rindiqlar bog' ko'rkiga yanada ko'rк bag'ishlab turardi. Havo soz bo'lgan chog'lar bu yerda kichkinagini ko'rgazma taxtasini ko'tarib olgan qandaydir rassom paydo bo'lib qolar, osmonga behadik bo'y cho'zib ketgan salobatli palma viqori hamda bepoyon bog' bilan dengizga yuzlanib turgan mehmonxona binosining yarqiroq ranglari unga juda manzur bo'lardi. Boyagi urush yodgorligini tomosha qilish uchun ham bu yerga uzoq-yaqindan ko'plab italiyaliklar kelib turishardi. Haykal bronzadan ishlangan bo'lib, yomg'ir ostida yanda yarqirab ko'rinaridi. Ayni chog'da havo tund, sharros yomg'ir quyardi. Palma yaproqlari uchidan ham yomg'ir tomchilari bir-bir tomchilab tushardi. Bog'dagi shag'al yo'lak uzra yomg'ir

suvlari katta-kichik xalqoblar hosil qilgandi. Bir tomondan cheksiz dengiz betaskin to'lg'onib yotar, jala ostida qolgan asov to'lqinlar dam o'rindiqlargacha urilib kelar, dam o'tmay shashtlariidan qaytib, tag'in ortga chekinib ketardi. Urush yodgorligi yonida joylashgan maydon ichida turgan turli sayyoohlarning yengil mashinalari ham bir zumda bu yerni tark etib jo'nab ketishdi. Chetdagi qahvaxona ostonasida paydo bo'lgan bir oshxona xizmatchisi kimsasiz maydon sathi uzra termilgancha turib qoldi.

Shu payt boyagi amerikalik ayol ham derazadan tashqarini kuzatib turardi. Tashqarida, shundoqqina deraza tagida esa qayoqdandir kelib qolgan kichkinagina bir mushuk, o'sha yerda turgan yagona yashil stol ostida shumshaygancha zorlanib o'tirardi. Jonivor shalabbo bo'lmaslik uchun zo'r berib g'ujanak bo'lib olishga urinardi.

– Men pastga tushib, anovi mushukchani olib chiqaman, – deb qoldi ayol birdan.

– Men olib chiqqa qolay, – taklif qildi karavotida yotgan eri.

– Yo'q-yo'q, o'zim. Bechora mushukcha yomg'irdan qochib, stol ostiga o'tirib olibdi, sho'rlik o'zini quruq saqlashga chunonam harakat qilyaptiki!

Eri indamay karavotning oyoq tomonidagi bir juft yostiq ustiga yastanib olgancha yana kitob o'qishda davom etdi.

– O'zing bilasan, faqat ivib ketmagan, – deb qoldi u xotininining orqasidan.

Ayol pastga tushishi bilan mehmonxona xo'jagini yonidan o'tib ketayotgan vaqtida xonimga bosh egib ta'zim qildi. Xo'jayinning ish stoli meh-

monxonaning eng uzoq burchagida joylashgandi. U novcha bo'yli, yoshi ancha o'tinqirab qolgan bir erkak edi.

– Hozir bu ishni qanday uddalaganimni ko'rasizlar, – deb hovliqdi ayol xo'jayinga qarab qo'yib, negaki mehmonxona sohibi xonimga bir ko'rishdayoq ma'qul bo'lgandi.

– Si, si, signora, brutto tempo¹. Bunaqa ob-havoda tashqariga chiqib bo'lmaydi axir.

Xo'jayin dim xonaning bir burchagidagi stoli ortida javragancha qolib ketaverdi. Xonim uning gapiga qulq solmasdan yugurgancha tashqariga chiqib ketdi. Shunday bo'lsa-da, ayolga xo'jain va ayniqsa, uning har qanday shikoyat-u noroziliklarni ham o'ta jiddiy qabul qilishi, salobati va mulozamati, mehmonxona sohibi bo'lish g'ururi, hattoki, qari, semiz yuzi bilan bahaybat qo'llarigacha juda yoqib qolgandi.

Mehmonxona egasidan mammun bo'lgan holda ayol eshikni zarb bilan ochdi-yu, tashqariga qarab qoldi. Yomg'ir yanayam avj olgan edi. Charm yomg'irpo'shiga mahkam o'ranib olgan bir erkak kafe tomonga qarab bo'm-bo'sh maydonni shoshilgancha kesib o'tdi. Haligi mushuk shu atrofda, taxminan, o'ng tarafda bo'lishi kerak. Ehtimol, bechoragina birorta o'simlik ostida g'ujanak bo'lib o'tirgandir. Xonim hamon ostonada qadalib turar ekan, boshi ustida soyabon ochilganini payqadi. Orqasida ularning xonasiga xizmat ko'rsatuvchi oqsoch ayol soyabon ko'tarib turardi.

¹Lekin, senyora, havoning avzoyi buzuq (italyancha).

– Siz ivib ketmasligingiz kerak, – deb jilmaydi u italyancha so’zlab. Shubhasiz, oqsochni mehmonxona egasi yuborgan edi. Xonim boshi uzra soyabon tutib turgan shu oqsoch bilan to o’zining derazasi ostiga yetib kelgunicha shag’al yo’lakcha bo’ylab birga ketishdi. O’sha yashil stol hamon shu yerda turar, u yomg’irda yuvilib, yanada yashil tusda jilolanardi, ammo uning tagidagi mushuk shu tobda qayoqqadir g’oyib bo’lgandi.

Xonim birdan ma’yus tortdi. Oqsoch ayolga xavotirlanib qarab qo’ydi:

– Ha perduto qualche cosa, signora?¹ – deya asta so’radi u.

– Anovi yerda mushuk bor edi, – dedi bazo’r amerikalik xonim.

– Mushuk?..

– Si, il gatto².

– Voy, mushuk deysizmi? – oqsoch qah-qah otib kulib yubordi. – Yomg’irda qolgan mushuk?

– Ha, – dedi xonim g’amgin, – anovi stol tagida o’tirgandi. – Keyin u to’satdan ingrab yubordi. – O, men uni shunchalar xohlagan edimki! O’sha mushukchani shunchalik istagandimki!.. – ayol qattiq afsuslangancha inglizchalab gapirar, oqsoch esa uning niyatini tushunolmay hadeb yuzini tirishtirardi.

– Yura qoling, senyora, – dedi u. – Ichkariga kirishimiz kerak. Axir, ivib ketasiz.

– Ha, boshqa ilojimiz ham yo’q, – dedi amerikalik ayol nochor.

¹ Biror narsangizni yo’qotib qo’ydingizmi, xonim?

² Ha, ha, mushuk bor edi.

Ular yana shag‘al yo‘lakcha uzra ortlariga qaytib, eshikdan kirib ketdilar. Oqsoch soyabonni yig‘ib olish uchun bir daqiqa tashqarida qoldi. Ingliz xonim yonidan o‘tib ketayotgan onda mehmonxona sohibi unga avvalgiday ta’zim qilib qo‘ydi. Lekin bu safar ayolga uning qilig‘i erish tuyulib ketdi. Shu bilan birga xo‘jayinning bu odati yosh xonimga boyagina qilmoqchi bo‘lgan ishining nechog‘liq arzimas va ayni paytda g‘oyatda muhim burch ekanligini anglatib yubordi. Ayol eng katta ahamiyatga ega bo‘lgan kichkinagina yaxshilikni ham eplab amalga oshirolmagani uchun bir lahma ko‘ngli cho‘kib turib qoldi.

Qandilat YUSUPOVA tarjimasi

SOG‘INIB KUTAMAN TUNLARNI

Borgan sari odamlar bilan ishim yo‘q, ularning na hayotlari va na harakatlari bilan qiziqlmay yashayapman. Kimdir o‘ntalab kitob o‘qigandan ko‘ra, bitta insonni yaxshilab o‘rgangan a‘lороqdir, degan bir dono naqlni aytgan edi. Ehtimol, shundaydir. Va lekin ko‘nglimga unisi ham, buniisi ham zinhor yoqmaydi, ular faqat jonioimni qiy nab, aqlimni shoshiradi. Zero, bu mukammal hamda murakkab tilsimotlardan qay biri ham mening dilim bilan tillasha olar edi. Qadrdon tunlar – sevimli yoz tunlarim misol? Yoxud shivirlashar qirrador va ravshan yulduzlar kabi va yo suyisharlar mayin nasimday?

Men har kun tunni sog‘inib kutaman, zarang daraxti ostida orom olib yotarkanman, tunning koinotning zumrad osmoni bo‘ylab asta yoyilishi ni, bag‘oyat ohistalik ila kirib kelishini kuzataman. Tun. Uning hamma narsasi juda aziz, juda qadrli. U salqin vodiylar osha zimdan, nihoyatda ehtiyyotkorlik bilan o‘rmalay-o‘rmalay boshim uzra soya solib turgan zarang daraxti ustida muallaq qotadi, go‘yoki meni sezmaydi, deya xayol qiladi azizim. Sirlari bisyor yaproqlar oralab razm chehramga solgay, sekin-sekin daraxt qaddini o‘ray boshlar, makkorim haddan ortiq quv, butun

Mag'rib-u Mashriq mulkini bir zumda egallab oladi, keyin tepamdag'i zarang daraxti ichra nigoh solarkan, yashil bargchalar aro yulduzlar milt-milt qilgancha ko'z qisa boshlaydi.

Tun benihoya sodda, benihoya samimiy va ajabki, bir olam, bir jahon asrорlarga to'ladir. Odamlar bo'lsa turfa dunyo, men ularni hargiz tushuna olmadim. Ba'zi birovlar qalbim durlarini ayyorona tortib olib, so'ngra esa tahqir etdilar, birovlar esa besabab, beyurak kuldilar. Mayli, nima ham derdim. Mening bor mehrim, sevgim, ishonchim, tuyg'ularim taskin va tasanno aytguvchi ziyrak, darddosh, dildosh tun uchun baxshida bo'ldi.

Mana, sohir qushchalar oqshomgi qo'shiqlarini kuylashmoqda: ishqilib, tezda tugatib qo'yishmasin. O, nechog'liq dono bo'lishmasa bu qushchalarim! Ular odamlar singari safsata sotishmaydi, dag'dag'a qilishmaydi, izzatingni yerga urishmaydi. Ular faqat va faqat senga oniy lazzat damlarining farovonligini sog'inishadi: „Uxla, uxla, uxla“, – deyishadi. Zum o'tmay zarang daraxtni aylana shamol o'ynay boshlaydi, ularga xuddi jajji yaproqlarga izhori ishq bayon etayotganday iliq, yumshoq teginib o'tadi.

Shunda o'yga tolaman, butun yer kurrasida ana shunday jannatiy ne'matlar, totli rohatlar mavjud ekan, unda hukmronlikni nima sababdan kaltabin, tili uzun kishilar talasharlar, nega bepoyon yer yuziga ahmoqlar hokim bo'lgisi keilar?! Chinakam farog'atni buzgan ham o'shanday iblis odamlarning o'zidir. Bugun dunyo ularniki-day olam sarvariga turli iddaolar qiladilar, zamon

va zamin dastidan dod soladilar. Ular juda xunuk ko'rinadi, qip-qizil yuzlari, o'ynoqi ko'zları bilan tili hamda qo'rs odatlarini yaqqol ifodalab turadilar. Aslida-chi? Aslini olganda, bundaylar olam sарvari to'g'risida nimani ham bila olishardi? Endi men borib xuddi o'sha munofiqlardan so'rayinmi Yaratganning tabarruk ne'matlari qadrini, qiy-matini? Yo'q-yo'q, aslo! Men faqat boshim uzra jimillayotgan javohirdek yarqiroq mana shu yul-duzlar-u telegramdagi sarg'ish qorong'ilik hokimi bo'l mish xokisor tundangina so'rарman. Zotan, haqiqiy hayot qadrini ular bilgaydir...

Qandilat YUSUPOVA tarjimasи

OZODLIK*(hayotiy ertak)*

Bir zamonlar shu yorug‘ olamda qandaydir qushcha tug‘ilibdi, tug‘ilibdi-yu, ko‘zlarini ochar-ochmas o‘zini qurshab turgan temir devorlar-u orasidan nur va havo hovuchlaganday oqib kira-yotgan qattiq panjaralarga nigohi tushibdi, be-chora qushchagina temir qafas ichida dunyoga kelgandi.

Norasta xuddi shu yerda, xuddi shu qafas qo‘y-nida ulg‘aya boshlabdi, ko‘rinmas qo‘llar homiy-ligida kuch va kamolotga to‘libdi. Holbuki, u bunday tor-tanqis joyning qafas ekanligini anglay olmas, go‘yoki u uchun butun hayot mazkur temir panjaralar bilan qurshalib, cheklangan hu-dduddangina iboratday edi. Axir, och qolsa oshi, chanqasa chanqog‘i bosiladigan, mayin poxol uyu-midan hozirlangan yotog‘i ustida miriqib rohat oladigan bunday zavqni boshqa qayerdan ham topsin edi? Chiroyli qanotlarini yalagancha, is-siq quyosh taftiga biqinlarini tutgancha yalpayib yotarkan, qushchaga o‘zining hayoti shoyon laz-zatli, shoyon gashtli bo‘lib tuyulardi.

Kunlarning birida bu jajjiqanot qushcha shirin oromidan uyg‘ondi-yu, nihoyatda lol bo‘lib qoldi: O! Qafas eshigi ochilib qolgandi! Ha, ha, nimadir bo‘lib, shu mustahkam qafas ochiq qolib ket-

gandi. Burchakdagi joyida qunishib turgancha, qushcha hadeb ajablanar, dam hadiksirab, saro-simaga tushib o'tirardi.

Shu payt negadir bir xohish bilan qafasdag'i mitti jonzot ochiq turgan eshik tomonga sekin-as-ta yaqinlasha boshladi, qo'rquv va hadik hamon uni tark etmagan, nima uchun eshikning ochiq turganidan uning taajjubi oshar, ammo shunga qaramay, oyoqlari beixtiyor yorug'lik baralla oqib kirayotgan o'sha ochiq tarafga ohista odim-lab boraverardi. Ne-ne tahlika-yu vahima ichida qushcha eshikdan tashqariga boshini chiqardi-yu, birdaniga tepasidagi osmon choyshabining chunonam kengayib, tegrasidagi olamning naqa-dar kattalashib ketganini ko'rdi.

Yana ko'ngliga g'ulg'ula tushib, burchakdagi joyiga qisilib oldi, lekin qandaydir notanish kuch uni takror va takror ochiq eshik tarafga sudray-verdi, har gal tashqaridagi beadog', bepoyon nur-ni ko'rib, qushning ko'zlar qamashdi.

Keyin qo'qqisdan shu cheksiz fazo choyshabi uzra qanot qoqib, mo'l-ko'l to'kilayotgan nurlar-dan bahra olish istagida kichkina qushcha qafas-dan dadil chiqdi-da, tashqaridagi behad kenglik bo'ylab erkin uchib ketdi.

Mayin epkinlar bilan o'ynashgancha shodu-mon qanot yozib ucharkan, qushcha o'zining bu g'alati parvozidan benihoya lazzat topardi, chiroy-li qanotlari va silliq biqinlari horib-toliqib ketgan bo'lsa ham, u hamon uchar, yo'lida uchragan har bir giyoh, har bir gul, boringki hamma-hamma narsalarga chuqur hayrat bilan boqar, hidlar va teginar edi. U hattoki zaharli hovuz bo'yiga qo'nib,

undan ham shirin bo'lsa kerak, degan xayolda ozgina totib ko'rmoqchi bo'ldi.

Biroq bu yerlarda qafasdag'i kabi och qolsang, tayyor ovqat, hamisha taxt turadigan sharoitlar muhayyo emasdi, buning uchun qushchaning o'zi mehnat qilishi, yelishi, qidirishi, kurashishi lozim edi, oxiri shuncha urinishlari evaziga kelgan yeguliklardan to'yinib, ana undan keyingina charchagan, holsiz qanotlariga orom bera olishi mumkin bo'lardi. Ammo baribir qushcha baxtiyor edi. Chunki u ozod edi!

Unga mana shu hayot ko'proq yoqib qolgandi: qidirishi, topishi, xursand bo'lishi, qayg'urishi, kurashishi va yengishi mumkin bo'lgan shu hayot a'lo edi qushcha uchun. Tasodifan ochilib qolgan huv o'sha qafas eshigi esa hali ham ochiq turar, biroq unda endi hech kim yashamas edi!

Qandilat YUSUPOVA tarjimasi

ODDIY SINOV

Tashqarida qor derazani ko'mib yuborguday ko'p yog'gandi. Quyoshning zaif nurlari deraza tirqishlari oralab kulba ichiga quyilarkan, ayniqsa, kulbaning yog'och devoriga osib qo'yilgan xarita yuzini kuchliroq yarqiratib yuborardi. Oftob tobora yuqorilagan sari shu'lalari ham qor uymi tepasida shuncha ko'p tovlanardi. Kulbaning bir tomoniga chuqur xandaq kovlab qo'yilgandi. Quyosh charaqlab turgan kunlari nurlar devor ustida turli xil shakl-u shamoyil yasab raqsga tushar, ular xuddi oxirgi sovuq qordan o'ch olmoqchiday bor issiqliklarini mo'l-ko'l to'kishardi. Martning oxirgi kunlari edi. Kulba ichida devor ga tirab qo'yilgan stol yonida bir mayor o'tirardi. Stolning narigi tomonidan esa unga hamroh ad-yutant joy olgandi.

Mayorning ko'zлари atrofida ko'zoynagidan qolgan ikkita oppoq aylana iz paydo bo'lib qolgandi. Yuzining qolgan qismini oftob olib qoraytirgan, o'sha qoraygan tanasi issiq harorat taftida yana-yam kuyib ketgandi. Shishib qolgan burnining chekkasidagi semiz terisi ham negadir po'rsildoq-po'rsildoq bo'lib yorilib qolgandi. U qo'lidagi gazetalarga tez-tez ko'z yogurtirib chiqar, ayni damda chap qo'lini yonidagi yog' solingan likop-

cha tomon uzatib, barmoqlarini yog‘ga botirar va uni butun yuzi bo‘ylab yaxshilab surtardi, uning barmoqlari bu vazifani juda mayinlik bilan bajamoqda edi. Boshliq qo’llarini likopcha chetiga g‘oyatda ehtiyyotkorlik bilan olib borar, yog‘ yuqi singib qolmasligi uchun nihoyatda muloyim harakatlanardi, peshanasi bilan ikkala yonog‘i yuzasiga ham o’shanday astalik bilan yog‘ surtib olgach, eng oxirida shishgan burni atrofini ham barmoqlari orqali zo‘r hafsalal bilan ishqalay ketdi. Nihoyat bu ishini tugatib, mayor sekin o‘rnidan turdi-da, yog‘ solingan likopchani ko‘tarib, dam oladigan xonasi tomon yo‘naldi.

– Men biroz mizg‘ib olmoqchiman, – deb qo‘ydi u adyutantga qarata. Adyutant bu armiyada boshqa harbiylar singari hech qanday buyruqqa javobgar ofitser emas, balki o‘z holicha mustaqil bir harbiy edi.

– Sen bemalol yeb-ichib o‘tiravergin.

– Mayli, senyor Maggore, – deb javob bergen bo‘ldi adyutant. Shunday dedi-da, u ham stuli orqasiga bor gavdasini tashlab, uzoq esnab qo‘ydi. Ozgina vaqt o‘tgach, paltosi cho‘ntagidan qog‘ozga o‘ralgan qandaydir kitob olib ochdi-yu, lekin uni darrov stol ustiga tashlab qo‘ydi, so‘ngra bamaixotir tamakisini tutatdi. Adyutant tamakini qattiq-qattiq tortib, buruqsitib-buruqsitib tutun chiqardi-da, boyagi kitobni o‘qish uchun stol ustiga eringancha engashdi. Ammo baribir o‘qishga shashti bo‘lmay, tag‘in yopdi-yu, qaytarib cho‘ntagiga solib qo‘ydi. Busiz ham adyutantning bir dunyo ishlari, o‘ylaydigan o‘ylari ko‘p edi. O‘scha ishlari bitmaguncha kitob o‘qish uning kallasiga

sig'masdi. Tashqarida esa mart quyoshi sekin-asta purviqor tog'lar ortiga bota boshlagan, kulba devorlari ustidagi o'ynoqi nurlar raqsi ham ohista-ohista so'nib bormoqda edi. Shu payt xonaga qandaydir bir askar yigit kirib qoldi-da, hech narsa demay, burchakda uyulib turgan qarag'ay shoxlarini olib, har xil uzunlikda chopgach, pech ichiga birma-bir tashlay boshladи.

– Sekinroq, Penin, – deb ogohlantirdi uni ad-yutant o'tirgan yeridan. – Mayor dam olyapti.

Penin qorachadan kelgan nimjonroq yigitcha bo'lib, mayorning qo'l ostidagi askarlardan edi. U imkon qadar ovoz chiqarmay o'tinlarni joylagach, pech eshigini yopib, yana kulba orqasiga o'tib ketdi. Adyutant endi gazeta o'qishga tutindi.

– Adyutant! – birdan ichkari xonadan mayorning ovozi eshitildi.

– Nima gap, senyor Maggore?

– Peninni oldimga kiritib yubor.

– Penin! – o'sha zahoti yigitchani chaqirdi ad-yutant.

Xonaga Penin kirdi.

– Seni boshliq ko'rmoqchi.

Yigitcha indamasdan katta xona orqali o'tib, mayor eshigi oldiga keldi. Qiya ochiq turgan eshikni qo'rqa-pisa ikki marta taqillatgan bo'ldi.

– Senyor Maggore?

– Kiraver, Penin, – adyutant mayorning boshliqlarga xos buyruq ohangini eshitdi. – Eshikni orqangdan yopib kir.

Ichkarida mayor o'zining devorga o'rnatilgan karavotida yoyilib yotardi. Boshining tagiga allanarsalar solingan ryukzagini yostiq qilib qo'yib

olgandi. Boshliqning uzun, oftobda kuygan, yog'-langan semiz yuzi yosh askarga boqdi. Penin mayorning yopinchiq ustiga uzala tashlangan jundor, baquvvat qo'llari tarafga ko'zlarini olib qochdi.

– Yoshing o'n to'qqizdamni, Penin? – deb so'radi mayor yigitchaning chehrasiga diqqat bilan razm solarkan.

– Shunday, senyor Maggore.

– Hmm, shunaqa degin, – deb qo'ydi mayor jid-diy qiyofada. Keyin yana o'shanday ohangda ta'kidlagan bo'lib savol berdi: – Umrindga hech sevib ko'rganmisan?

– Meni kechirasiz, bu gapingizga tushunolmay qoldim, senyor Maggore?

– Men sevganmisan, deb qizlarni nazarda tut-yapman?

– Ha, qizlar bilan gaplashib turaman.

– Yo'q, tushunmayapsan, men sendan buni so'ramadim. Men sendan biror-bir qizga ko'ngil qo'y-ganmisan, deb so'radim.

– Albatta, senyor Maggore.

– Haa, demak, hozir kimnidir sevasan, shundaymi? Unga xat ham yozib turar ekansan. Men hamma xatlariningni o'qib chiqdim.

– To'g'ri, men rostdan ham bitta qizni yaxshi ko'raman, – deb tan oldi Penin, – ammo unga birorta ham xat yozgan emasman.

– Yo'g'-ey, aniq yozmaganmisan?

– Ha, gapim rost, aniq yozmaganman.

– Adyutant! – mayor xuddi avvalgi ohangini buzmasdan ofitserni chaqirdi. – Mening gaplarimi ni eshitib turibsamni sen?

Narigi xonadan hech qanday javob kelmadidi.

– U bizni eshitmaydi, – deb qo'ysi mayor Peninga qarab. – Xo'sh, demak, sen o'sha qizni chindan ham sevishingga ishonasan?

– Ishonaman, senyor Maggore.

– Unday bo'lsa, – mayor askarning yuziga bir qur ko'z yogurtirib oldi, – sen hech qanday axloqsizlik ham qilmagansan?

– Axloqsizlik, deb nimani nazarda tutganingizni bilolmadim, senyor.

– Yaxshi, juda soz, – deya xulosa chiqargan bo'ldi mayor o'zicha, – u holda sendan hech qanaqa boshliq chiqmas ekan.

Penin boshini egib, ko'zlarini polga qadadi. Mayor uning qoracha yuzlariga, oriq qo'llariga, ozg'in gavdasiga boshdan oyoq bir-bir qarab chiqdi. So'ngra yana avvalgiday jiddiy tarzda gapida davom etdi:

– Demak, sen chin dilingdan istamayotgan ekansan, – mayor sukut qildi. Penin hamon poldan ko'z uzmay turardi. – Eng buyuk orzuying haqiqiy emas ekan unda, – Peninning ko'zlar hali ham polda edi. Mayor gapdan to'xtab, askarlik xaltasi ustiga suyandi-da, jilmaydi. U yurak-yuragidan yengil tortgandi. Armiyadagi hayot jiddiy hayot ekan, u yoshlarni bulg'amay, matonatli, rostgo'y, toza qilib tarbiyalabdi. Mayor negadir xursand bo'lib ketdi.

– Yaxshi bola ekansan, – dedi u biroz yumshoqlik bilan. – Sen yaxshi bola ekansan, Penin. Lekin bu gapimga ko'p ham taltayib ketma. Senga otalarcha gapim, yigitcha, doimo kimdir zim dan poylab kelib, orqangga pichoq urib ketishidan ehtiyot bo'lib yur.

Penin hamon boshlig‘ining karavoti yonida bo-yagiday sukul saqlagan ko‘yi jimgina turardi.

– Menden qo‘rqma, – dedi mayor unga mehribonlik bilan tikilib. U yopinchig‘i ustidagi qo‘llarini bukdi. – Men senga hech narsa qilmayman. Istsang, bo‘linmangga qaytib ketishing ham mumkin. Lekin eng yaxshisi, menda, mening askarim bo‘lib qolganing ma‘qulroq. Bu yerda seni hech kim o‘ldirib ketolmaydi.

– Menden yana nimadir so‘ramoqchimisiz, senyor Maggore?

– Yo‘q, – dedi mayor, – chiqib ketaver, xohlagan ishing bilan shug‘ullanaver. Ha-ya, chiqishingda eshikni ochiq qoldir.

Penin eshikni yopmasdan tashqariga chiqdi. Adyutant yigitchaning xonadan o‘ng‘aysizlanib yurib o‘tib, kulbadan chiqib ketishini kuzatib turdi.

Penin pechga o‘t yoqish uchun yana qarag‘ay shoxlaridan ko‘tarib kirganida, butunlay qip-qizariib ketgan, harakatlari ham oldingidan ancha o‘zgarib qolgandi. Adyutant yosh askarning bu holatini kuzatib turib, miyig‘ida kulib qo‘ydi. Penin tag‘in tashqariga chiqib, yanada ko‘proq o‘tin ko‘tarib kirdi. Ichkari xonada esa mayor qishki ko‘zoynaklari bilan lattaga o‘rab, devordagi mixga osib qo‘yilgan kaskasiga termilgancha o‘z karavotida o‘y surib yotar, biroq uning qulqlari qo‘shti xonadagi Peninning qadam tovushlarida edi. „Voy kichkina shayton-ey, – deb o‘ylardi boshliq kulisirab, – ehtimol, u meni aldab qo‘ygandir“.

Qandilat YUSUPOVA tarjimasi

GUNG ODAM

Sizga aytadigan bir hikoyam bor. Ammo uni aytib beradigan tilim yo‘q – men gapirolmayman. Bu hikoya tez-tez xayolimdan ko‘tarilib ketib qolsa-da, biroq ahyon-ahyonda baribir esimga tushib qolaveradi.

Hikoyam qahramonlari bitta ko‘cha, bitta uyda yashagan odamlar. Qaniydi, gapira olsam edi, balki, hikoyamni ashula qilib aytgan bo‘larmidim... Men uni barcha ayollarning, barcha erkaklarning qulog‘iga shivirlab-shivirlab aytib berardim. Ushbu hikoyani hamma ko‘chalarga kirib, qayta-qayta so‘zlayverardim. Biroq tillarim jonsizday shalvirab, qotib qolgan, u tinmay tishlarimga urilib kelib-ketaveradi, ammo bir sas chiqara olmaydi. Shundan men noilojman, juda nochorman.

Qahramonlarim bitta uyda hayot kechiruvchi uch nafar kishi edi. Ulardan biri yosh va nihoyatda bashang kiyinib olgandi. U hayotdan xursand va tinimsiz xandon otib kulardi.

Ikkinci erkak esa soch-soqoliga oq oralagan, yoshi o‘tinqirab qolgan kimsa edi. U negadir atrofга biroz shubha va xavotir ichida nazar solar, lekin o‘qtin-o‘qtin mudrab, uxlاب qolardi.

Va nihoyat, uchinchi erkak alamli ko‘zlari ni tevarakka qasd bilan tikkancha, xona ichida

qo'llarini bir-biriga ishqalab, u yoqdan bu yoqqa sarosar borib-kelardi. Har uchala qiyofa ham kimnidir kutish bilan umr o'tkazardi.

Uyning yuqori qavatidagi nimqorong'i xona ichida bir ayol devorga suyangancha derazadan tashqariga tikilib turardi. Darvoqe, ehtimol hikoyamning asosiy qahramoni ana shu ayoldir. Balki, men hamma narsani moyintar-soyintar qilib yuborgandirman. Ha, mayli. Nima bo'lganda ham, tilsiz va so'zsiz bo'ssam ham, ushbu hikoyamni barcha odamlarga yetkazib berishim lozim.

Esimda, bir mahal uyga bosiq va xotirjam to'rtinchi odam ham kirib keldi. Uy bamisolı tungi dengiz kabi nihoyatda osuda, tiq etgan tovush yoxud boshqa biror ovoz yo'q. Hamma yoq suv quygandek jimjit.

Notanish erkak uch nafar qahramonim ovoz chiqarmay o'tirgan xonaga yaqinlashdi.

Uy ichida hadeb u yoqdan bu yoqqa borib keelayotgan uchinchi asabiy erkak xuddi qafasga tushib qolgan jonivorday tipirchilab, qattiq bezovtalanib qoldi. O'rta yoshli ikkinchi erkak esa moshkichiri soqolini tutamlagancha biroz kalovlanib turdi.

Uyga kutilmaganda kirib kelgan boyagi erkak hech kimga qaramasdan, to'g'ri yuqoriga – ayolning oldiga chiqib ketdi.

Ayol uni ancha vaqtidan beri mushtoq kutayotgan edi.

Butun uy cheksiz sukunat og'ushida, faqat devorlarga osib qo'yilgan turli soatlarninggina to'xtovsiz „chiq-chiq“i bu qadim jimlikni buzib turgandek.

Yuqori xonadagi ayol esa qancha damlardan buyon butun borlig'i bilan so'ngsiz muhabbatga tashna bo'lib, sevib-sevilish baxtini intiqib kuttayotgandi. U kimdandir mehr kutar, nimanidir betoqat poylar va qachondan beri o'z muhabbatiga erishishni orzu qilib yashardi. Boyagi erkak uning huzuriga kirib kelishi bilan ayol sapchib o'rnidan turib ketdi. Lablari juda uzoq vaqtdan beri saqlab kelgan so'z uchun asta ochildi. Ayolning lablarida mas'ud, xushnud bir tabassum zohir bo'ldi.

Biroq erkakdan hech sado chiqmadi. Uning ko'zlarida na bir ifoda, na bir so'roq aks etardi. Erkakning ko'zlari xira yulduzlar kabi sovuq va ma'nosiz edi.

Pastda esa bezovtalanib turgan uchinchi erkak go'yo adashib qolgan och kuchukday benajot shumshayib turardi. Ikkinchisi erkak ham uning yonida chorasisiz qaltirardi. U qo'rqqanidan oxiri hushidan ketdi-yu, polga yiqilib tushdi. Shu al-fozda uxlab qoldi-da, qaytib hech qachon ko'zini ochmadi. Hasham dor kiyingan yoshgina yigitcha ham shular bilan birga, biroq u o'zini yo'qotmagan, faqat xushbichimgina qora mo'ylovinini tekislash bilan ovora edi.

Bo'ldi, juda charchadim. Endi hikoyamning bu yog'ini davom ettirolmayman. Axir, men gapirolmayman. Ha, odam bolasi uchun bitik qilib yaratilgan azal taqdir sinoatlarini men emas, boshqa har qanday inson ham tushuntirib bera olmaydi. Qismat yoziqlari oldida hamma odam ham gungdir.

Uyga kirib kelgan oxirgi erkak O'lim edi.

Yuqorida uni poylayotgan go'zal ayolning ismi esa Hayot deb atalardi.

Uchala erkak esa odamzod umrining turli bosqichlari – yoshligi, o'rta yoshligi va keksalik pallalari hisoblanardi. Lekin men qanchalik tirisib-tirmashmay, baribir, ularni mufassal bayon qila olmas edim. Axir, inson taqdiri hech qachon birgina hikoya ichiga jo bo'lolmaydi.

Hayot esa juda go'zal, u hamisha go'zallik va yana go'zallik istaydi, mehr kutadi, muhabbatni sog'inadi, butun borlig'i bilan sevib-sevilishni orzu qiladi.

Ammo O'lim hamisha haq. U sira kutilmagan-da paydo bo'ladi-yu, xotirjam holda o'z o'ljasini churq etmay olib ketaveradi. Insoniyat uchun atalgan bitik shu ekan, odamzod buning oldida hamma vaqt chorasizdir.

Men sizga juda go'zal bir hikoyani so'zlab bermoqchi edim. Ammo, afsus, uddalay olmadim. Negaki, men gungman. Falak nega mening zarbonimga birgina so'z ato etmagan ekan? Nega men tilisiz bo'lib yaralgan ekanman? Nega hayot hikoyasini so'zlab bermoqlik uchun tilimga birgina kalima kelmas ekan?

Yo'q, aslida, biz – hammamiz ham gung bo'lib tug'ilganmiz. Biz Hayot va O'lim orasidagi lahzalar ichida so'zsiz yashab o'tamiz.

Qandilat YUSUPOVA tarjimasi

KUCHUKCHA VA UCH DOLLAR

Men hamma vaqt odam halol yashashi kerak, deb ishonib kelganman. Doimo bitta gapni takrorlardim: „Hech qachon o'zing ter to'kib topmagan nonni og'zingga olmagin“.

Hozir sizga butun umrim mobaynida nechog'liq halol yashaganimni isbotlab beruvchi bitta hikoyani aytib bermoqchiman.

Bir-ikki kun ilgari yaqin do'stimning uyida Mayls ismli general bilan uchrashib qoldik. General Mayls tengi yo'q odam ekan, u bilan tezda til topishib oldik.

„Siz mabodo 1867-yilda Vashingtonda yashagan emasmisiz?“ – deya dabdurustdan so'rab qoldi general.

„Ha, yashaganman“, – deb javob berdim men.

„Buni qarang-a, o'shandan beri hech yuz ko'risha olmadikmi?“ – dedi general afsuslanib.

„General“, – deya uning gapini bo'ldim men. „O'shandan keyin biz yuz ko'risha olmasdik. Siz o'sha paytda ham allaqachon katta general bo'lganiningizni, meni esa hali nomi chiqmagan kitoblari niyam hech kim o'qimaydigan bechora yozuvchi bo'lganimni unutgan ko'rinasiz. Siz meni eslay olmaysiz, deb o'ylayman, lekin biz o'sha vaqtda Vashingtonda bir martagina ko'rishib qolgandik“.

O'sha uchrashuvni men hozirgiday yaxshi eslayman. Unda rosa g'arib yashardim, hatto nonga ham pul topolmay qiyinalardim. Bir do'stim bor edi. U ham mendan qolishmaydigan kambag'al yozuvchi edi. Biz birga yashardik. Hamma ishni birgalashib bajarardik: ishlardik, kitob o'qirdik, birgalikda sayr qillardik. Qornimiz och qolganida ham ikkalamiz barobar och bo'lardik. Bir marta uch dollar pulga rosa ham zoriqib qoldik. Nima uchun aynan uch dollarga muhtoj bo'lganimizni hozir eslay olmayman-u, biroq o'sha pulni kechgacha topishimiz zarur bo'lgani yodimda qolgan.

„Biz darhol uch dollar topishimiz shart“, – dedim do'stimga. „Men bu pulni topishga harakat qilaman, lekin sen ham jim o'tiraverma“.

Uydan chiqib ketganim bilan qayerga borib, qanday qilib uch dollarni topa olishimni bilmay boshim garang edi. Bir soatcha Vashington ko'chlari bo'ylab sanqib yura-yura, axiri tinka-madorim quridi. Nihoyat, bitta katta mehmonxona oldiga keldim. „Ichkariga kirib, biroz nafasimni rostlab olay“, – deb xayol qildim o'zimcha.

Mehmonxona zaliga kirib, divanga o'tirdim. To jajjigina, yoqimtoy bir kuchukcha zalda paydo bo'lib qolgunicha o'sha yerda o'tiraverdim. Kuchukcha nimanidir qidirib yurardi. Ha, chindan ham g'aroyib kuchuk ekan, deya xayolimdan o't-kazsam-da, biroq qo'llimdan hech nima kelmasdi, oxiri men uni yonimga chaqirib, u bilan birga o'ynay boshladim.

Notanish bir erkak mehmonxonaga kirib kelganida men hali ham it bilan o'ynab o'tirardim. Boyagi erkakning egnidagi ko'r kamgina forma-

sidan men darhol uni General Mayls ekanligini fahmladim. Men ilgaridan uni gazetalardagi suratlari orqali yaxshi tanirdim.

„Vo ajabo! Bu qanday chiroyli kuchukcha ekan-a!“ – deya hayratlandi u. „Siznikimi?“

Endi javob aytish uchun og‘iz juftlagan edim:

„Kuchugingizni sotmaysizmi?“ – so‘rab qoldi u.

„Uch dollar“ – deb yubordim bexosdan.

„Uch dollar?“ – deya ajablandi general. „Juda ham arzon-ku. Men sizga kuchugingiz evaziga ellik dollar taqdim etaman“.

„Yo‘q, yo‘q, kerak emas. Atigi uch dollar kifoya qiladi, janob“.

„Mayli, nima ham derdim. Kuchuk sizniki. Modomiki, faqat uch dollargina istar ekansiz, kamina itingizni jon-jon deb sotib olaman“.

General Mayls menga uch dollar berdi-da, itni olib, xonasiga chiqib ketdi.

Oradan o‘n daqiqa o‘tar-o‘tmas bir qariya zalga halloslagancha yugurib kirdi. U zal uzra zirillab ko‘z yogurtira boshladi. Cholning nimadir qidirayotganini tushundim.

„Aftidan, bir kuchukchani qidirayotgan ko‘rinasiz, janob?“ – deya iltifot qilib so‘radim.

„O, ha! Uni ko‘rdingizmi?“ – deb so‘radi qariya suyunib ketib.

„Itingiz atigi besh daqiqa avval shu yerda edi, uning bir erkak bilan ketganiga ko‘zim tushganday bo‘luvdi“, – dedim men shosha-pisha. „Agar yo‘q demasangiz, uni topishda sizga ko‘maklashib yuboraman“.

Qariya xursand bo‘lib ketdi va unga yordam-lashishimni iltimos qildi.

„Sizga yordamim tegsa, boshim osmonga yetardi, biroq bu hol ancha vaqtimni o‘g‘irlaydi-da, shunga...“

„Ketgan vaqtingiz hisobini o‘zim to‘layman“, – dedi qariya jonholatda, – „Qancha istaysiz?“

„Uch dollar“ – deya hozirjavoblik bilan javob berdim.

„Uch dollar“, – xuddi general kabi ajablandi qariya ham. „Biroq bilasizmi, mening itim bebaho kuchuk edi. Agar uni menga topib bersangiz, sizga o‘n dollar ham to‘lashga roziman“.

„Yo‘q, janob, men faqat uch dollargina istayman, xolos, undan ortiq bir tiyini ham kerak emas“, – deya hotamtoylik qildim men.

Shundan so‘ng men to‘ppa-to‘g‘ri General Mayls xonasiga ko‘tarildim. General yangi mehmoni bilan o‘ynab o‘tirgan ekan.

„Itni qaytarib olgani keldim“, – deb ma‘lum qildim men qat’iy.

„Lekin endi bu it sizniki emas – uni men sotib oldim. Buning evaziga sizga uch dollar pul ham in‘om etdim“, – deya hayron qoldi General.

„Sizga bergen pulingizni qaytarib beraman, lekin itni olib ketishim zarur“, – deb oyog‘imni tirab oldim.

„Ammo siz kuchukni menga pullab bo‘ldingiz, u endi mening itim“.

„Afsuski, uni sizga sota olmas ekanman, janob, negaki u meniki emas edi“.

„Bunisi bilan nima ishim bor, siz kuchukni uch dollar evaziga menga sotib bo‘lgansiz“.

„Buni qarang-a, it o‘zimniki bo‘lmasa, uni sizga qanday qilib sotib yuboraman? Siz mendan ku-

chuk uchun necha pul istaysiz, deb so'radningiz, men esa uch dollarga zoriqib turganimni aytdim, bo'lgan gap shu, xolos. Lekin sira-sira it meniki, degan gapni og'zimga olmadim“.

Endi General Maylsning tepa sochi tikka bo'ldi.

„Bergan uch dollarimni cho'zib qo'ying-da, itingizni olib ketavering“, – deb baqirdi u.

Kuchukchani o'z egasiga olib borganimda, boyoqishning boshi ko'kka yetdi, quvonchi ichiga sig'may, va'da qilgan uch dollar pulini qo'llimga tutqazdi. Mening ham ko'nglim joyiga tushgandi, zero mana endi peshana terim bilan ishlab topgan uch dollar pulga ega bo'lgandim.

Ana endi siz nima sababdan mening halollik borasidagi aytgan so'zlarimni anglab yetgandirsiz, odam hech qachon beli og'rib topmagan nonni og'ziga olmasligi kerak.

Qandilat YUSUPOVA tarjimasি

BEGONA MAMLAKATDA

O'sha yilgi kuzda ham hali urush tugamagan, ammo biz ortiq jangda qatnashmayotgan edik. Milan kuz oylarida juda sovib ketar, tun ham ancha barvaqt tushardi. Deraza oynalaridan elektr chiroqlarining birma-bir yona boshlagani ko'rinar va sokin ko'chalar bo'ylab ularni tomosha qilib yurish benihoya maroqli edi. Ayrim do'konlarning tashqarisida turli xil o'yinchoqlar osilib turar, qor kukunlari yasama tulkilarning yungi ustiga o'tirib, dumlarini shamol uchirib o'ynardi. Qotirilib, do'kon eshigi tepasiga ilib qo'yilgan kiyik haykalchasi ham og'ir va ichi bo'm-bo'sh holatda turar, kichkina o'yinchoq qushchalar-da izg'irin dastidan bir-biriga urilib, qattiq shamolda patlari to'zg'ib yotardi. Kuz nihoyatda sovuq, achitqi izg'irin qirrador qoyalarini qor bosgan olis tog'lar tomondan kelar edi.

Biz hammamiz har kuni harbiy kasalxonada jam edik, oqshom tushishi bilan shaharcha bo'y lab istagan yo'limizdan ketib, biroz aylanib kelardik. Ikkita yo'l suv shoxobchasi yoqalab ketgan bo'lib, bizzay majruhlar uchun ancha uzunlik qilardi. Shunga qaramasdan, biz baribir o'jarlik bilan gospitalga qaytish uchun o'sha ariq ustidagi ko'prikdir yurib o'tardik. Darvoqe, ariq usti-

dagi ko'priklar uchta edi. Ularning birida bir ayol qovurilgan kashtan yong'og'i sotib o'tirardi. Biz pistako'mir yoqilgan olov oldida turib, ayolning yong'oqlaridan xarid qilar, ularni cho'ntaklarimizga solib, sal isinib olardik. Bu juda yoqimli edi. Kasalxonamiz anchagina eskirib ketgan, lekin shu bilan birga ko'rksamligini hali unchalik yo'-qotmagan katta binoda joylashgandi. Asosiy darvozadan kirganingizdan keyin keng hovli yuzasini kesib o'tib, yana boshqa bir darvozadan chiqib keta olardingiz. Shu qadimiy gospitalimizning orqasida g'ishtdan qurilgan yangi pavilyon ham bo'lib, biz bemorlar har kuni mana shu pavilyonda uchrashar, aravachalarimizda o'tirgancha o'zimizni o'ta intizomli va sinchkov tutardik.

Ba'zida men o'tirgan aravacha oldiga doktor kelib, gapga tutib qolardi:

– Urushdan oldin eng yaxshi ko'rgan mashg'u-
lotingiz nima bo'lgan? Sport bilan shug'ullangan-
misiz?

– Ha, futbol o'ynab turardim, – deb javob be-
rardim.

– Yaxshi, – der edi doktor cho'zib, – bu yerdan
chiqib olganingizdan keyin hali avvalgidan ham
yaxshiroq futbol o'ynaysiz.

Mening tizzalarim bukilmay qolgan, oyog'im
joni yo'qdek karaxt bo'lib qotib turardi. Xuddi
uch g'ildirakli velosiped haydayotgandek qiyofa-
da edim. Ming urinsam ham, tizzalarim zig'ircha
harakatga tushmas, har gal ularni qimirlatishga
urinishim bilan aravacham sekin lapanglashni
boshlardi. Doktor bo'lsa hadeb ruhimni ko'tarish-
ga zo'r berardi:

– Hali hammasi o'tib ketadi. Siz omadli yigit-siz. Endi yana futbol o'ynaydigan bo'lsangiz, bu safar aniq champion bo'lasiz!

Mening yonimdag'i aravachada qo'llari xuddi go'daknikidek kichkina bo'lib qolgan yoshi katta-roq bir mayor o'tirar edi. U doktor qo'llarini tek-shirayotgan vaqtida menga qarab ko'zlarini qisib qo'yari, ikkita charm tasmasida osilib turgan qo'li pastga tushib-chiqarkan, egilmaydigan bo'lib qolgan barmoqlarini silkitarkan, kulib der edi:

– Biz ham futbol o'ynarmikanmiz, kapitan doktor?

Bir paytlar mana shu mayib-majruh mayor zo'r qilichboz bo'lgan, urushdan oldin Italiyada uning oldiga tushadigan qilichboz topilmagan ekan.

Doktor javob qaytarish o'rniga orqa xonadagi ofisiga kirib, xuddi mayorniki singari kichkinagina, qovjirab qolgan qo'llar suratini olib chiqar, mayorga nimalarnidir uqtirishga harakat qilardi. Noiloj mayor esa sog' qo'li bilan doktor bergen suratni ushlar, unga diqqat bilan razm solar, „Jarahatlarim tuzalarmikan o'zi?“ deb umidsiz ohanga so'rardi.

– Bu baxtsiz hodisa bitta sizning boshingizga tushgan emas, – deya doktor uni yupatgisi kelardi.

– Juda qiziq, judayam qiziq, – xayol surgancha ta'kidlar edi mayor, keyin esa qo'l rasmini yana doktorning o'ziga qaytarib berardi.

– O'zingizga ishonasizmi? – deb so'rardi doktor unga umid bilan qarab.

– Yo'q, – der edi mayor keskin tarzda.

Gospitalda men bilan tengdosh bo'lgan tag'in uchta yigit bor edi. Ularning uchalasi ham Mi-

landan kelgan, biri huquqshunos, yana biri rassom, uchinchisi esa oddiy askar bo'lishni niyat qilgan ko'ngli toza chapani bolalar edi. Ba'zan biz shu yigitlar bilan birgalashib „Kola“ qahvaxonasi-ga ketardik. Biz u yoqqa eng qisqa bo'lgan yo'dan borardik, negaki to'rttalamiz ham aravachada yurardik. Bu yerdagi odamlar bizni ofitser bo'lgnimiz uchun yomon ko'rardi. Vino sotiladigan do'kon yonidan o'tib ketayotganimizda har gal kimdir: „A basso gli ufficiali!“¹ deb qichqirardi.

Ayrim vaqtarda safimizga yuzini qora shoyi dastro'mol bilan o'rab-chandib olgan yoshroq bola ham qo'shilib olardi. Uning burni bilan yuzini qaytadan tiklayotgan edilar, shu sababdan butun yuzi o'rab tashlangandi. Bu baxtiqaro yigitcha frontga harbiy akademiyadan kelib qo'shilgan va ilk marta jangga kirgan kuniyoq bir soat ichida yarador bo'lib, ortga qaytishga majbur bo'l-gandi. Doktorlar uning yuzini qaytadan tiklashga kirishgan, biroq yigitchaning burnini asliday to'g'ri qilish nihoyatda mushkul ish edi. Keyinchalik o'sha yigitcha Janubiy Amerikaga borib, qaysidir bir bankda ishlagan emish. Ammo bizga bu kabi voqealar bir zamonlarda, odamning esida turmaydigan qadim davrlarda bo'lib o'tgan-dek tuyular, biz ularning qay nuqtada boshlanib, qaysi nuqtada tugashini hech qachon idrok qilolmay qolgandik. Nazarimizda butun dunyo faqat urushdan iboratday va u hech qachon tugamaydiganday bo'lib ko'rinar, lekin biz endi janglarda ortiq qatnasholmas edik.

¹ „Yo'qolsin ofitserlar!“

Hammamiz ham urushda medallar bilan taq-dirlangandik, birgina yuzi bint bilan chandib tashlangan bolada hech qanday unvon yo'q edi, zotan u hali frontda biror-bir mukofot olish uchun yetarlicha xizmat ko'rsatolmay, yarador bo'lib qolgandi. Rangpar yuzli huquqshunos yigit oldin Arditi degan joyda leytenant sifatida xizmat qilgan va bizda endigina bir dona bo'lgan sharaflı unvondan naq uchtasiga ega edi. Sho'rlik yigit ancha vaqt o'lim bilan yonma-yon yashab, endi-endi undan sal uzoqlasha boshlagandi. Biz – yarador urush ishtirokchilari deyarli hamma vaqt birga edik, gospitalda har kuni yuzma-yuz kelib qolaverardik. Shaharchaning biz uchun eng sevimli bo'lgan „Kola“ qahvaxonasi tomon vino do'konlaridan taralib turgan kuy va qo'shiqlarni tinglagancha qorong'i ko'chada imillab borarkanmiz, gohida yo'l-kalar chetida g'uj bo'lib turgan erkak va ayollar yonidan o'tib ketishga ham to'g'ri kelib qolar va ular bizni qanchalik yomon ko'rib, sassiq gap qilib qolgan paytlarda ham o'zimizni tutib, hech narsa bo'limgandek yo'limizda davom etib ketaverardik.

Bizning bilganimiz faqatgina qahvaxona edi, xolos. U yerdagi issiqlik, u qadar o'tkir bo'limgagan yorug'lik, tutun va shovqinga to'la xonalar hamda stol atrofida jam bo'lib o'tirgan shaddod qizlar bilan devor va tokchalarda yoyilib yotgan bezakli qog'ozlarni o'lgudek yaxshi ko'rardik.

„Kola“dagi qizlar nihoyatda vatanparvar edi. Ba'zida men shunday o'ylardimki, butun Italiyadagi eng elsevar insonlar ana o'sha qahvaxona qizlari edi. Men hali-hamon ular kabi vatanparvar odamlarni qayta uchratmadim.

Qahvaxonaga kirib o'tirganimizdan keyin hamrohlarim mendan medallarim to'g'risida so'rabsurishtirib qolishar, ularni qanday xizmatlarim uchun olganimni gapirib berishimga qistashar edi. Men esa ularga g'oyatda chiroyli tilda yozilgan qog'ozlarni ko'rsatar, lekin ulardagi maqtovlar uchun emas, balki vijdonan aytganda, amerikalik bo'lib urushda qatnashayotganim uchungina ko'ksimdagи unvonlarni taqib yurganimni bildirib qo'yardim.

Shu gaplarimdan keyin yigitlarning menga bo'lgan muomalasi biroz o'zgarar, men ularga do'st bo'lishimga qaramay, xuddi ichlaridagi dushman-ga qarayotgandek sovuq nazar bilan qarashar edi. Haqiqatan ham, men bu jangchilarga chin dilim-dan do'st edim, ko'nglimda zig'ircha adovatim yo'q, ularni baribir yaxshi ko'rardim. Bu yigitlar esa erishgan mukofotlarini turli qahramonliklari uchun qo'lga kiritgandilar. To'g'ri, men urushda yarador bo'lgandim, ammo urush o'z nomi bilan urush, unda jarohat olish tabiiy hol deb qabul qilinardi. Men aslo yaralarim ustidagi bintlardan or qilmasdim, gohida qahvaxonada kokteyl ichib o'tirgan kezlarimizda o'zimni xuddi hamrohlarim amalga oshirgan qahramonliklarni bajarib, ular olgan unvonlarga men ham sazovor bo'lgandek xayol qilardim; biroq yarim kechada bo'm-bo'sh ko'chalardan, barcha yopilgan do'konlar yoni-dan izg'irin shamolda iloji boricha ko'cha chiroqlari yaqinidan yurishga urinib ketarkanman, yurak-yuragimdan shuni aniq bilardimki, men hech qachon o'sha shovvoz yigitlar kabi qahramonliklar ko'rsatolmas edim, zotan men o'limdan

benihoya qattiq qo'rqardim, har tunda bir o'zim karavotimda o'ychan yotarkanman, ajal nafasidan jonim talvasa ichida o'rtanib, qachon va qay holatda frontga qaytishimni aqlimga sig'dirolmay, miyam og'rib ketardi.

Qator unvonlarga erishgan uchala hamrohim misoli qirg'iy ovlovchi ovchilardek g'alati ko'rinar; ammo men ularning ko'ziga ovlanadigan najotsiz qirg'iyga o'xshab ko'rinsam-da, aslida qirg'iy kabi ojiz va pastkash emasdim; buni ularning o'zlarini ham juda yaxshi bilar edi, vaziyat shunday davom etarkan, men ulardan asta-sekin uzoqlashib ketdim. Lekin urushda birinchi kuniyoq yarador bo'lgan yosh yigitcha bilan do'stligimiz davom etdi, negaki u hali yosh, qalbi qordek oppoq, har qanday oldi-qochdi gaplardan xoli, beg'arazinson edi, uni hammadan ko'ra ko'proq men yaxshi ko'rardim.

Bir paytlar eng mohir qilichboz bo'lgan mayor esa frontdagi qahramonliklar-u katta-kichik unvonlar borasida qiziqmas, aravachalarimizda yonna-yon o'tirgan kezlarimizda vaqtini nuqlu mening grammatikamni tuzatishgagina sarflar edi. U mening italyanchamni xo'jako'rsinga oshirib maqtab qo'yar, o'zim ham mayor bilan maza qilib gaplashardim. Bir kuni men unga italyan tili jundayam oson ekanligini, bu tilni o'rganish menga ortiqcha qiyinchilik tug'dirmasligini aytdim, chindan ham, italyanchada barcha so'zlarni talaffuz qilish oppa-oson edi.

– Ha, albatta, – deb gapimni ma'qullab qo'ydi mayor ham. So'ngra, – ammo sen italyan grammatikasini o'rganishga urinib ko'rsang, yanada

yaxshi bo'lardi, – deb qo'shib qo'ydi. Shundan keyin biz grammatika o'rganishni boshlab yubordik va tezda men mayorga o'sha kungi aytgan gapimdan darrov qaytdim, to grammatik qonun-qoidalarni miyamga yaxshilab joylab olgunimcha mayor bilan italyanchalab gaplasholmay yuragimni hovuchlab yurdim.

Mayor gospitalga har kuni kanda qilmay kelib turardi. Uning biror kun ham kelmay qolganini eslay olmayman va shuni ochiq-oydin bilardimki, uning eng yomon ko'rgani nogironlar aravachasi edi. Bizning ham ularni ko'rishga ko'zimiz yo'q, ba'zan jirkanib ketardik, biroq vaqt o'tgani sayin mayorning o'zi bunga ko'p ham e'tibor bermaslikni maslahat berardi. Aravachalar hali yap-yangi bo'lib, uni birinchi bo'lib biz ishlatayotgandik. Qanchalar ahmoqona gap bo'lmasin, mayor buni „Nogironlik nazariyasi“ deb atar edi. Men esa hali ham grammatikani yaxshi o'rgana olmagan, buning uchun qattiqqo'l mayorimiz meni g'irt savodsizga chiqarib qo'yardi, shunday bo'lishiga qaramay, u baribir men bilan o'tirib olib, anchagina asabi chiqib, toqat qilib dars o'tar edi. Mayor jussasi jimitdakkina erkak bo'lib, doimo tik holatda o'tirar, o'ng qo'li bilan aravachasining tutqichidan ushlab devor tepasiga to'g'ri tikilib turardi. Yarador qo'li ilib qo'yilgan osma tasmlar orasidan karaxt bo'lib chiqib turardi. Bir kuni u mendan:

– Peshanamizga biror baxtli kun bitilib, bu do'zaxi urush tugab qolsa, sen nima qilmoqchisan? – deb so'rab qoldi. – Faqat grammatikani buzmay to'g'ri javob ber!

– Shtatlarga qaytib ketmoqchiman, – dedim.

– Uylanganmisan?

– Yo‘q, endi uylanaman.

– Sen, hammang g‘irt ahmoqsanlar! – deb o‘s-h-qirib ketdi mayor birdan. Negadir uning g‘azabi juda qo‘zib ketgandi. – Erkak aslo uylanmasligi kerak!

– Nima uchun, senyor Maggore? – deb so‘radim men hayron bo‘lib.

– Meni senyor Maggore, dema! – mayor hali ham g‘azab ichida kuyib-yonardi.

– Nega erkak kishi uylanmasligi kerak ekan? – deb so‘radim men yana.

– U uylanolmaydi. Yo‘q, uylanolmaydi u, – dedi mayor battar jahli chiqib. – Agar u bor narsasini yo‘qotishni istamasa, u holda o‘zini o‘zi bunday sho‘rpeshana ko‘yga solmasligi kerak. Hayotda erkak kishi faqat yo‘qotmaydigan narsalarni to-pishi kerak!

Mayor g‘oyatda alam bilan, adoqsiz hasrat bilan so‘zlar, gapirayotgan paytda osmonga bir muddat tikilib qolar edi.

– Lekin nima sababdan u topgan narsasini yo‘qotishi mumkin? – dedim men qiziqsinib.

– U baribir yo‘qotadi, – dedi mayor endi ma'yus bo‘lib qolib. U negadir menga emas, devorga qarab so‘zlar edi. Keyin u aravachasiga ko‘z tash-ladi-da, tasma orasiga ilib qo‘yilgan yarador qo‘li bilan tutqichga zarb bilan bir tushirdi, jarohat-langan qo‘li popillab tushib, mayorning soniga tars etib urildi.

– U baribir yo‘qotadi! – deb qichqirdi u yana. – Bo‘ldi, bas qil! Men bilan tortishaverma!

Mayor shunday dedi-yu, nariroqda yurgan aravachalarni boshqaruvchi xizmatchiga qarab baqirdi:

– Kelib, mana bu la'natni matohni hayda!

Bechora mayor titrab-qaqshagancha, muolaja oladigan xonaga kirib ketdi. Keyin men uni doktordan telefonini berib turishini so'rab, eshikni yopib qo'yanini eshitib turdim. Birozdan so'ng mayor qaytib kelganida men boshqa aravachada o'tirar edim. U boshiga qadrdon kepkasini kiyib olgandi. To'g'ri mening yonimga keldi-da, yelkamga do'stona qo'l tashladi.

– Kechir meni, – dedi u yelkamga sog' qo'li bilan qoqib qo'yarkan, – senga qo'pol gapirmasligim kerak edi. Bilasanmi, yaqindagina mening xotinim vafot etdi. Shuning uchun sen meni kechirishing kerak, tushunyapsanmi meni?

– Eh! – dedim men chin dildan mayorga achnib. – Juda taassufdaman!

Mayor pastki labini tishlagancha g'amboda va ma'yus o'tirar edi.

– Bilasanmi, – dedi u birozdan keyin, – bilasanmi, bu judayam-judayam og'ir azob bo'lar ekan! Men taqdirga hech tan berolmayapman!

Mayorning ovozida chuqur g'ussa va dard mujassam edi. U mendan ko'zlarini olib qochib, devara tarafga boqdi. U yig'layotgan edi.

– Sirayam bardoshim yetmayapti, men o'z taqdirimga ko'nolmayapman! – dedi u nafasi qisib. Shu so'zlarni aytarkan, mayorning ko'zlaridan yosh dumalab tushar, o'zini harbiychasiga tik tutib, adil o'tirgan bo'lsa ham, atrofdagi hech narsani ko'rmas va payqamas, yonoqlariga yosh-

lari tomgancha, hamon pastki lablarini tishlagan ko‘yi asta yonimizdan o‘tdi-da, tashqariga chiqib ketib qoldi.

Keyinroq doktor menga mayorning yosh va ko‘hlikkina xotini zotiljam bo‘lib, bexos qazo qilganini aytib berdi. Baxtiqaro mayor suyukli ayoliga to o‘zi butunlay nogiron bo‘lib qolgunga qadar uylanolmasdan, urushma-urush, sarson-sargardon bo‘lib yuravergan ekan. Uning xotini bor-yo‘gi ikki-uch kungina biroz mazasi bo‘lmay yotibdi-yu joni uzilibdi. Ayolning bunday kutilmagan-da olamdan o‘tib qolishini hech kim xayoliga ham keltirmagan ekan.

Mayor uch kun gospitalga kelmadi. Keyin u yana o‘sha odatiy keladigan soatida, faqat harbiy formasini egniga kiyib olgan holda aravachasida kirib keldi. U qaytgan paytda devorlarda katta-katta chorcho‘pga solingan suratlar hali ham osilib turar, ular tuzatilgan va tuzatilmagan jarohatlarning har xil suratlari edi. Ilgarilari mayor xuddi o‘zining qo‘liga o‘xshab ketadigan uchta rasm qarshisida turib olgancha, soatlab tomosha qilardi. O‘sha suratlarni doktor qayerdan topib kelganini men aniq bilmasdum-u, biroq yangi nogironlar aravachasiga birinchi bo‘lib o‘tirgan kishilar biz ekanligimizni yaxshiroq anglardim. Lekin endi bechora mayorga bu suratlarning ko‘p ham ahamiyati qolmagan, u har oqshom derazadan tashqariga uzoq-uzoq tikilar va mahzun xotiralariga cho‘mgancha chorasiz o‘tirar edi.

Qandilat YUSUPOVA tarjimasi

O'KINCH

Mamzele Aureliya to'ladan kelgan, yonoqlari qip-qizil, sochlari endi-endi oqara boshlagan, ko'z-lari atrofga hamma vaqt sinchkovlik bilan boqadigan o'rta yoshlardagi erkakshoda bir ayol edi. U, odatda, boshiga ferma erkaklari kiyadigan shlyapa kiyib yurar, sovuq kunlari egniga unni-qib ketgan moviy yomg'irpo'sh bilan oyoqlariga zil-zambil kirza etiklarini ilib olardi.

Mamzele Aureliya umri bino bo'lib, turmushga chiqish borasida sira bosh qotirib ko'rmagan edi. Bu ayol butun hayoti mobaynida hatto sevib ham qolmagandi. Bir paytlar, yigirma yoshlik avji durkun chog'larida uning ham qo'lini so'rab kelishgan, ammo-lekin Aureliya o'sha zahotiyoy bu taklifni keskin rad etgandi, shunga qaramay, mana hozir yoshi ellikka yaqinlashib qolgan bo'lsa-da, Mamzele Aureliya bir o'zi yolg'iz yashab kelayotganidan zig'ircha ham afsuslanmas edi.

Peshanani qarangki, bu g'aroyib ayol shunday keng, katta olamda yolg'iz o'zi yashab kelayotgandi, albatta. Mamzele Aureliyaning sodiq iti Ponto va ekinzorlarida mehnat qiladigan negrlar-u bir-ikkita sigir, bir juft xachir, turli-tuman darranda-yu parrandalar hamda ayolning qo'shotar miltig'ini (bu qurolni u jo'jalariga xavf

soluvchi qirg‘ylar uchun ishlatar edi) hisobga ol-maganda, Aureliya butunlay so‘qqabosh edi, balki, shu yolg‘izligi sababdanmi, ayol Xudoga qat-tiq bog‘lanib qolgandi, tun-u kun ibodatini hech kanda qilmasdi.

Bir kuni ertalab osmonda to‘satdan paydo bo‘lib qolgan qora bulutlar kabi bir to‘p bolalarning uyi tomon yopirilib kelayotganiga Mamzele Aureliyaning ko‘zi tushib qoldi. Chaqirilmagan bu meh-monlaridan ayolning ko‘ngli biroz xijil tortdi. Bolalar Aureliyaning yon qo‘slnisi Odeliyaga tegishli edi. Lekin, ochig‘ini aytganda, bu so‘qqabosh ayol shu paytgacha qo‘slnilarining hatto birortasi bilan ham u qadar inoq bo‘lib ketmagan edi.

Oradan besh daqiqa o‘tar-o‘tmas, bolalari ortidan yosh juvon Odeliyaning o‘zi ham ko‘rindi. U bir qo‘lida jazzi qizalog‘i Elodiyani ko‘tarib olgan, bir qo‘li bilan esa endigina yura boshlagan Tinommini bazo‘r yetaklab olgancha qoqlib-suqilib kelar, uning orqasidan katta qizlari Marelina bilan Mar-seletta ham shoshilgancha ergashib kelishardi.

Odeliyaning yuzlari hadeb yig‘layverganidan qizarib, shishib ketgandi. Gap shundaki, juvoning olis shaharda yashovchi onasi og‘ir xastalanib qolib, qizini huzuriga chaqirtirgandi. Baxtga qarshi juvonning eri ham yonida emas – Texasga ketib qolgandi. Texas esa Odeliyaga dunyoning bir chekkasiday juda uzoq joy bo‘lib ko‘rinardi, ustiga ustak ayni chog‘da yollangan haydovchi Valsin ham stansiyada ayolning yo‘liga ko‘z tutib o‘tirar edi.

– Bilaman, Mamzele Aureliya, ishingiz bir dunyo, boshingizdan oshib yotibdi, biroq bu zum-

rashalarni sizdan boshqa kimga ham ishonib topshira olardim. O'tinaman, yo'q demang, to men qaytib kelguncha bolalarimga ko'z-qulqoq bo'lib tursangiz. Yo'q-yo'q, o'tirmayman, ovora bo'lmaning, meni stansiyada kutishyapti. Mamzele Aureliya, tushuning, boshqa choram yo'q! Men uchun bir savob ish qiling, iltimos, kelib sizni, albatta, rozi qilaman. Bir o'zim shuncha bolani yo'lda eplab olib ketolmayman. Axir, uzoq yo'lda bu bolalar odamni aqldan ozdirishi turgan gap. Aksiga olib erimning ham uyda emasligini ko'rmasizmi. Xudo ko'rsatmasin, ishqilib, men uymalanib yetib bor-gunimcha onayizorimning joni uzilib qolmasin-da, ilohim! – chindan ham favqulodda mushkul vaziyat Odeliyaning aqlini shoshirib qo'ygan, juvonning boshi qotib qolgandi. U hatto nima deb, nima qilayotganini ham tuzukroq idrok etolmas edi.

Juvon yalina-yalina baribir bolalarini Mamzele Aureliyaning uyi ostonasida qoldirgancha shoshib jo'nab ketdi. Bolalar esa quyosh kuydirayotgan, jajji jo'jalar oyoqlari bilan o't-maysalarni bemalol titkilab yurishgan hovli o'rtasida egasiz, bir o'zlar shumshayib qolishdi, lekin ko'p vaqt o'tmay biri tortina-tortina, biri bo'lsa behadik, zipillagancha zina bo'ylab orqama-ketin ko'tarila boshlashdi. Shu damda havoda moychechaklarning ajib ifori bo'y taratar, uzoq-uzoqlardagi paxta dalalari osha ishchi negrlarning quvnoq kulgilari sadosi jaranglab kelmoqda edi.

Mamzele Aureliya bolakaylarga o'zining norozi va sinchkov ko'zlarini qadagancha serrayib turib qoldi. U bo'mbaloq Elodiyaning og'irligidan

bukchayib olgancha gandiraklab qadam bosayotgan Marselinaga xushlamaygina ko'z qirini tashlab qo'ydi. Shu onning o'zida onasini so'rayverib xarxasha qilayotgan Tinommini tinchlantirishga urinayotgan Marselettani ham bu sovuq nigohidan bebahra qo'ymadni. Ikki-uch lahzalik shunday do'q-po'pisalaridan keyin Mamzele Aureliya biroz ko'nglini bo'shatib oldi-da, noiloj o'zini qo'lga olib, endi qilishi majburiy bo'lgan ishlarining rejasini o'zicha tuzib chiqdi. Ayol dastlabki ishini to'polonchilarning qornini to'yg'azishdan boshladi.

Basharti bu bolalar Mamzele Aureliyaning qo'l ostida ish haqi olib, mehnat qilayotgan negrlar qabilida bo'lishganda bormidi, ayol o'sha vaqtning o'zidayoq bu shumtakalarni bir zumda haydab yuborgan bo'lar edi. Ammo sho'rlik Odeliyaning oh-u zorlari uning bu qarorini qat'iy cheklab turardi. Biroq baribir, bola boqish hazil ish emasda, axir bolalar kichkina cho'chqa bolalari emasku, ular hamma vaqt e'tibor talab qilib, odamdan astoydil mehr kutishadi. Bu murakkab vazifa esa bu kabi yumushlarga butkul noshud bo'lgan Mamzele Aureliyaning aslo qo'lidan kelmas edi. Umrida shunday qaltis vaziyatga tushib qolishini esa ayol hatto tushida ham ko'rmagandi.

Shuning uchun birinchi kunlari Odeliyaning polaponlariga g'amxo'rlik ko'rsatishda, rosti, Mamzele Aureliya anchagina adabini yedi. Axir, u jonsarak Marselettani baland va buyruqomuz ohangda gap eshitishi bilan darrov yig'lab yuborishini qayerdan ham bilsin? Yosh Marselettaning tabiat shunaqa ekan-da! Mamzele Aureliya kichkintoy Tinommining ham gullarga ishqilari baland

ekanligini aniqlab oldi, kichkina bezori to gullarni bandidan uzib, bog'dagi jami sara chechaklarni payhon qilmaguncha ko'ngli hech joyiga tushmas ekan.

– Unga hech qaysi tanbebingiz kor qilmaydi, Mamzele Aureliya, – deya ayolga yo'l ko'rsatdi Marselina, – yaxshisi, siz uni stulga bog'lab qo'ying. Oyim hamisha Tinommining aqlini shu tarzda kiritib qo'yardilar. Mamzele Aureliya bezori Tinommini bog'lab qo'yan stul kenggina va qulaygina ekan chog'i, kichkintoy unda bir zumda pinakka ketib qoldi, nihoyat, Mamzele Aureliya to'polonchilardan birini shu yo'sinda tinchitdi.

Oqshom kirishi bilan ayol xuddi jo'jalarni ini-ga haydab kirayotgan kabi bolakaylarning barini birma-bir joy-joylariga yotishlarini buyurdi, bi-roq kichkintoylar Mamzele Aureliyaning qarshisida kalovlangancha turib qolishdi. Axir, ularning momiqqina yostiqlari ustiga har kech taxt qilib qo'yiladigan tungi ko'ylaklari qayerda qoldi, buning o'rниga ular nima uchun xuddi ho'kiz qam-chisiday og'ir qo'l bilan ketlariga niqtalganlaricha yotoqlariga haydalishlari kerak? Har kech polning o'rtasiga ularning toliqqan, quyoshda toblanib, chang-chung bo'lib ketgan oyoqlarini yuvib olishlari uchun keltirib qo'yiladigan suv to'la jom-chi, u qayerda qoldi? Shu tobda qizaloqlar Marselina bilan Marselettaning kulgisini qistatgan narsa, Mamzele Aureliyaning shumtaka Tinommini uxalta olmay toza xunob bo'lib qiyinalgani bo'ldi. Axir, ayol bu yosh qaroqchiga Krok-mitan yoki bo'lmasa Lup-garu to'g'risidagi ertaklar aytilmagunicha u xlabel ololmasligini qayoqdan ham bilsin, yana

kenjatoy Elodiya ham alla eshitib, tebratmagunlaricha ko'z yumishi o'lguday qiyin ekanligini ayol bechora, nihoyat, arang tushunib yetdi.

– Yaxshigina tavbamga tayanib qoldim, Rubi xola, – deya iqror bo'ldi Mamzele Aureliya o'z osh-paziga yorilib, – men uchun bu bolalarga qarashdan ko'ra o'nlab plantatsiyalarni boshqarish osor-roq ekan. Axir, bu dahshat-ku! Jonim hiqildog'imga keldi! Endi menga hech qachon bola to'g'risida og'iz ocha ko'rmanq!

– Oh, Mamzele Aureliya-yey, bu olamda bolalar-dan-da beg'uborroq zot topa olsangiz koshki edi. Axir, bolalar bilan birga maza qilib o'ynash kat-talar bilan muomala qilishdan ko'ra yoqimliroq emasmi? Menimcha, sizga ularning tilini topib olish mushkullik qilyapti. Bora-bora bolalar bilan qanday chiqishib ketganingizni o'zingiz ham sezmay qolasiz.

Shubhasiz, Mamzele Aureliya Rubi xolaning gaplariga o'sha zahotiyooq qo'shila qolmadi, buni qarang-a, to'rt beshta to'polonchi bilan ikki kunda til topishib bo'larmidi? Axir, bu Mamzele Aureliyaday ayol uchun benihoyat murakkab vazifa-ku! Zarurat tufayligina onasining ikki-uch nayrangini o'zlashtirib organiga ham Mamzele Aureliya Xudo-ga behisob shukronalar keltirardi.

Lekin baribir Rubi xola haq bo'lib chiqdi: Mamzele Aureliya asta-sekin bariga ko'nikib qoldi. U kichkina bezori Tinommining hamma vaqt shira bo'lib yuradigan qo'llari uchun umrida hech tutmaydigan oppoq peshbandini tutib oladigan bo'ldi, hattoki to'polonchining mehr va tashakkur ifodasi sifatida chopqillab kelib cho'lp-cho'lp qilib

o'pishlariga ham o'rganib qoldi. Ne-ne zamonlaridan beri shkaf tepasida qo'l tegmay, chang bosib yotgan igna-ip solingan savatcha ham joyidan qo'zg'aldi, endi Mamzele Aureliya yirtilgan kiyimlar-u tugmasiz kamzullarni butlab qo'yish uchun qo'liga hattoki igna olishgacha majbur bo'ldi. Ammo ayolning eng qiyngagan joyi butun kun mobaynida bir nafas ham tinmaydigan qattiq baqirig'-u chinqiriqlar, uyning u burchagidan bu burchagigacha aks-sado berib, to qorong'i kech-gacha tugamaydigan shovqin-suronlar bo'ldi. Lekin kechalari ham Mamzele Aureliya bahuzur uxlay ololmas edi, negaki kichkina Elodiyaning issiqliqna bo'mbaloq tanasi ayolga mahkam yopishib yotar, kenjatoyning o'tday nafasi Mamzele Aureliyaning yonoqlariga go'yo jajji qushning qanotlariday mayin urilib turardi.

Oradan ikki hafta o'tar-o'tmay Mamzele Aureliya axiri bu g'alvalarning bariga ko'nikib qoldi, endi u ortiq nolimay ham qo'ydi.

Bir oqshom ayvonga qandaydir yumush bilan chiqqan Mamzele Aureliya ko'cha tuyulishida uyi tomonga qayrilayotgan Valsinning tanish ko'k mashinasini ko'rib qoldi. Haydovchining yonida ko'zlarini sog'inchdan porlagan Odeliyaning intizor chehrasi aks etdi. Ular uygaga tobora yaqinlashgancha sari Mamzele Aureliya yosh juvonning quvonchdan yorishib ketgan yuzlaridan uning uygaga qaytib kelganidan behad xushbaxt ekanligini yurak-yuragidan his etdi.

Shundayku-ya, biroq bu aytilmagan va kutilmagan tashrif Mamzele Aureliyaning qalbiga ulkan qayg'u toshini bir onning o'zida bostirib

qo'ydi. U darhol bolalarni to'plab berishi lozim edi. Ah, bu zumrasha Tinommi qayoqda qoldiykin-a? E-ha, bu shumtaka bo'lsa-bo'lmasa, og'ilxonada pichoq o'ynab o'tirgan bo'lishi kerak. Xo'sh, qizaloqlar – Marselina bilan Marseletta-chi, ular qayerda qolishdi? Uyning biror burchagida qo'g'irchoqlariga ko'ylak bichib, ularni yasantirish bilan mashg'ul bo'lsalar kerak-da. Birgina kenjatoy Elodiyadangina tashvish qilmasa bo'lardi, negaki go'dak Mamzele Aureliyaning qo'llarida hech narsa bilan ishi yo'q, o'zi bilan o'zi o'ynab yotardi, ammo u onasini olib ketgan haydovchi Valsinning qadrdon mashinasi chiroqlarini ko'rib qolishi bilan sevinganidan birdan qattiq qichqirib yubordi.

Nihoyat, hamma to's-to'polon tinchiydigan bo'ldi, ana endi bolakaylar o'z uylariga butunlay qaytib ketishadi. E-voh, ular buncha tez ketib qolishmasa! Axir, kelganlariga uncha ko'p bo'lgani yo'q-ku! Mamzele Aureliya peshayvon o'rtasida turgancha negadir ich-ichidan yopirilib kelayotgan o'kinch to'la nidoga arang dosh bergancha jimgina turib qoldi. U hatto mashinaning qanday kelib, bolalarni qanday olib ketganini ham sezmay qoldi. Butun atrof-javonibdag'i dalalar uzra qip-qizil shafaq shu'lalari ila g'ira-shira shom ko'lankasi cho'kib borar, go'yo mana shu tevarak olam ham bu qorong'ilik ichiga tamomila qorishib ketayotganday bo'lardi. Jami borliq uzra yoyilib borayotgan qirmizi tuman ichida ayolning nigohi ortiq hech narsani ilg'amay qoldi. Uning qulqlari hattoki mashina g'ildiraklarining qulqoni qomatga keltirguday o'tkir chirqirashini-da eshit-

madi. Uning qulqlariga kichkintoy bezorilarning shodon, yangroq ovozlari qattiq o'rnashib qolgandi.

Mamzele Aureliya ohista xo'rsingancha uygakirib ketdi. Ichkarida uni bir dunyo yumush kutib turardi, bolakaylar butun uyni ostin-ustun qilib yuborishgan, hamma yoq parokanda bo'lib to'zg'ib yotardi, ammo xonalarni tartibga solishga ayolning qo'li darrov bormadi. U stol oldiga xomush cho'kdi. Yana bir o'zi yolg'iz qolgan jussasini qurshagancha tashqaridan o'rmalab kirib kelayotgan tun rutubati chulg'agan sovuq xonasi ichiga ma'yus bir nigoh tashladi. So'qqabosh ayol boshini qo'llari ustiga qo'ydi-da, ich-ichidan otolib kelayotgan so'zsiz faryodlarga ortiq bardosh berolmay, oxiri yig'lab yubordi. Ha, Mamzele Aureliya yig'layotgan edi! Lekin uning yig'isi hamma ayollarnikiday yumshoq, mayin yig'iga o'xshamasdi. Mamzele Aureliya xuddi erkak kishiday, butun yuragini pora-pora qilib yuborguday nola bilan o'kirib-o'kirib yig'lardi. U hatto iti Ponto kelib, qo'llarini yalayotganini ham sezmas edi.

Qandilat YUSUPOVA tarjimasi

KEKSALIK

U munkayib qolgan bir chol edi, kichkinagina Kentukki shaharchasidagi temiryo'l zinalari ustida erta tongdan to qosh qorayguncha o'tiraverardi.

Shu yerga, aftidan, sayyoh bo'lib kelgan, ustboshlari bashang qandaydir begona kishi cholning ro'parasiga kelib turib qoldi.

Qariya unga tortinibgina kulimsirab qo'ydi.

Cholning tabassumi xuddi yosh bolanikiga o'xshardi. Yuzi tirishib, bujmayib ketgan, kartoshkaday dag'al burni bo'lsa aftida xunuk qaqqayib turardi.

– Nima bo'ldi, birodar, birorta kasallik sizni bezovta qilyaptimi, deyman? Aytaylik, yo'taldanmi, shamollahdan, sil yoki qon yo'qotadigan boshqa bir kasallikdan qiyalyapsizmi? – deb so'radi u. Cholning ovozida yurakni sirqiratib yuboradigan yalinchoqlik ohangi zohir edi.

Notanish kishi boshini tebratib:

– Yo'q, – degan bo'ldi. Qariya birpas sukut saqladi-da, keyin inqillagancha o'rnidan turib, bazo'r qaddini rostladi.

– Ha, qon yo'qotadigan kasallik juda yomon-da, – deb qo'ydi u o'zicha. Shundan so'ng oqarib ketgan tilini sun'iy tishlari orasidan chiqardi-da, negadir bir aylantirib qo'ydi. To'satdan titroq qo'lli-

ni begona kishining qo'li ustiga qo'ydi-yu, bexos kulib yubordi.

– Sira tashvishlanmang, azizim, – deb xitob qildi so'ngra u. – Men hamma kasalingizni davolayman – yo'tal deysizmi, shamollashingiz bormi, hatto sil yoki bo'lmasa, qon ketadigan og'riqlaringizgacha – bari-bariga shifo topib beraman. Men hatto qo'ldagi so'gallarni ham yulib tashlay olaman. Eh, attang, hozir buni qanday qilib bajarishimni sizga tushuntirib berolmayman-da. Yaxshisi, bu sir bo'lib qolaversin. Eng asosiysi, men qilgan mehnatimga bir tiyin ham pul olmayman. Darvoqe, mening ismim Tom. Taklifim sizga ma'qul keldimi o'zi?

Begona odamning chehrasi yorishdi. U do'stona jilmaygancha, bosh irg'ab, cholning gapini tasdiqlagan bo'ldi. Shu tobda qariyaning hardam-xayolligi qo'zib, birdan almoyi-aljoyi gaplarini aytib, aljiray boshladи.

– Mening otam o'lguday qattiqxo'l odam bo'lgandi, – deya hikoyasini boshlab ketdi chol. – U menga o'xshab ketardi, aynan kasb-korimiz jihatidan, ya'ni otam ham menday temirchi bo'lib o'tgandi, ammo otamning boshida hamma vaqt bo'yradan qilingan shlyapasi bo'lardi. Daladagi makkajo'xori mo'l hosil bergen yillari u, albatta, bechora kambag'allarga xayr-ehson qilar, dalaga borib, qorningizga keragicha dondan olavering-lar, deb himmat ko'rsatardi, ammo urush davrida donning bir bushel¹i uchun besh dollardan to'lab, o'zi qurib qoldi.

¹ *Bushel* – Amerika o'lchov birligi.

Men otamning aytganiga ko'nmay, o'zim topgan qizga uylangandim. Bechora oldimga kelib, yuzimga ochiq-oydin aytgan edi-ya: „Tom, uylanadigan qizing menga sira yoqmadi“. „Sizga yoqmasa yoqmas, biroq men uni sevaman“, – deb javob bergandim unga. „U menga baribir yoqmaydi“, – deb yana ta'kidlab qo'ygandi otam.

O'shanda ota-bola yog'och xoda ustiga o'tirib olib, allamahalgacha gaplashgan edik. Ha, otam ajoyib odam edi-da, bo'yradan qilingan shlyapsini ham hech boshidan olmasdi. „Mana ko'rasiz, men to'yimizga taklifnomा olib kelaman“, – deb turib olgandim o'shanda. „Endi mendan sariq chaqa ham ololmaysan“, – degancha norozi bo'lib qolgandi otam bechora.

To'yim menga yigirma bir dollarga tushgandi. Shu pulni topaman deb, jo'xori dalasida ancha ter to'kkandim – ustidan chelaklab yomg'ir quyib tursa ham, hatto otlarim tumanda hech narsani ko'rmay qolgan sovuq kunlarda ham, hech narsaga qaramay, jon-jahdim bilan mehnat qilavergandim. Turmush quradiganlarni ro'yxatdan o'tkazuvchi xodimning bergen savoli: „Yoshingiz yigirma birdan oshganmi o'zi?“ – deb so'rash bo'lgandi, xolos. Men ham, xotinim ham: „Ha“, – deb javob bergandik. Tentakligimizni qarang, o'sha kunni tuflilarimiz ustiga bo'r bilan yozib qo'yibmiz. Otam allaqachon barini hal qilib bo'lgandi: „To'rt tomoning qibla“, – dedi-yu, boshqa gapirmay ketdi, uning oxirgi gapi ham shu bo'lgandi. Cho'ntagimizda bir mirimiz yo'q, rosa abgor bo'lgandik. Orziqib kutgan to'yim peshana terim bilan topgan yigirma bir dollarga tushdi.

Xotinin bo'lsa biz hech qancha yashamasdan in-damay o'lib ketaverdi...

Qariya gapdan to'xtab, xo'rsingancha osmon-ga tikilib qoldi. Qosh qoraya boshlagan palla edi, quyosh ufq tomon bosh qo'yishga chog'lanayot-gandi. Butun samo kir bulutlar bilan ola-bu-la bo'lib ko'rinaridi. „Bir paytlar chiroyli-chiroyli rasmlar chizardim-a, ha-ya, ularni bir-ikki marta namoyish ham qilganman“, – deb qo'shib qo'ydi chol xomush tortib.

– Bittagina akam bor edi, hozir qamoqda yotib-di. Avvallari o'zimcha qiziqib, akkordeon ham cha-lib turardim. Xuddi siz kabi, o'ttiz yetti yoshimda bo'lsa kerak. Bir marta qamoqda, akamning yoni-da ham o'tirib chiqqanman. Hurpaygan sochlari bilan ham akam baribir yoqimtoy bo'lib ko'rina-verardi. „Albert, – degandim unga, – Albert, odam o'ldirib qo'yaning uchun ich-ichingdan ezilayot-gan bo'lsang kerak?“ „Aslo, – degandi u. – Zig'ir-cha ham afsus qilmayman. Bir emas, o'nta, yuzta, hatto mingta odamni ham hech kiprik qoqmay, o'ldirib ketaveraman!“

Shu yerga kelganda cholning ko'ngli buzilib, yig'lay boshladi, cho'ntagidan kir ro'molchasini olib, qaltirayotgan qo'llarini sekin artgan bo'ldi. Bir dona tamakisini so'rib kayf qilmoqchi bo'lgan-di, sun'iy tishlari o'rnidan siljib, joyidan butunlay ko'chib tushdi. Chol darrov titrayotgan qo'llari bi-lan og'zini yopdi-da, yanada uyalib ketdi.

– Ha, men endi qarib qoldim. Mana siz bo'lsa, boshqa dunyosiz, yoshsiz, nari borsa, o'ttiz yetti-ga kirgandirsiz-da, lekin men yoshimning ancha-sini yashab bo'ldim, – deb pichirladi chol. – Akam

yomon odam edi – o'lguday ichi qora edi – yuzi chiroyli, sochlari yarashib turgan bo'lsa ham, o'zi tinmay odam o'ldiraverishdan zavq olaverardi. Men keksalikdan nafratlanaman, qarib qolganimdan o'zim uyalib ketaman. Qarilikni Xudo nari qilsin!.. Shuning uchun ham yaqinda ketvorgan bir xotin oldim. Buni qarang, unga to'rt dona maktub yozib jo'natgandim, yopiray, hammasiga javob qaytarsa bo'ladimi! Axiri, bu yerga kelgach, turmush qurib oldik, oh, oh, uning yurishini bir ko'rsangiz edi. Men xotinimga ajoyib liboslar olib berdim. Lekin oyog'i to'g'ri emas-da, qurib ketgur, oyoqlari qiyshayib yotibdi, oh, attang, ming qilsa ham, birinchi xotinim beba ho ekan, ishonasizmi, barmoqlarim bilan qo'llaridagi so'galni shartta yilib olsam ham, biror tomchi qon chiqmasdi, shu sabab bo'lganmi, har holda o'z-o'zimdan yo'talmi, shamollahshmi, sil yo qon yo'qotadigan boshqa kassalliklarni ham qo'rqlay davolab ketaveraman. Eshitgan, uqqanlar bo'lsa, menga darhol xat yozib yuborsin. Hammasiga javob beraman. Bordi-yu, ular bir tiyin ham pul jo'natmasa, buning ham zarari yo'q, qari cholga pulning nima keragi bor?

Chol yana hiqillay boshladi, notanish sayyoh bechora qariyani yupataman, deb ancha urindi. „Axir, baxtlimisiz?“ – nihoyat, bir taskin so'z topganday so'radi u.

– Bo'lmasam-chi, – dedi qariya ancha dadillanib, lekin ko'p o'tmay tag'in aljiray ketdi: – men yana yaxshi odamman. Istagan yeringizga borib, men haqimda bemalol so'rayvering, ismim Tom, temirchi Tomman men. Xotinimning oyog'i qiyshiq bo'lsa ham, qadamini tovusday xirom bilan bosa-

di. Men xotinimga uzun ko'ylak olib berdim, mana buncha. Ayolim endigina o'ttizga chiqdi, men esa yetmish beshdaman. O'zi ham bir dunyo tuflisi bor-da xotinimning, hammasini men olib bergaman, lekin oyoqlari qiyshiq-da. Ha, mayli, endi tuflining to'g'ri yurdiradiganidan olib beraman.

Xotinim meni hech narsani bilmaydigan bir qari chol deb o'ylaydi. O'zi hamma meni Tom hech vaqoni bilmaydigan bir qariya-da, deb qat-tiq adashadi. Yaqindagina xotinimga etagi yerga tegadigan antiqa ko'ylak olib berdim. Ana shunaqa, meni Tom deydilar. Mening aqlim ham balo, temirchi Tomman men, yetmish beshga kir-gan bo'ssam, kirgandirman, ammo baribir unaqa munkillab qolgan emasman. Axir, bir tomchi ham qon oqizmasdan qo'ljadi so'gallarni yulib olaman-ku. Odamlar hech tortinmay xat jo'nataversin, men sira erinmayman, bariga javob qaytaravera-man, axir, bir tiyin ham so'ramayman-ku!

Qandilat YUSUPOVA tarjimasi

NURIDIYDAM

Yo‘q, bu mening gunohim emas. Hech kimning meni ayblastashga haqi yo‘q. Bu ishni o‘zim istab qilganim yo‘q, zotan, taqdirlar azal ro‘yobi yolg‘iz Parvardigor hukmi bilangina amalga oshadi. O‘sha dahshatli azob pallasi bir soat ham vaqtini olgani yo‘q, biroq men uchun u lahzalar go‘yo million yildan buyon davom etib kelayotgandek, o‘zim bamisol qop-qorong‘i tubsizlik qa‘riga cho‘kib ketdim-u, endi aslo bu yorug‘ olamga qaytib kelolmaydigandek bo‘lib tuyulaverdim. Ha, o‘sha soniyalar ichidayoq yuragim behad notinch, nimadir noto‘g‘ri ekanligini ich-ichimdan sezib turardim. Jonimni ming og‘riqqa qo‘ygan o‘sha jon parchamni oyoqlarim orasidan tortib olishganida, men qalbim bezovtaligi sababini yanada yaqqolroq anglab yetdim. Darhaqiqat, hayot menga judayam qo‘pol hazil qilgandi, endigina dunyoga kelib, hali o‘ziga kelmagan bu chaqaloq shu qadar qop-qora ediki, uni ko‘rib hushimdan ketib, aqldan ozayozdim. Xuddi tun zulmati singari zanji bu tana chindan ham o‘ta qora bo‘lib tug‘ilgan edi. Men benihoya hayronlikda qolgandim, dam unga qarab, dam o‘zimning oppoq tanimga qayta-qayta tikilib, ko‘zlarimga hech ham ishonolmasdim. Hayratlanarlisi shundaki, men ham, Lula Anna

(chaqaloqning ismini o'zimcha shunday deb atadim) otasining tanasi ham oq-sariqdan kelgan bo'lib, oilamiz uchun g'ayriodatiy ushbu rang biz uchun behad ajablanarli holat edi. Hattoki, mening butun urug'-aymog'im orasida birorta ham qora tanli odam bo'limgandi. Yanada ajablanarligi shuki, chaqaloqning sochlari juda ham g'alati, qandaydir yaltiroq, pirpirak va jingalak edi. U shu turishida misoli avstraliyalik yalang'och yuradigan qabila kishilariga o'xshab ketardi. Yo tavba! Shunaqasi ham bo'larkan-da! Balki, siz erimning yoki bo'lmasa butun yetti avlodimizda aynan shunday tusli qarindoshimiz bo'lgandir, deb o'y-larsiz? Yo'q. Bunaqa rangdagi inson zoti hech bir avlodimizda bo'limgan ekan. Siz mening buvimni ko'rganingizda edi – u sutga chayilgandek oppoq, xushbichim ayol bo'lgandi, umr bo'yи ana shu oqligi bilan faxrlanib yashagan va o'zi orzu qilgandek oq tanli erkakka turmushga chiqqan, hatto bolalarining rang-tusigacha qattiq qayg'urib, ularning asilzodalardek ko'rinishda bo'lishiga astoydil uringan ekan. Ammo, aslida, odam qanday rangda bo'lishining sira ahamiyati yoki ma'lum ma'nodagi bahosi yo'q. Inson Xudo bergen tusda tug'ilib, u bergen qismatga shak keltirmay, imoni bilan yashab o'tishi, hech qachon Parvardigorga nolish qilmasligi va hamisha oxiratdan qo'rqliki kerak. Qanchadan qancha o'ziga ishongan, ko'zi „ko'r“ bo'lgan kaslar qaysidir bir avlodida bo'lgan qora tanlilik belgisini jirkanch balo-qazoday umr bo'yи berkitib o'tadilar. O'zlarini mukammal darajadagi oliynasab avlod qilib ko'rsatishga harakat qiladilar. Holbuki, hammamiz ham Xudoyim

yaratgan bandalar emasmizmi? Juda-juda sanoqli odamlar, atigi yigirma foiz aholigina o‘z tanasi qoraliqi bilan oksinmas ekan. Har holda men shunday deb eshitganman. Ular uchun na irq va na darajaning ahamiyati bor. Ular hech nimaga parvo qilmaydilar. Onam ham dadam bilan nikohdan o‘tayotganlarida ibodatxonada ikki xil muqaddas kitobni ushlab qasam ichishgan ekan. Negaki ular boshqa-boshqa din vakillari bo‘lgan. Onam, aslida, nihoyatda xokisor ayol edi. U kibor bir xonadonda oqsoch bo‘lib ishlar, asilzoda oila a’zolari yeb-yemay chala tashlab ketgan ovqat qoldiqlarini isrof qilmay, kim uchundir atab olib qo‘yar, o‘z ishini benihoya halol bajarar, hatto uy egalari unga eng og‘ir yumushlarni buyurganda ham miq etmasdan yashab o‘tgandi. U faqat bir narsadangina minnatdor bo‘lib, xo‘jayinlari uning boshqa irq va dindan ekanligi bilan hech qiziqmasdi.

Balki, ba’zi birovlarining insonlarni rang-tusiga qarab ajratish jamiyatda u qadar jiddiy hol emas deb o‘ylarsiz, ammo, ming afsuski, shunday. Irq-chilik va tabaqlash jamiyatning hamma qatlamlarida: qo‘ni-qo‘sni chilik, mahalla-ko‘y, maktab, kasalxona, hatto ibodatxonalargacha chippa yopishib, avj olib borar, na ilojsi, ushbu tengsizlikka barham bera olishga qurbimiz yetmasdi. Bu jarayon shunchalar qaqshatqich hamda haqoratli ediki, hatto dorixonalarda ham qora tanli bilan oq tanliga ikki xil yo‘sinda muomala qilinardi. Oziq-ovqat do‘konlarida ham qoralarga past nazar bilan qarashar, mollarning narxini ham ataylab ko‘tarib aytishardi. Bularning bariga ko‘nmoqlikdan o‘zga chora yo‘q edi, negaki qora tanlilarning

shunday bo'lib yaralishda tirnoqchalik aybi bo'l-magani kabi, jamiyatdagi mavqelarini-da o'zgartirishga zig'irchalik qurblari yetmas edi.

Ana shular to'g'risida o'ylarkanman, yuragimni tobora najotsiz bir qayg'u ezar, go'yoki Xudoning qahriga qolgandek, peshanam sho'rligidan achchiq o'ksingancha zanjiday qora go'dagim ustida azob-lanib, ulkan g'am ichida nochor o'tirardim. Bechora ota-onam past tabaqadan bo'lgani uchun zamondan orqada qolmaslik ko'yida har qanday og'ir mehnatni boshdan kechirishdi. Onam tannoz xonimlar kiyadigan to'r shlyapa tikiladigan do'konda, dadam esa oliymaqom janoblarga mo'ljallangan oyoq kiyimlar sotiladigan do'konda ancha yillar ter to'kib ishladi. Ularning na unisi va na bunisi, muhtojlikda qolgan kunlarida ham oqsuyaklarga mute bo'lishmadi. Ha, ular tom ma'nodagi olivy-nob insonlar edi. O'z-o'zimdan behad jirkanib ket-sam-da, biroq onalik hissi butun a'zoyimni o'rab olib, chaqalog'im Lula Annaga dam mehr, dam hayajon, dam esa ko'nglim muzday sovigan holda termilib o'tirardim. Uning tanasi dastlab hamma yangi tug'ilgan go'daklarniki kabi och, rangsiz edi, keyin birdaniga katta tezlikda o'zgara boshladi. Shundoq ko'z o'ngimda bolam misoli afrikalik habashlar singari to'q ko'k tusga kirayotganini ko'rib, mislsiz dahshat ichida qoldim. Shu payt men bir lahzagina es-hushimni yo'qotdim, shuursiz alfov-da karavot ustidagi yopinchiqni sudrab tushirdim-da, qorayib-ko'karib yotgan chaqaloq yuzini qoplab, uni mahkam qilib bosib turmoqchi bo'l-dim. Ammo... Ammo negadir unday qilolmadim. Bilmadim, nega bunday bo'ldi?! Lekin men bari-

bir unday qilolmadim. O, men uning shu do'zaxi rangdan qutulishini shu qadar tilanib so'rardimki!.. Bu peshanasi sho'r bolam qismati ham aynan shu rangi tufayli zardobga to'la o'tishini xayolan tasavvur qilar kanman, yuragim shuvullab ketardi. Hatto men go'dagimni birorta yetimxonaga tashlab ketmoqchi ham bo'ldim. Biroq ibodatxona eshigi oldiga tashlab ketilgan, chirqillab yotgan chaqaloqlar yig'isi quloqlarim ostida qayta-qayta jaranglay-verdi. Yaqindagina germaniyalik yoshgina er-xotin egizak farzand ko'rgani, bolalarning biri tim qora, biri esa qorday oppoq ekanligini eshitib hayratda qolgandim. O'shanda buning sababini hech bir doktor tushuntirib berolmagandi. Lekin xuddi o'sha sirli holat o'z boshimga tushishini hatto tushimda ham ko'rmagandim. Shunchalar taqdirimdan yozg'irar edimki, hatto bolamning og'ziga ko'krak so'rg'ichimni-da solishni unutgandim. Uni uyga olib kelguncha shishadagi sut bilan oziqlantirib turdim.

Erim Luis oddiy bir qora hammol edi. Kasalxonadan qaytgan kunim u poyezd stansiyasidan horib-charchab keldi-yu, yuzimga xuddi devonaga qaragandek qilib tikildi, so'ng o'rab-chirmal-gan go'dakni xuddi o'zga sayyoradan kelgandek ajablanib kuzatib chiqdi. Luis tabiatan unaqa g'azablanib so'kinuvchi erkaklardan emasdi, lekin o'sha kuni u to'satdan qattiq jazavaga tushib: „Jin ursin! Bu qaysi iblisning bolasi bo'ldi?! Tezda ko'zimdan yo'qot buningni!“ – degancha ayyuhan-nos soldi. Men bilardim, ro'zg'orimiz o'zi tang sharoitda edi. Aksar tortishuvlarimizga ham aynan shu yo'qsillik sabab bo'layotgandi. Go'yoki og'ir

tavqi la'nat tamg'asi bosilgandek bo'lib tug'ilgan zanji bu go'dak Luis bilan mening uch yillik gulg'un turmushimizni bir zumda barbod qildi. Mening dilimni og'ritgan narsa – Luisda hech qanday otalik tuyg'usi yo'q edi. U misoli bag'ritosh odam kabi Lula Annaga tamomila begonasirab qarar, uni dahshatli bir dushmani kabi ko'rardi. Luis qizchamizni hattoki qo'liga ham olmadi. Men unga Xudoning zorini qildim, yalindim, ishontirishga urindim, menga ishon, bu bizning zurriyotimiz, begona erkak bilan o'ralashib esimni yebmanmi, deb harchand tushuntirsam ham u pinagini buzmadi. Luis bamisoli bir „o'lik“ edi. U jonsiz tanaday harakatsiz va ongsiz holda serraygancha turardi. Biz to'xtamasdan janjallahaverdik, janjallahaverdik, nihoyat men unga, balki bolaning qoraligi menikidan emas, aksincha, sening ajdodingdan o'tgandir, deb shartta aytdim. Ana shu bir luqmagina gap bilan u bizni bir umrga tark etdi. Keskin tarzda uydan chiqib ketdi-da, yashashi uchun arzonroq va qulayroq joy qidirgani ko'chaga otildi. Luisning ana shunday yuzsizlarcha qilgan harakatidan so'ng o'zimni darhol qo'lga oldim. Qizcham va o'zimni boqish uchun to'g'ri kelgan ishga unnab ketdim: boy xonadonlarda oqsochlik qildim, kirxonalarida ishladim, ko'cha supurdim. Lula Annaga qarash uchun bir o'spirin jiyanimni enaga qilib oldim. Ishdan kelgan kezlarimda qizchamni tashqariga olib chiqqani yuragim dov bermasdi, negaki uni aravachasiga solib ko'chalardan o'tayotgan paytimda odamlar aravaning pana pardasi ostiga nogoh ko'zları tushib, aftlarini bujmaytirar, qovoqlarini solib olgancha sovuq so'zlar aytib, yonimdan

o'tib ketishardi. Bu esa juda og'ir, butun qalbim tor-mor bo'lardi, biroq na chora?

Hali o'z bolam onalik mehri va parvarishiga muhtoj bo'lib turgan nozik bir damda uni uygatashlab, o'zim boshqalarning bolasi yonida girdikapalak bo'lib, enagalik qilish bilan band edim. Avvallari enagalarga tuzukkina haq to'lanar, ammo bechora bolam Lula Anna dunyoga kelgan yildan boshlab ularning oyligi anchagina pasayib ketgandi. Hamma vaqt ham boylarga duch kelgan oqsoch va enagalar yoqib ketavermasdi. Ammo men janob Lei kabi qo'li ochiq xo'jayinga ro'para kelganimdan behad omadli edim, u odatiy enagalar haqidan yetti-sakkiz dollar ko'proq haq to'lardi. Buning uchun ham Xudoyimga qayta va qayta shukronalar keltirardim.

Vaqt o'tib, Lula Annaning tili chiqishi bilanoq unga meni „oyi“ yoki „oyijon“ deb chaqirishi o'rninga „shirin opam“ deb aytishni o'rgatdim. Nega-ki mana shunisi bexatarroq edi. Uning tim qora va qalin lablaridan bolalarcha pok mehr bilan chiqqan „onajon!“ so'zi qanchalar totli bo'lmasin, odamlar oldida biroz xijolatli holat edi. Men hamon xavotir ichida yashardim. Lekin qizalog'im kundan kunga o'ziga xos chiroy kasb etib, tim qora tanasi ham borgan sari adil bo'lib o'smoqda edi.

Ikki yil shu tarzda o'tdi. Ammo bu o'tgan kunlarning men uchun nechog'liq og'ir, bir o'zi tashlab ketilgan ayolga tiriklik toshini ko'tarish qanchalar azobli ekanligini hatto bayon ham qilib berolmayman. Biroz vaqt o'tgach, Luisning vijdoni sal qiynaldi shekilli, u menga oyda bir martadan ozgina pul yuborib turadigan bo'ldi. Biroq men

izzat-nafsimni yerga urib, na undan pul so‘rab yalingan va na shikoyat qilib turli sud mahkama-liga qatnamagan edim. Luisning jo‘natib tura-digan ellik dollar puli bilan kasalxonadagi tungi ish maoshim men bilan Lula Annaning bir amal-lab kun o‘tkazishimizga har holda yetib turardi. Biroq boshqalar nazdida o‘ta xarob bo‘lib yasha-yotgandek edik. Ular topgan-tutganimizni sadaqa puli deb o‘ylashardi. Albatta, bu menga juda og‘ir botardi. Keyin-keyin odamlar xayr-sadaqa nomini beg‘araz yordam deb atay boshladilar, bunisi har holda biroz yengil eshitilardi. Biroq men atrofim-dagi hayot va kimsalar bilan zig‘ircha ham ishim yo‘q, faqat o‘zim bilan o‘zim ovora edim. Sirtdan bechoraga o‘xshab ko‘rinsam-da, aslida, behuda gap-so‘z qilayotganlardan ko‘ra ko‘proq pul to-pardim. O’shanday kishilar, ya’ni o‘zidan biroz g‘aribroq yashayotgan odamlar ustidan mag‘zava to‘kib, noo‘rin gap tarqatuvchi kimsalar ko‘zimga o‘ta-o‘ta pastkash bo‘lib ko‘rinardi. Ayniqsa, ular mendan ham ko‘ra Lula Annaga past nazar bilan qarashardi. Nazarlarida, u xuddi tashlab yubori-ladigan, hech kimga keragi yo‘q irkit hasharotday undan jirkanib ketishardi. Lekin men bora-bo-ra bularning hammasiga ko‘nikib qoldim. Ammo shunday bo‘lsa ham hamon hushyorlikni qo‘ldan boy bermasdim. Hamma vaqt ogoh va o‘z ishimga puxta edim. Ayniqsa, Lulani o‘sirishda o‘zimga nihoyatda talabchanlik qildim. Sababi, Lula An-naga, avvalo, boshqalar oldida og‘ir gunohi bor-day boshini hadeb yerga egavermasdan, hamisha o‘zini tik va baland tutishni, qiyinchilik ichida qolganda ortiqcha oh-voh qilmaslikni o‘rgatdim.

U ismini ko‘p bora o‘zgartirib ko‘rdi, biroq ism o‘zgarishi bilan uning tanasi oqarib qolmasdi. Qora tanli bo‘lib yashab o‘tish unga azaliy taqdir bo‘lib bitilgandi. Biroq bu mening gunohim emasdi.

E-ha, bir paytlar Lulaga yosh bolalik davrida haddan tashqari talabchan bo‘lgan, unga o‘ta yomon muomala qilgan vaqtlarim ham bo‘lgandi, men bularni hamma vaqt eslab yuraman. Ammo siz buni to‘g‘ri tushunishingiz kerak. Neki qilgan bo‘lsam, faqat uni o‘ylab, uni himoya qilish uchun, uni jon-dilimdan yaxshi ko‘rganim uchun qilgan edim. Lula hali bu chigal olamni to‘la idrok etolmasdi. U – qora tanli yosh qizaloq, bu hayotda million bora haq bo‘lib chiqsa ham, jamiyatning kuchli va shafqatsiz qo‘llarida ezg‘ilanib ketishi turgan gap edi. Bu holat bolalar bog‘chasidan to umrining oxirigacha mavjud ekanligini Lula hozircha bilmasdi. Uning beg‘ubor va pokiza qora tani oq tanli odamlarni cho‘chitishi yoki ularni kuldirishi, hatto uni mazax qilib, vijdonsizlarcha aldashlarini yosh bola aqliga sig‘dirolmasdi.

Bir kuni men xuddi Lula bilan barobar bo‘lgan, o‘n yoshlari atrofidagi qora tanli bitta qizchaning bir gala oq tanli bolalar tomonidan xo‘rlanib turgani ustidan chiqib qoldim. U o‘zini bu to‘dadan qanchalar himoya qilib, qochishga urinmasin, bolalarning goh unisi, goh bunisi bechora qizaloqni bir-biriga surib, tinmay niqtalashardi. Ular o‘sha damda sho‘rlik qizchaning ustidan qornilarini ushlagancha, egilib-bukilib, qotib-qotib kulishmoqda edi. Qizcha ulardan zo‘rg‘a qutulib, yig‘lagancha qochib ketarkan, tanasi oq bolalar hali ham uning ustidan hiringslashib, qilgan ishlaridan

huzurlanishardi. Agar men bu hodisani avtobus derazasidan ko'rib qolmasdan, tashqarida bo'lganimda edi, qizchani jon-jon deb qutqargan, uni o'sha oq bo'richalar galasidan tezroq tortib olgan bo'lardim. Ko'ryapsizmi, agar men Lulaga qat'iylik va talabchanlik bilan tarbiya bermaganimda edi, uning ham o'shanday oqlar orasida ko'zyosh to'kib azoblanishiga to'g'ri kelib qolardi. Bunday tarbiya Lulaga yashab o'tarlik hayoti mobaynida bir kuni, albatta, asqatib qolar, uning o'zi ham ayni men kutgan va istaganday mag'rur, aqli va dadil qiz bo'lib voyaga yetgandi.

Men yomon ona emas edim. Nimaiki qilgan bo'l-sam, barisi Lula uchun, bolamning baxtli bo'lishi uchun, ko'z nurim, qalb qo'rim bo'lmish aziz nuri-diydam uchun atalgan edi. Umid qilamanki, Par-vardigorning oldida yuzim hamisha yorug' bo'ladi. Rost, avvaliga o'z bolamdan o'zim hazar qildim, taqdirimdan nolidim, uning qop-qora tanasiga hatto qo'l teggizishga ham botinolmadim. Biroq men ona edim. Baribir uni yaxshi ko'rardim. Ha, ich-ichimdan, butun qalbimdag'i mehr bilan Lulan ni benihoya sevardim. O'ylaymanki, Lula ham meni bir kuni, albatta, tushunib yetadi. U hozir ham meni anglay oladi. Men shunday deb o'ylayman.

Vaqt o'tgan sari Lula Anna o'z-o'ziga mustaqil va tobora jasur qiz bo'lib kamol topayotgani oy-dinlashib bordi. U qora badanini yashirish uchun nihoyatda bejirim, juda chiroyli liboslar kiyardi. Hatto kezi kelganda menga ham aql o'rgatib turar, biroq bularning bari yoqimli va quvonchli edi. Dilimdag'i og'ir dard toshi yengillasha borgani sayin uning o'rnini kun kelib qizim meni yolg'iz

tashlab ketishi muqarrarligi haqidagi xavotir egallab, ko'nglimni ayovsiz qiyonoqqa solib qo'yardi. Kunlarning birida shu to'rt devor ichida bir o'zim yakka qolib, huvullab o'tirishim xavfi g'arib umrimga tashvishli tahdid solib turardi.

Lula Kaliforniyadan yaxshigina ish topib, o'sha yerda ishlay boshlagandi. Endi men uni judayam kam ko'radigan bo'lib qolgandim. O'zim esa ancha o'rgangan joyim – Uinston Xausni bir kunga ham tashlab ketolmasdim. Oltmish uch yoshga to'lganimda ixchamgina, sal arzonroq bo'lgan boshqa bir uyga ko'chib o'tdim. Ba'zan keksalik bezovtaliqi bo'l mish turli kasalliklar qo'zg'ab qolganda, ikkita hamshira goh-gohida kelib tekshirib turadigan bo'ldi. Endi darbadar hayot kechirish uchun qarib qolgandim, yoshligimning olovli damlari ko'zimning oq-u qorasi, yagona zurriyotim Lula Annaning tinch va dorulamon kelajagi uchun fido bo'lgandi. Yoshim o'tib borarkan, tanamda to'satdan suyak xastaligi paydo bo'ldi. Og'riq judayam kuchli kechardi, ammo baxtimga, hamshiralar juda mehribon va rahmdil edi. Bittasi hatto yaqin orada buvi bo'lishimni aytganimda mehr bilan ikki yonog'imdan o'pib, meni chin dildan tabrikлади. Ularning tabassumi va maqtovlari nihoyatda yorug' va yoqimli edi. Men hatto hamshira qizlardan Luladan kelgan xatlarni ham yashirib o'tirmasdim, qizimning har bitta gapidan ular ham xabardor bo'lishardi. Bir maktubida Lula menga behad baxtiyor ekanligini, tez kunlarda ona bo'lishini katta quvonch bilan yozib yuboribdi. Uning eri ham o'zi kabi qora tanli edi. Ammo o'sha xatida Lula yashash manzilini bildirib qo'ymagan ekan. Shun-

da men o'zimni nihoyatda yomon his qilib ketdim, nazarimda, men unga yaxshi ona bo'lomadim va aynan shu xat menga ulkan jazoday bo'lib ko'rinoqda edi. Ehtimol, Lula ichida mendan biroz og'rinardi ham. U menga vaqtı-vaqtı bilan pul yuborib turar, kundalik ehtiyojlarim uchun Lulaning jo'natganlarini ishlatib yashardim, ammo undan ortiq hech narsa so'ramas va umidvor ham bo'lmasdim. Menga kerak bo'lgan yagona narsa – bu uning baxti edi. Ehtimol, men bundan keyingi umrimda to'kin-sochin hayot kechirishim uchun ba'zi bir ota-onalar singari o'z bolamga zulukdek yopishib olsam ham bo'lardi, biroq menga buning nima keragi bor? Bolam, deya butun umri zahmatda kechgan ona uchun bu kabi mayda narsalarning nima ahamiyati bor?

Gohida xayolan o'tmishga qaytib, Lula tug'ilgan soniyalarini, qop-qoragina bir parcha etning dastlab ko'zimga qanchalar xunuk bo'lib ko'rинганини, juda yomon ijirg'anganligimni eslayman. Ammo endi ularning hammasini xotiramdan quvib chiqarishim kerak. Axir, o'sha yoqimsiz lahza-larning menga qilchalik ham ta'siri qolmagandi. O'shanda Lula Annaning otasi bizni qarovsiz, boquvchisiz holda tashlab ketganida, bu qora chaqaloq yelkamga nihoyatda og'ir yuk bo'lib tushgandi. Ha, o'shanda u benihoya og'ir yuk edi, lekin men uni ko'tara oldim, men o'sha og'ir yungi ko'tarib yashab kelishga qodir bo'ldim.

To'g'ri, boshida Lulaga u qadar mehr ko'rsatolmadim. Ayniqsa, uning o'smirlik davri, o'n ikki-o'n uch yasharligida yanada dag'al va talabchan onaga aylangandim. O'sha vaqtarda Lula

ham mendan bezor bo'lgan, men pishirgan ovqat-ni og'ziga olmas, sochlarini o'rib qo'yishimga ham astoydil qarshilik ko'rsatardi. Bundan ham og'ir kunlar u maktabda o'qiyotgan kezlarda bo'ldi. Men uning har bir qadamini nazorat qilar va asil-zodalar tazyiqidan hushyor bo'lishini tinmay uqtirib yashardim. Xudoyimga behisob shukrki, o'sha mehnatlarim zoye ketmadi, Lula o'ziga ishongan, mustaqil va barkamol inson bo'lib ulg'aydi.

Mana endi u homilador. Butun vujudi bilan intiqib, orziqib tilagan jonining bir parchasi – aziz farzandini kutyapti. Ilohim, eson-omon qutulib olgin, Lulaginam! Agar sen onalik nechog'liq shirin baxt ekanligini bilganingda edi, yuraging tars yorilgudek, bundan-da ming karra baxtiyor bo'lib ketarding! Ha, onalik nihoyatda ulkan baxt, Lula! Sen va sening jufting yaqin kunlarda dunyodagi eng xushbaxt insonlar bo'lasiz! Axir, o'zing bir tasavvur qilib ko'rgin-a: chaqaloq! Olamning eng yuksak ne'mati bu chaqaloqdir. Lula, sen meni bir fursat yaxshilab tingla, qizalog'im. Sen ona bo'lgan onlarda shu kurreyi zaminning qanchalar cheksiz va chegarasiz ekanligini, uning qay tarzda aylanib, yashab turishini, yer va samo qanday tilsimot ekanligini yanada chuqurroq anglab yetasan. O'shanda bundan-da baxtli bo'lasan, Lula!

Senga Xudo yor bo'lsin, nuridiydam! Bu duo shu yorug' olamdagi har bitta onaning eng o'tli iltijosidir.

Ilohim, Yaratganning o'zi har bir go'dakni o'z panohida asrasin!

Qandilat YUSUPOVA tarjimasi

NOMSIZ HIKOYA

Nozikta'b o'quvchi ushbu kitobni bir chetga otib yuborishidan oldin men bir gapni ta'kidlab aytmoqchi edim: mazkur hikoya har qanday gazeta hikoyalaridan mutlaqo farq qiladi. Siz bu yerda na dimog'dor va kekkaygan noshirga va na fermadan quvilgan hovliqma muxbirga duch kelasiz. Bu umuman siz kutmagan va o'ylamagan g'aroyib hikoya.

Lekin, muhtaram kitobxon, menga bir muddat „Tonggi yog'du“ ro'znomasida muxbirlar xonasi-dagi manzarani tasvirlab berishimga izn bergaysiz. Ammo siz xotirjam bo'ling, kamina yuqorida ta'kidlab keltirgan va'damda qattiq turaman.

Xullas, men mana shu „Tonggi yog'du“ ro'znomasida qo'shimcha haq ishlab olish uchun ikkinchi ish o'rnim sifatida ishlab yurgandim. Har kuni muxbirlar xonasining bir chetida uyum-uyum qog'oz, xatlar va qo'lyozmalarga ko'milgancha kunim o'tardi. Ishim faqat qog'oz titkilash edi. Yozish tirikchilik manbayim bo'lgani sababli qulog'imga tushgan gap bormi, mish-mish bormi, nima bo'lsa yozib ketaverar, o'sha yozganlarim orqasidan biroz choychaqa ishlab topardim. Tophys-tutishim faqat ana shu qog'oz-qalamgagina bog'liq edi.

Kunlarning birida Trip ismli bir tanishim ish-xonamga kirib keldi. U men o'tirgan stol qarshisidan joy oldi. Trip negadir doim qayg'uli qiyofada ko'rinar, yuz-qo'llari hamisha kir-chir bo'lib yurardi. U juda borsa endi yigirma beshga kirgan, lekin aftidan xuddi qirq yoshlarga borib qolgan katta kishilarga o'xshab ketardi. Yuzining teng yarim qismini jingalak mo'ylar bosib ketgan edi. Tripning ko'rinishi sog'lom odamlarga o'xshamas, har doim ezilgan va tushkun kayfiyatda, ko'rigan odamdan yarim dollar, bir dollar qarz so'rab yurardi. Uning bor orzusi faqatgina bir dollar pul edi. Buning ustiga, uning Milliy bankdan olgan kredit qarzi ham kundan kunga oshib borar va Trip ularni hech qachon to'lay olishga qurbi yetmasligini juda yaxshi bilar edi. Faromush holda stolim oldidagi kursida o'ta qashshoq va telbano alfovza o'tirarkan, uning qaltiroq qo'llarida tutib turgan bir shisha viskisiga ko'zim tushdi. Bu hayotda Trip bechorahol kimsa edi, xolos. U shu paytgacha hech qachon birovni aldamagan, aldashga urinib ham ko'rmagan, faqat uning eng yomon odati qulog'igacha qarzga botib yurishi edi.

O'sha kuni men gazetamiz muharririga va'da qilib qo'ygan yozajak yangi hikoyam uchun hisobchidan yaltiragan besh dollar pul olib qo'ygandim. Shunday ekan, zimmamdagи topshiriqni bajarish tashvishi bilan notinch o'tirar, tezroq keyingi songa biror-bir hikoya tayyorlab qo'yishim shart edi.

– Xo'sh, Trip, – dedim men unga tezda qarab olib, – nima gaplar? Trip ayni shu bugun har

qachongidan ham bechoraroq va xarobroq bo'lib ko'rinar, itoatgo'ylardek bosh egib, qarshimda xomush o'tirar edi. Men uni hali bunchalik tush-kun va ojiz qiyofada ko'rmagandim. Uning ayni damdagi o'tirishini ko'rgan odam yurak-bag'ri kuyib-kuyib ketganidan oxiri uni yonidan quvib solgan bolardi.

– Puling bormi? – deb so'radi Trip ko'zlarini mo'ltillatib. Uning mung to'la ko'zlari yalinchoq itnikidek yaltirab turar, ustara tegmay o'sib ketgan soqoli tutamlasa bo'lgudek holda to'zg'ib yotardi.

– Bor, – deb javob berdim men, birozdan keyin yana ta'kidlab qo'ydim: – pulim bor. – Bu gapimga ham qoniqmasdan yanada balandroq ohangda Tripga g'ashim kelib qo'shib qo'ydim: – sen o'y-lagandan ko'ra to'rt baravar ko'proq pulim bor. Ammo senga aytsam, o'sha pulimning boshida ancha ishim ham bor-da. Zudlik bilan bir joyga borib, bitta zarur xabarni yozib kelishim kerak. Judayam zarur bu.

Men ataylab har bir gapimga urg'u berib, go'yo juda muhim ishimni muhokama qilayotganday jiddiy so'zlardim. Maqsadim, bir daqiqa o'taro'tmas, xonamda o'tirgan mana bu gadoy biror dollar pul so'rab qolishining oldini olish edi.

– Qo'rqlma, qarz so'ragani kelganim yo'q, – dedi Trip xuddi ichimdag'i gapni o'qib turgandek. Yengil nafas oldim. – Senga ajoyib hikoya yaratса bo'ladi gan bir voqeani aytib bergani kelgandim, – deb qoldi Trip shu payt. – Bu voqeadan juda zo'r hikoya yoza olasan. Yo'q deganda, ikki sahifalik ijodiy material bo'ladi senga. Agarda men aytadigan

hikoyaning ustida yaxshilab ishlasang, topganing tillo bo'lib ketadi, og'ayni, menga ishonaver. Qilgan xarajatlaring esa bor-yo'g'i bir dollar va yana boshqa xizmatlar evaziga yana ikki dollarga tu shishi mumkin. Mening o'zimga esa ortiqcha hech narsa kerak emas.

Men endi ko'nglim ancha joyiga tushgan holda Tripning gaplariga loqaydlik bilan qulq solib o'tirardim. Trip aytayotgan bu taklifini avvaldan unga qilgan yaxshiliklarim uchun aytayotgan bo'lishi ham mumkin, negaki bu boyoqish araqxo'r olgan qarzlarini aslo qaytarib bermagan edi.

– Xo'sh, qanaqa hikoya ekan bu? – deb so'radim men xuddi bosh muharrirlardek qalamimni qo'linda chaqqon aylantirarkanman.

– Hozir senga aytib beraman, – dedi Trip. – Bu bir qiz haqida. Go'zallik haqida. Jannatdagi hurlardek sohibjamol bir gul haqida. Bamisol atirgul g'unchalari labiga tomib turgan tonggi shudring yanglig' pokiza bir sanam haqida. O'sha huri liqo yigirma yildan buyon olis bir orolchada yashab kelib, umrida Nyu-Yorkka qadami tegmagan ekan. Men uni to'satdan o'ttiz to'rtinchi ko'chada uchratib qoldim. U endigina Sharqiylaryodagi soldan tushib turgan ekan. Yana qaytarib aytaman, qiz haddan tashqari maftunkor edi. Bir mahal u meni ko'chada to'xtatib olib, qandaydir Jorj Braun degan kimsani qayerdan topishi mumkinligini so'rab qoldi. Buni qara, og'ayni, u mendan Nyu-Yorkday katta shaharda umrimda tanimagan va bilmagan odamimni qanday qilib topish mumkinligini so'radi-ya! Bunisiga nima deysan endi?

Xullas, shu bahona qiz bilan suhbatlashib qoldim. Qizning gaplaridan bildimki, u kelasi hafta Hiram Dod ismli yosh bir fermerga turmushga chiqayotgan ekan. Ammo o'zi tilga olgan o'sha Jorj Braun hamon qizning qalbidagi eng ardoqli joyni egallab turar, qiz sho'rlik bo'lsa uni sira-sira unutolmasdan qiynalayotgan ekan. Jorj esa bir vaqtlar qiz kelgan joyda yashagan, kasbi kosibchilik bo'lgan, biroq u yerdagi topish-tutishiga qoniqmasdan katta shahardan katta pul topish dardida Nyu-Yorkka ketib qolgan ekan. Lekin u shu ketgan ko'yi Grinburgda qaytib qorasini ham ko'rsatmagan. Endilikda bo'lsa yosh fermer Hiram qizga xaridor bo'lib turgan ekan. Biroq eng kerakli fursat, ya'ni Adadan rozilik so'rash payti kelganida, ha, aytgancha, qizning ismi Ada ekan, qiz bechora indamasdan uyidan qochib chiqqan-u otga minib to'g'ri temir yo'l stansiyasiga yetib kelgan. U soat oltidan qirq besh daqiqa o'tganda jo'naydigan po'yezdga ulgurib qolish uchun nihoyatda shoshilgan, zudlik bilan shaharga ketishni o'ylagan ekan. Jorjni qidiraman, deb shuncha beboshlik qilgani ni hali o'zi yaxshi tushunmaydi. Ayollarni o'zing bilasan-ku, bir qiziqqan ishlarini oxiriga yetkazmagunlaricha tinchimaydi. Endi Jorjni topaman deb boyoqish ancha sarson bo'ladigan ko'rinadi.

Qizning ahvolini ko'rib turib, uning bir o'zini qarovsiz tashlab ketolmadim, negaki u bu shaharda hali hech kimni tanimas, chora izlab qo'lidan keladigan bor-yo'q ishi esa ko'ringan odamdan „Siz Jorj Braun degan odamni ko'rmaganmisiz?“ deb so'rash edi. Odamlar ham unga turli xil javob qaytarar, biri: „Qanaqa edi uning ko'rinishi? Moviy

ko'zli, bo'yи unaqa baland emasmidi? Ha, ha, xudi o'shanday kishi 125-ko'chada, shundoqqina oziq-ovqat do'konining yonginasida ishlab yuradi. Otlarga egar-jabduq sotadigan qandaydir do'konda hisobchi bo'lib ishlasa kerak". Ko'ryapsanmi, qiz qanchalar sofdil va beg'ubor. Bilasanmi, qiz kelgan joy ayni qishloqning o'zi, bir juftgina o'dak fermasi bor, ammo suvga nihoyatda boy yerlar. U joyga har yili o'nlab sanoatchilar borib kelishadi. Lekin baribir g'irt qishloq joy. Ammo sen, o'sha qizni bir marta bo'lsa ham ko'rishing kerak! Axir, mening qo'limdan nimayam kelardi? Chontagimda bir mirim bo'lmasa... Qiz ham oxirgi pulini poyezd chiptasiga ishlatib yuborgan ekan, buning ustiga, bir to'plam qilib saqich ham sotib olibdi. Biri tugasa, ikkinchisini sumkasidan olib, tinmay saqich chaynab turibdi. O'ylay-o'ylay, oxiri uni oldin o'zim yashagan 32-ko'chadagi yetimxonaga olib borib, joylab keldim. Hozir o'sha darbadar qizga qayerdan bo'lsa ham bir dollar topib berish juda muhim. Bu yetimxona boshlig'i keksa Mak Jannis onaning bir kunlik ish haqi. Senga o'sha yetimxonani ko'rsatib qo'yaman.

– Boyadan beri nimalar deb valdirayapsan o'zi, Trip? – bordan jahlim chiqib Tripga o'shqirib berdim. – Birorta qiziqarli yo bir mantiqli narsani hikoya qilib berarmikansan, deb o'ylabman. Har kuni Sharqiy daryodagi o'nlab sollar uzoq orollardan kelgan sen aytgandek qizlardan nechtasini olib keladi. Ma'niliroq gaplardan aytsang-chi, xumpar!

Tripning nochor qiyofasidagi ma'yuslik ifodasi yanayam chuqurlashdi. U qollarini ilojsiz qolgan

odamdek shalviratib ko'tardi-da, har bir so'zini alohida ta'kidlashga urinib, hijjalab:

– Tushunmayapsanmi, – dedi, – shu voqea tu-fayli eng zo'r hikoya yozib olishing mumkin. Bu ish sening qo'lingdan keladi. Hozir senga gapirib bergen gaplarim – qizning boshidan o'tkazgan sarguzashtlar, qizning o'zi, uning go'zalligi, boqiy va sof muhabbat dostoni – bularning barini ro'yirost yorug' qilib tasvirlash faqat sening qo'lingdan keladi, og'ayni. Mana shu hikoya orqasidan kamida o'n besh dollar yoki bundan ham ortiq pul ishlab topasan. Ketgan xarajating esa atigi to'rt dollarga tushadi.

– Qanaqasiga atigi to'rt dollar pulimni ketka-zishim mumkin? – deb so'radim men Tripdan shubha qilib.

– Bir dollar puling yetimxona rahbari Mak Jannis xonim uchun ketadi, – deb javob berdi u darhol, – ikki dollari esa qizni yurtiga qaytarib yuborish uchun.

– Xo'sh, to'rtinchisi-chi? – dedim men tezda miyamda hisob-kitob qilib.

– Oxirgisi menga bo'ladi, – dedi Trip. – Viski olib ichaman o'sha pulingga. Nima deysan, rozimisan?

Men kinoyali kulimsirab qo'ydim-da, yana o'z ishimga qaytib, yoza boshladim. Biroq miskin, ayanchli va laganbardorlardek tobe odamning qorasi o'chishi qiyin ekan. Birdan Tripning peshanasi yaraqlab, ko'zlari cheksiz yalinchoqlik bilan yoshlanib ketdi:

– Bilasanmi, og'ayni, Adani bugunning o'zida o'z qishlog'iga jo'natib yuborish kerak. Erta ham emas, indin ham emas, shu kun tundayoq Ada

o‘z uyida bo‘lishi shart. Lekin bilasan-ku, mendek araqxo‘rning qo‘lidan hech ish kelmaydi. Na pulim bo‘lsa, na bitta-yarimta tanishim bo‘lsa. O‘zimcha sen shu sarguzasht voqeadan birorta hikoya qoralab, cho‘ntagingga biroz choychaqa ishlab olarsan, degan o‘yda kelgandim. Nima bo‘lgan taqdirdayam, birodarim, baxtiqaro va ojiza bir qizni tezda, bugun kechga qolmasdan iziga qaytarib yuborishimiz zarur, tushunyapsanmi?

Tripning zorlanib aytgan o‘tinchlardan yuragim og‘rib ketdi. Vijdonom uyg‘onib, odamiylik burchim to‘g‘risida eslatib qo‘ydi. Qiziq, nima sabaddan odamiylik burchi bunchalik zalvarli bo‘larkin? Yo‘q, men o‘sma bechoragina Ada ismli qiz uchun ketajak bir-ikki so‘m pulimga zig‘ircha afsuslanmayotgandim, biroq, qasam ichamanki, Trip uchun ketadigan pulim qulog‘ini ushlab ketishi aniq edi. U men beradigan pulni, albatta, tungi daydishlari hamda bema’ni mazaxo‘rakligi uchun sarflab yuboradi. Kallamda shu o‘ylar aylanarkan, sovuqqonlik bilan indamasdan palto bilan shlyapamni kiya boshladim.

Ko‘chaga chiqqanimizda, Trip o‘z-o‘zidan niyatda itoatkor holda oldinga o‘tib, mashina va odamlarning g‘ala-g‘ovurli shovqini ichida Mak Jannis onaning makoni tomon yo‘l boshlab ketdi. Tabiiyki, chiqqan mashinalarimizning haqini men to‘lab bordim.

Yetimxona eshigi qo‘ng‘irog‘ini Tripning o‘zi jiringlatdi. Lekin ostonada qaltirab, xuddi qochishga shay turgan quyondek qulog‘ini ding qilgancha qo‘ng‘iroqqa javob kutdi. Bu telba daydi ahvolini kuzatib turib, u qanday hayot kechirganini, har

kuni katta-katta yer xo'jayinlaridan dakki eshitaverib, qo'rqoq bo'lib qolganini fahmladim.

– Menga tezroq bir dollar uzat, tez bo'l! – dedi u tipirchilab.

Eshik qiya ochilib, Mak Jinnis xonimning sarg'ish yuzi bilan olaygan ko'zlari ko'rindi. U to-mog'ining tagidan isqirt pushti ro'molini mahkam o'rab olgandi. Trip bir so'z aytmasdan, bekaning bir kunlik xizmat haqi bo'lgan pulni chiqardi va o'sha bir dollar bizlarni ichkariga kirishimizga ruxsat olib berdi.

– U mehmonxonada, – dedi Mak Jinnis xonim ro'molini yanayam tang'ib bog'larkan.

Biz ayolning ko'rsatmasi bilan to'g'ri mehmonxonaga kirib bordik. U yerda, nimqorong'i xona ichida piqillagancha yig'lab, saqich chaynab o'tirgan qizni ko'rdik. Trip to'g'ri aytgan, mehmonimiz benihoya go'zal ekan. Hatto yig'i ham uning chiroyini oshirgan, ko'z yoshi qizning ko'zlarini yashnatib, yanada chaqnatib yuborgandi. Ha, bunday ajib go'zallik har qanday ijod kishisi uchun bemisl ilhom parisi bo'la olardi! Besh-o'n daqiqacha uning yuziga tikilib, qizning yoshini aniqlab olishga urindim va ichimda bu navnihol Ada Louri juda borsa endi o'n to'qqiz yoki yigirma yoshga kirgan bo'lsa kerak, deb o'yladim. Meni tanishtirayotgan paytda, avvaliga Ada Lou-ri xushlamaygina qarab o'tirdi, biroq asta-sekin g'aroyib bir hasharotga qiziqqanday chanqoq kuzatuvchanlik bilan boshdan oyog'imgacha bir-bir qarab chiqdi.

Trip stol yonida tik turar, bir qo'lining barmoqlarini yoggancha o'sha stol ustiga qo'yib olgan,

xuddi katta marosimlarda ishtirok etayotgan qandaydir rahbar yoki huquqshunos kabi qaddini tantanali holatda g'oz tutib turardi. Lekin uning nighohlari hech qanday amaldornikiga o'xshamasdi. Eskirib, uvadasi chiqib ketgan paltosi ham odamning shunaqangi rahmini keltirardiki, o'sha ondayoq unga himmat qilib, xayr-ehson qilgingiz kelib ketardi.

Meni, ayniqsa, Tripning xunuk bo'lib o'sib ketgan soch-soqoli ko'proq tashvishga solardi. Miss Adaday sohibjamol sanam qoshida o'zimni shunday ivirsiq, go'l va daydi tanishim tomonidan tanishtirilganim uchun izza tortib ketdim. Ammo shunday bo'lishiga qaramay, Trip bunday vaziyatlarda o'zini ancha dadil tutar ekan. U tezda holatni bayon qilib, asosiy mas'uliyatni mening bo'yninga yuklab qo'ydi. Muhimi, mening gazeta uchun yozadigan hikoyamga yaxshigina material topib bergani evaziga bir shisha viskiga ega bo'lib olardi.

– Bu yigit mening do'stim bo'ladi, – dedi u. (Men bu vaqt zirillagancha titrab turardim.) – Janob Challers, – deb gapida davom etdi Trip, – men, miss Louri, sizga bergen va'damning ustidan chiqaman. Mana, qarab turasiz hali. Bu og'aynim muxbir bo'lib ishlaydi, shunday ekan, menga qaraganda u tuzukroq ish bitiradi. Shuning uchun ham do'stimni bu yerga olib keldim. (Eh, Trip, buncha ham vaysaqi bo'lmasang!) – Uning aqli har baloga yetadi, – dedi Trip, – qilishimiz eng ma'qul bo'lgan ishni ham yolg'iz u biladi.

Tik oyoqda tursam ham, ayni shu vaziyatda xuddi omonat kursida o'tirganday hadeb bezovta bo'lardim.

– Demak, haligi... miss Louri, – dedim men Tripning almoysi-aljoyi valdirashlariga g'ashim ke-lib turarkanman, – kamina sizning xizmatingiz-daman. Ammo, hali boyagi... umuman olganda, bo'lib o'tgan voqealardan to'la xabardor emas-man. Men... haligi...

– O, qo'yavering bu savdolarni, – deya jilmaydi miss Ada bir daqqa, – bu voqealardan fojia ya-sashning hojati yo'q, albatta, oddiy bir ko'rgilik, xolos. Bilasizmi, bu mening Nyu-Yorkka bиринчи marta kelishim. To'g'ri, bir paytlar, judayam yosh paytim – taxminan olti yasharligimda bir marta kelganman. Ammo unisi yaxshi esimda qolmagan. Xullas, bu shaharning bunchalik katta ekanligini yetti uqlab, tushimda ham ko'rмаган edim. Bax-timga, ko'chada janob... janob Snipga duch ke-lib qoldim, undan bir tanishim haqida so'radim. Janob Snip esa meni shu yerga olib kelib, kutib turishimni tayinladi.

– Miss Louri, sizga maslahatim, – deb qoldi Trip shu payt, – janob Challersga nimaiki o'tgan bo'lsa, barini mufassal bayon qilib bering, hech narsani yashirib o'tirmang. U mening haqiqiy do'stim bo'ladi. (Men asta-sekin Tripning gapla-riga biroz ko'nika boshladim.) Men shunga to'la ishonamanki, eng to'g'ri yo'lni sizga janob Chal-lers ko'rsatib beradi.

– Voy, nega aytmas ekanman, albatta, aytaman, – dedi miss Ada bolalarcha soddalik bilan, – berkitadigan tayinli gapning o'zi ham yo'q bu yerda. Hammasi kelasi payshanba oqshomi – Hiram Dodga turmushga chiqishim belgilangan kundan boshlanib ketdi. Tan olishim kerak, Hiram Dod

unaqa yomon odam emas, o'ziga to'q, ikki yuz akrilik yeri bor, qishloqdagi eng sara ferma va mashinalarning egasi. Lekin baribir ko'nglim g'ash edi. Unashtiruvimizning ertasi kuni ertalab shartta otimni egarladim-u, stansiyaga qarab uchdim. Mening Danser ismli oppoq otim hozir stansiya atrofidagi bir daraxtga bog'loqlik holda turibdi. Uydagilarga hech narsadan shubhalanib yurmasliklari uchun ularga dugonam Syuzi Adamsnikiga ketayotganligimni aytib qo'ydim. Shubhasiz, oxir-oqibat, katta g'alva bo'lishi turgan gap edi, biroq men parvo qilmadim. Poyezdga chiqdim-u, bu yerga, Nyu-Yorkka yetib keldim. Baxtimga, ko'chada janob... janob Flipga duch kelib, undan bir tanishim to'g'risida so'radim. Ya'ni, haligi J... J... ni qayerdan topa olishimni so'radim.

– Menga qarang, miss Louri, ochig'ini gapiravering, – baland ovozda qizning gapini bo'lib qo'ydi Trip shu vaqtda, menga ham qizning ikkilanib so'zlashi shubha uyg'ota boshlagandi, – siz o'sha Hiram Dod degan yigitni yoqtirasiz, shundaymi? U yaxshi bola, sizga ham yaxshi gapiradi, shundaymi?

– Ha, albatta, men uni yoqtiraman, – dedi miss Louri biroz hayajonlanib, – u yaxshi odam. Qolaversa, menga ham binoyidek muomala qiladi. U hammaga ham shunday o'zi.

Miss Adaning beqaror gap-so'zlaridan shuni bildimki, bu oyimqiz uchun atrofidagi hech bir yigit, hech bir odamning yomoni yo'qdek edi. Uning oshiqlari qizning boshi ustiga soyabon tutib, bu go'zallik uchun jon talashib, ancha kuydi-pishdi qilishganini shundoq ham fahmlab olsa bo'lardi.

– Ammo-lekin, – deb gapida davom etdi miss Louri, – o'tgan tunda xayolimga yana J... Jorj kelaverdi va men...

Shu payt birdan qizning maftunkor chehrasi yerga qadaldi-da, yelkalari silkingancha yig'lay ketdi. Naqadar go'zal to'fon bo'lmasa bu hol! Miss Louri oxiri o'zini tutolmay, yig'lab yuborgandi. Ammo uning hattoki, yig'isi ham juda nazokatli edi. Men jon deb miss Lourini yupatgan bo'lar-dim, lekin na iloj, men Jorj emasdum. Baxtimga, Hiram ham emasdum, bunga ham shukr qildim. Yig'lay-yig'lay, oxiri ko'z yoshlar do'li nihoyat, tindi. Qiz o'zini iloji boricha qo'lga oldi-da, siniq jilmaydi. Bu qizdan tengi yo'q rafiqqa chiqqan bo'lar-di. Qiz ohista xo'rsinib qo'ydi-da, o'zining qadim va qadrli sevgi dostonini so'zlay boshladi:

– Bilaman, men g'irt telbaman, – dedi u chuqur xo'rsingan ko'yi, – biroq... biroq o'zimni tutib turolmadim. Axir Jorj Braun bilan men juda-juda yoshligimizdan, Jorj sakkiz va men besh yosha-da ekanligimizdan buyon bir-birimizni sevardik. Bundan to'rt yil oldin, men endigina o'n yettiga kirgandim. Jorj qishloqni tark etib, katta shaharga ketib qoldi. U mirshab yo bo'lmasa temir yo'l boshlig'i yoki birorta durustroq kasbkorni ko'zlab ketib qolgandi. Biroq u keyin tag'in mening oldimga qaytib kelishga va'da bergandi. Ammo men Jorjdan u ketganidan beri hech qanday xabar olmadim. Lekin... lekin men uni sevar edim...

Miss Louri yana o'zini tutolmasdan, yig'lay boshladi. Bu orada men Tripni xuddi muz orasi-ga tiqilib qolgan odamday besaranjom bo'lib, sarosimaga tushib qolganini kuzatib turdim. Men

unga endi-endi tushunayotgandim. Trip menga baxtiqaro qizning achchiq va alamli sevgi qissa-sidan ta'sirli bir hikoya yaratib berishga astoydil chiranayotgan edi.

– Xo'sh, nima deysiz endi, janob Challers, – deb qoldi Trip menga yuzlanib, – bu yosh xonimga qanday yo'l ko'rsatasiz? Men Miss Louriga eng to'g'ri qarorni siz chiqarib berishingizni aytgandim. Qanday fikr dasiz endi?

Sekin yo'taldim-da, Tripning gaplarini ma'qul-lab qo'ygandek bo'ldim. Shunda men o'z burchimni tushundim. Men ayyorlik bilan qo'lga tush-gan, biroq aslida mehr-oqibat yuzasidan bitta savob ish qilish imkonи tug'ilgan edi hayotimda. Tripning tutgan yo'li menga to'g'ri va adolatliday bo'lib tuyuldi. Mehmonimiz zudlik bilan shu kunning o'zidayoq o'z qishlog'i – Grinburgga jo'natib yuborilishi kerak edi. Eng avvalo, qizga yaxshilab tushuncha berish, uni ishontirish, ko'ndirish va nihoyat qo'lliga chipta berib, kechiktirmasdan ortiga yana qaytarib yuborish zarur edi. Ayni damda o'sha Hiram va Jorjni juda yomon ko'rib ket-dim, lekin men baribir o'z burchimni bajarishim shart edi.

Kelishilgan to'rt dollar bu yerda hech qanday ahamiyatga ega emas, ammo men qiladigan yax-shilikning tom ma'nodagi ahamiyati benihoya muhim bo'lgani uchun bir-ikki soat ichida hamma ishni hal qilib, poyezd yo'nalishigacha belgi-lab olishim kerak edi.

– Miss Louri, – dedim men imkon qadar ochiq gapirishga harakat qilib, – hayot nihoyatda g'alati bir o'yinxonaga o'xshaydi.

Ovozim o'zimga g'oyatda samimiy va sokin eshitilib ketdi va men miss Louriga ham xuddi shunday tuyulayotgan bo'lishi kerak, deb umid qildim.

– Biz, odatda, ilk bora sevib qolgan insonlarimizga kamdan kam hollardagina yetishamiz. Bizning birinchi muhabbatimiz go'zal yoshligimizning sehrli yog'dusi misol o'tmishda qolib ketadi. Ammo hayot baribir davom etaveradi.

Eng oxirgi aytgan so'zlarim xuddi havoda aks sado bergandek jaranglab ketdi.

– O'tmish esdaliklari faqat shirin xotira bo'lib qoladi, – deya davom etdim men keyin. – To'g'ri, ular har doim kelgusi umrimiz davomida ham biz bilan birga yashab kelishi ham mumkin, biroq ularni endi aslo amalga oshirib bo'lmaydi. Axir, hayot haqiqatdan iborat, unda xayolotga ortiqcha o'rinni bo'lmaydi. Na ilojsi, hayot shunday reallikdan iborat bag'ritosh hakamdir. Ko'nglingizga og'ir olmasangiz, sizdan bir gap so'rasam maylimi, miss Louri? Siz o'sha janob... haligi... ismi Dod bo'lgan janob bilan baxtli va farovon umr kechirishingizga ko'zingiz yetadimi? Gaplaringizdan u yomon odamga o'xshamayapti.

– Voy, albatta, u sira yomon odam emas, – deb javob berdi miss Louri. – Aytdim-ku, men u bilan yaxshi chiqishaman. U menga hattoki, mashina bilan motorli qayiqda sayohat qildirishni va'da qildi. Lekin, baribir, to'y kuni yaqinlashgani sari men haliyam uni – Jorjni o'ylab, sog'inishdan o'zimni tiyolmayapman. Jorjga aniq nimaadir bo'lgan bo'lsa kerak, aks holda menga hech bo'lmasa, bir dona bo'lsayam xat yozib jo'natgan

bo'lardi. Ketayotgan kuni Jorj qo'liga bolg'acha bilan iskanani oldi-da, bitta o'n sentlik tangani qoq ikkiga bo'lib, birini menga, ikkinchisini o'ziga olgandi. Biz o'shanda to bir-birimiz bilan qayta uchrashgunimizgacha o'sha tanga bo'laklarini hamisha yonimizda saqlab kelishga so'z bergandik. Mening o'sha tanga bo'lagim hozir uyimda qolgan, kiyim javonimdagi tortma ichidagi qutida turibdi. Jorjni shu yergacha qidirib kelganim endi o'zimga qip-qizil jinnilik bo'lib tuyulyapti. Bu shaharni bunchalik katta ekanligini sira aqlimga sig'dirolmagan edim.

Shu payt Trip odatdag'i beo'xshov, telbanamo tarzda kulib qo'ydi, u haliyam tomog'ini ho'llash najoti bo'lgan sadaqa puliday bir dollar ko'yida joni halak bo'lib turardi.

— Eh, bu shaharga kelgan yigitlarning bir talyi tezda kelgan joylarini esdan chiqarib, o'zlaricha shaharlik bo'lib olishadi, — dedi u. — Jorj ham shundaylardan bo'lsa kerak. U allaqachon boshqa qizga ko'ngil qo'yib, o'sha bilan sevishib yurgandir ham. Yo bo'lmasa, ko'cha-ko'yda tentirab, araqxo'r bo'lib ketgandir. Siz, miss Louri, indamasdan janob Challersga quloq tuting va zudlik bilan uyingizga qayting, ana o'shanda eng to'g'ri ishni qilgan bo'lasiz.

Ana endi harakatni boshlaydigan fursat bo'l-gandi. Soat millari asta-sekin vaqt peshindan og'ib borayotganini ko'rsatib turardi. Valdirashdan tinmayotgan Tripga xo'mrayib qarab qo'ydimda, miss Louriga imkon qadar muloyimlik bilan uyiga qaytishi zarurligini yotig'i bilan tushuntirdim. Qolaversa, bu majnuna qizga bir zamonlar

bedarak bo'lib ketgan omadsiz Jorj bilan kelgusi hayotda to'kin va farovon turmush qurish xayolini haqiqatdan ancha yiroqdagi xom tasavvur ekanligini ham uqtirib o'tdim.

Miss Louri otini stansiyadagi daraxtga bog'liq holda tashlab kelganini yana bir bora esladи. Trip bilan men unga stansiyaga yetib olgan zahoti otini topib, tez orada uyiga kirib borishini qayta-qayta tayinladik. Shunda biz uning uydagilarга qanday bahona to'qishi xususida tashvishlanib qoldik, qiz allaqachon dugonasi Syuzi bilan gapni „bir joyga qo'yib olgani“ni aytdi. Adaning shu gapidan keyingina ancha xotirjam bo'lib, ortiqcha to'polon chiqishidan qo'rqlay qo'yidik.

Shunday qilib, miss Lourini so'nggi sayohati – uyiga jo'natib yuborish uchun yo'lga chiqdik. Men hamon bu go'zal qizning husn-u latofatidan ko'z uzolmay, unga mahliyo bo'lib borardim. Ammo juda shoshilishimiz lozim, chunki borgan sari kech kirayotgan edi. Trip, men va miss Louri daryodan o'tkazadigan sol tomon shoshib bordik. O'sha yerda men Grinburgga ketadigan poyezd chiptasi bir dollar-u sakkiz sent ekanligini aniqlab oldim. Qolgan yigirma sent pulga miss Louri uchun bir dona qip-qizil, chiroyli atirgul sotib oldim. Miss Louri solga o'tirib, mamnun qiyofada biz bilan xayrlashar ekan, biz uning qo'lida silkitib ketayotgan ro'molchasining mayin hilpirashidan ko'z uzolmay, miss Lourining qorasi uzoqlashguncha ancha payt unga termilgancha sohilda turib qoldik. Nihoyat qiz ko'zdan g'oyib bo'lishi bilan men va Trip bir-birimizga yuzlandik. Men Tripning o'sha miskin va baxtiqaro yuziga ko'zim tushishi hamo-

noq xayoliy osmonlarimdan bir lahma ichida yana yerga qulab tushdim.

Hayotda baxt va baxtsizlik orasi bir qadam bo'larkan-da, Tripning kirlagan aftiga qaradim-u, miyig'imda kulib qo'ydim. Ayni chog'da u ko'zimga har galgidan ham ko'ra horg'in, yalinchoq va nihoyatda pastkash bo'lib ko'rinish ketdi. Cho'ntagimda qolgan eng oxirgi ikkita dollarimni paypasladim-da, Tripga nafrat bilan qiya qarash qildim. U qarshilik qilayotgandek alfozda kutib turardi.

– Xo'sh, birorta hikoya to'qiy oldingmi? – deb so'radi u xirillagan ovozda. – Hikoya bo'lganda-yam qanday degin, shaxsan o'zing ishtirok etgan hikoya!

– Bir qator ham to'qiyolganim yo'q, – dedim men sovuqqonlik bilan. – Hamma gap faqat puldamas. Muhimi, biz bir insonga yaxshilik qila oldik. Eng katta mukofot mana shu.

– Meni kechirasan, – dedi Trip arang ovoz chiqarib. – Sening pulingni sovurdik. Baribir ham bularning barini sen qoyilmaqom qilib yoza olasan.

– Kel, qo'y shu gapingjni, – dedim men qo'l siltab, – yaxshisi, uyga qayta qolaylik.

Shu paytda ko'nglimda boshqa bir fikr tug'ilib qoldi. Men Tripga beradigan pulimni ko'zim qiy-mayotganini sezdim. Bu tentak araqxo'r ter to'kib topgan pulimni bekordan bekorga isrof qilib yuboradi. Shundoq ham, avval olgan qarzlarini qaytarib bermagan.

Horigan ko'yi jim ketib borarkanmiz, Trip bo'shashgancha uvadasi chiqib ketgan palto-si tugmalarini yechib tashladi. Shu vaqt palto-si cho'ntagidan aftidan bir paytlar dastro'molga

o‘xshagan qandaydir latta ichiga o‘ralgan yaltiroq nimadir yerga tushib jaranglab ketdi. Hayron bo‘lib, yaltiroq narsani qo‘limga oldim. U iskana bilan yarmi kesib olingan o‘n sentlik tanga bo‘lagi edi.

– Nima! – to‘satdan bor haqiqat shuurimda yalt etdi-yu, qattiq baqirib yubordim. Hayratdan katta-katta ochilib ketgan ko‘zlarimni shumshayib turgan Tripga qadadim.

– Ha, shunday, – deya iqror bo‘ldi Trip g‘amgin holda. – O‘sha Jorj Braun deganlari hozir qarshingda turgan mana shu baxtiqaro Trip bo‘ladi. Endi bularning nima ahamiyati bor, og‘ayni?!

Boyagina sho‘ring qurg‘ur araqxo‘rga ravo ko‘r may turgan yagona ikki dollar pulimni o‘ylab ham o‘tirmasdan, uning dag‘al va kir qo‘llariga tutqa-zib qo‘ydim. Chunki endi men unga ich-ichimdan achinib ketgandim.

Qandilat YUSUPOVA tarjimasi

SAMOLYOTDAGI O'G'RILIK

Oxirlab qolgan yoz faslining iliq kuni. Pastak Tennesi tog'lari ortida bir parcha bulut suzib yuribdi. Bulutning iziga tushganday samolyot ham uchib borayotir. Bu – Nyu-York – Yangi Orlean yo'nalishi bo'ylab parvoz qilayotgan „727“ yo'lovchi samolyoti.

Uchuvchilar xonasiga kiriladigan torgina eshikdan do'lvor aloqachi pishillab kirib keldi. Birinchi uchuvchiga imo qilib, o'z joyiga o'tirdi va qulochinni taqdi. Uchuvchi unga diqqat bilan tikildi. Aloqachining xotirjam qiyofasiga nazar tashlab, hammasi joyida ekaniga ishonch hosil qildi va yana bir parcha bulutga tikildi. Pastda ko'zguday silliq dengiz yuzida quyosh nurlari mavjlanardi. Birinchi uchuvchi mikrofonni qo'liga oldi, ovozini pasaytirib musiqa qo'ydi, keyin esa radioset orqali salondagi yo'lovchilarga murojaat qildi:

– Xonimlar va janoblar, samolyot kapitani gapirayotir. O'ng tomonda, biroz oldinda Uots-Bi ko'li yastanib yotibdi. Ko'lning janubidagi to'g'oni sizlar ham tomosha qilsangiz bo'ladi.

U gapini tugatishga ulgurmadi – ro'parasidagi ogohlantiruvchi lampochka o'chib-yona boshladidi. Kapitan tumbler tugmasini bosdi:

– Eshitaman.

– Kapitan, Klarissa gapirayotir. Bu yerda... Bu yerda ko'ngilsiz voqea, kapitan.

– Nima bo'ldi?

– Qandaydir yo'lovchi Milli bilan hojatxonaga bekinib oldi. Yo'q, yo'q, bu shunchaki bezorilik emas, – shosha-pisha gapirdi styuardessa, go'yo noto'g'ri tushunishlaridan cho'chiganday. – Bu – o'g'rilik!

Uning ovozi qo'rquvdan titrardi.

Aloqachi uchuvchilarga savol nazari bilan tildi. Ikkinci uchuvchi o'rnidan qo'zg'almoqchi bo'ldi, biroq kapitan, joyingga o'tir, deganday imo qildi va mikrofonga yuzlandi:

– Klarissa, politsiya agenti hozir qayerda?

– Yonimda o'tiribdi.

– Yo'lovchilar xotirjammi?

– Xotirjam, hozircha hech kimning bundan xabari yo'q.

– Juda soz. Yo'lovchilarga hech narsa aytmangalar. Telefon go'shangini politsiya agentiga ber.

– Salom, kapitan! – darhol politsiyachining xirillagan ovozi yangradi. – Hammasi kutilmaganda ro'y berdi. Bu kimsa hojatxona tomon yo'l oldi, hech kimning e'tiborini tortgani yo'q. Tamburga kirganda styuardessa ham o'sha yerda ekan, o'zi bilan birga hojatxonaga majburan olib kiribdi. Men yopiq eshik orqasida turib gaplashdim. Millining ahvoli yomon emas. Aytishicha, anovi kim-saning to'pponchasi, pichog'i, qolaversa, qo'lida nitroglitserin to'la shisha ham bor emish. Milli, shishada quyuq sariq suyuqlik bor, deb aytdi... – Agent yo'taldi va ikkilanib so'radi: – Nima qilamiz, kapitan?

– Hech nima! – kapitan darhol keskin javob berdi. – Bu tasqara sho'rlik Millini eshikka tirab turgan ko'rinadi. Binobarin, qurol ishlatalishning iloji yo'q. Klaressa bilan birga borib, u bilan gaplashishga, niyati nima ekanini bilishga urinib ko'ring. Men esa Yangi Orlean bilan bog'lanaman.

Aloqachi Yangi Orleandagi aeroportning dispetcheri bilan bog'lana boshladi.

– Klaressa!

– Labbay, kapitan.

– Hojatxona eshigiga „Hojatxona ishlamayapti“ degan lavhani ilib, pardani ham tortib qo'y. Millining ahvoli yaxshimi?

– Bir daqiqa... To'xtab turing, u nimadir demaqchi. Salom, kapitan! Millining aytishicha, bu janob Jeksonvill tomon parvoz qilishimizni, o'sha yerda qo'shimcha yonilg'i olishimizni talab qila-yotir.

– Jeksonvilda nima bor? Yonilg'imiz busiz ham Meksikagacha yetadi!

– Gapingizni unga yetkazaman.

– Menga qara, yo'lovchilar ro'yxatini ko'zdan kechirmadingmi? Bu qaroqchi kim bo'ldi? Ism-sharifi nima?

– Xartfordlik Charlz Vagner. Illyuminator yondagi 16-o'rindiqda o'tirgandi.

– Ko'rinishi qanday?

– Ko'rinishimi?.. – deya Klarissa biroz tutilib qoldi. – Hamma qatori... O'ttiz yoshlar atrofida, sochlari uzun, turqi sovuq...

– Biror ichimlik ichdimi?

– Faqat pivo. Nazarimda, mast emas. Endi nima qilamiz?

– Yo'lovchilardan hech kimni hojatxona tomon-ga o'tkazma. Tushundingmi?

– Yangi Orlean! – ayni shu palla xitob qildi alo-qachi.

Dinamik tilga kirdi:

– Nima balo bo'ldi?

– Samolyotda o'g'ri bor. Styuardessa bilan hojatxonaga bekinib oldi. Qurollangan. Qo'lida nitroglitserin to'la shisha ham bor.

– Qaysi shaharga uchishni talab qilyapti?

– Qo'shimcha yonilg'i olish uchun Jekson-villga.

– Kapitan, aloqada qoling. Bu xabarni ma'muriyatga va xavfsizlik xizmatiga yetkazaman.

Kapitan sukut saqlagancha ro'paradan ko'z uzmas, uning qoramag'iz yapaloq yuzi qotib qolganday edi. Uchuvchilar xonasiga xavotirli suknat cho'kdi, faqat samolyot dvigatellarining guvullashi va radioapparaturalarning shig'irlashi eshitilardi. Dinamik yana tilga kirdi:

– Kapitan Littlon? Mikrofon oldida xavfsizlik xizmatining xodimi. Sizlarga yo'nalishni o'zgartirib, Jeksonvill tomon uchishga ruxsat beraman.

Ikkinci uchuvchi shu zahoti xatjiddan yangi xaritani chiqardi. Littlon unga imo qilib, shturvalni qo'lga oldi. Biroz o'ylagandan keyin mikrofonni yoqdi:

– Xonimlar va janoblar! Sizlar tog'lar va Tennessee ko'lini yana bir bor tomosha qilishingiz uchun ortga qaytamiz.

Samolyot janubi-sharqqa burila boshladi.

– Yaxshi qildingiz, – dinamikdan ma'qullovoz eshitildi. – Yo'lovchilar bilmagani ma'qul,

ortiqcha muammoning nima keragi bor... Endi Jeksonvilldagi xavfsizlik xizmati bilan bog'laning. Ularni ogohlantirib qo'yidik.

– Tushunarli, – lo'nda javob berdi kapitan va yelkasi osha xaritaga tikildi.

– Kapitan! – murojaat qildi Klarissa.

– Ha, eshityapman.

– U yo'lovchilarning hayoti va samolyot evaziga pul talab qilayotir. Pulni Jeksonvilda olishim kerak deyapti. Uning talabini qondirmasak, oldin Millini otib tashlarkan, keyin esa samolyotni portlatmoqchi.

– Qancha talab qilayotir?

– Chorak million...

Littlon mikrofonni qo'liga oldi:

– Yangi Orlean! Xavfsizlik xizmati. Meni yaxshi eshityapsizmi?

Notanish ovoz javob berdi:

– Bu Jeksonvill. Sizni eshityapman.

– O'g'ri chorak million dollar talab qilayotir.

– O'g'rining ism-sharifi bormi?

– Kartfordlik Charlz Vagner. Asli kim ekani noma'lum.

– Boshqa talablari ham bormikan?

– Biroz kutib tursangiz, bilib beraman.

Littlon ichki aloqa bilan bog'landi:

– Klarissa, bu yo'lto'sarning boshqa talabi yo'qmi?

– Hammomni orzu qilgan tuyaning naqd o'zi! Pullar har biri ellik dollarlik, yigirma besh ming dollardan dastalangan, yana jomadonda bo'lishini talab qilmoqda. Qolaversa, aeroport binosidan imkon boricha uzoqroqda, „727“ samolyoti uchun

yo'lakning eng oxirida to'xtashimizni talab qila-yotir.

– Klarissa, biroz sabr qilgin. Jeksonvill, siz hammasini eshitdingizmi?

– Hammasi tushunarli. Davom eting.

– Klarissa, gapiraver.

– O'g'ri „Samolyotga hech kim yaqin yo'lama-sin“, – dedi. Barcha shartlariga rozi bo'lsak, yo'-lovchilarning hammasini samolyotdan tushirib yuborarkan. Pul samolyotga olib chiqilgach va samolyot yana havoga ko'tarilgach, hojatxonadan chiqarmish. Pul solingan jomadonni samolyotga kirish yo'lagida qoldirishni so'rayapti. Bundan tashqari, ikkita parashut ham kerak, demoqda.

– Ikkita?

– Ha, ikkita. Bittasi sport parashuti, ikkinchisi harbiy parashut.

– Bir daqiqa...

Xavfsizlik xizmati xodimi kimgadir topshiriq berayotgani dinamikdan eshitilib turardi: „Darhol surishtiring – Charlz Vagner Xartfordda biror-bir sport klubiga a'zo emasmikan? Balki, unga ya-qinroq joydagi klubga a'zodir...“

– Yana nima?

Klarissa:

– Hozircha faqat shu...

– Yaxshi.

Birinchi uchuvchi mikrofonga yuzlandi:

– Shamol yo'nalishidan qat'i nazar „727“ yo'la-giga qo'nishga ruxsat berishingizni so'rayman.

– Ruxsat.

– Pullar-chi?

– Pullar bo'ladi. Parashyutlar ham.

Kapitan, nihoyat, diqqat bilan samolyotni boshqara boshladi. Sharqqa qarab parvoz qilishardi. Aloqachi parvoz yo'nalishi tizimini Jeksonvill radar stansiyasiga o'tkazdi. Dvigatellar bir maromda guvullar, pultlar va asboblarning chiroqlari shom qorong'isida yorqinroq porlar, ekipaj a'zolarining tashvishli chehralarida rang-barang jilvalar hosil qilardi. Nihoyat, Jeksonvill chiroqlari hamda sohil sharpasi ko'rindi. Samolyot pastlay boshladi. Littljon boshqaruvni ikkinchi uchuvchiga topshirdi, o'zi esa mikrofonni qo'liga oldi:

– Xonimlar va janoblar, ob-havo noqulay bo'lgani uchun Florida shtatidagi Jeksonvill shahriga uchishga majbur bo'ldik. Qo'nganimizdan keyin mahalliy aeroportning ma'muri sayohatingizni davom ettirish uchun zarur barcha axborotlarni ma'lum qiladi. Sizlarni Yangi Orleanga yetkaza olmaganimizdan juda afsusdamiz... Hozir esa chekishni bas qilib, kamarlarni taqib olishlariningizni so'rayman.

Keyin samolyot qo'ndi. Trap tomonidan yo'lovchilarning norozi ohangdagi gap-so'zlari anchagacha eshitilib turdi, nihoyat, salon tinchib qoldi. Samolyot baklariga yonilg'i quyilgach, qo'nish yo'lagining chetiga mikroavtobus kelib to'xtadi. Undan ikkita erkak tushdi. Ulardan biri ixcham jomadon va parashut ko'tarib olgandi. Ikkinchisining qo'lida ham parashut bo'lib, ancha katta edi. Ikkalasi ham trap zinalari bo'ylab ketma-ket ko'tarilib, qo'llaridagi narsalarni chiqish lyuki oldiga qo'ydi. Ularning birinchisi ichkariga mo'ralab, yo'lakning oxirida turgan baland bo'yli, oqishdan kelgan formadagi styuardessaga xayrixohlik bi-

lan qo'l silkidi. Klarissa alam bilan jilmaygancha bosh irg'adi. Ikkinchchi erkak ham boshini suqib qaradi, so'ng o'zaro shivirlangancha pastga tusha boshladilar. Mikroavtobus jo'nab ketgach, birinchi uchuvchi ichki aloqa tizimi bo'yicha styuardessaga murojaat qildi:

- Salom, Klarissa!
- Labbay, kapitan.

Anovi kallakesardan qayoqqa uchishimizni so'ra.

– Bir daqqa... – Klarissa bir necha soniya dama mini chiqarmadi. – Kapitan, Mayamiga uchishimizni talab qilyapti. Aytishicha, tezlik soatiga to'rt yuz kilometrdan oshmasin, balandlik esa, taxminan, olti ming kilometr atrofida bo'ssin ekan. Orqa eshik ochiq bo'lishini ham talab qilyapti...

Xavfsizlik xizmati xodimi shu zahoti radio orqali so'radi:

– Kapitan, sizning samolyotingizdan parashutda sakrasa bo'ladimi?

– Bo'ladi, shekilli, – javob berdi Littlon, dinamikka ko'z qirini tashlab, biroz o'ylab, qo'shib qo'ydi:

– Chamasi, shu maqsadda „727“ni tanlagan. Axir „Boing 707“ yoki „Boing 747“ rusumli samolyotlaridan sakrab bo'lmaydi. Aviatsiyadan xabardor ko'rindi... Nima bo'lganda ham, hammasini oldindan puxta rejalashtirgan.

– Ikki yuz ellik ming dollarni qo'lga kiritish uchun, albatta, rosmana jon koyitgan-da, – kinoya bilan javob berdi dinamik. – Bunday sarmoya uchun odam o'zini tomdan tashlashi ham hech gap emas. Darvoqe, kapitan, parashutchilar klublarini tekshirganimiz hech qanday naf bermadi.

– Ehtimollar ko‘p, axir, – yelka qisdi Littljon. – Masalan, parashutchilar harbiy qismida xizmat qilishi ham mumkin. Bu – birinchidan. Ikkinchidan, balki, bunday hunar bilan uyidan olisda shug‘ullanar? Nihoyat, ism-sharifini o‘zgartirgan bo‘lishi ham mumkin...

– Gapingiz to‘g‘ri, kapitan, hammasi ehtimoldan xoli emas. Ayting-chi, ochiq eshik bilan qanday parvoz qilmoqchisiz? Xatarli emasmi?

– Xatarli, albatta. Imkon boricha maqsadga muvofiq balandlikda va tezlikda uchishga harakat qilamiz. Baxtimizga, bu qaroqchi tepamizda turib olgani yo‘q-ku! – Littljonning ovozidan hayajonlanayotgani bilinib qoldi, chamasi, uning ham sabr-u toqati tugayotgandi.

– Bizdan yana nima talab qilinadi? – dedi u sabrsizlik bilan dinamikka yuzlanib.

Dinamikdan qandaydir shovqin eshitildi va notanish ovoz keldi:

– Salom, kapitan! Siz bilan xavfsizik xizmati mayori Uillobi gaplashayotir. Biror aniq taklifingiz bormi?

– Hm... – Littljon maslahat so‘ramoqchi bo‘lgandy ikkinchi uchuvchiga ko‘z qirini tashladi. U esa nigohini olib qochdi. – Biz ko‘l ustida uchishimiz mumkin... O‘g‘ri ko‘lga sakramaydi. Sizlar vaqtдан foydalaniib yengil samolyotlarni uchirasizlar va izimizga tushasizlar.

Harbiy aviatsiyada xizmat qilgan ikkinchi uchuvchi ming‘irladi:

– Lekin unutmanglar, agar u yo‘lini qilib bir yuz ellik kilometr tezlikda sakrasa, tun qorong‘isida ilg‘ay olmaysizlar!

– Qo'ldan chiqarmaslikka harakat qilamiz, havza bo'ylab parvoz qilsangiz bas. Bu yo'nalishdan boshqa samolyotlar parvoz qilmaydi. Suv havzasi uzra imkon boricha ko'proq uchinglar. Yengil samolyotlar sizlarga yetib oladi!..

– Hammasi tushunarli.

– Kapitan, – suhbatga aralashdi Klarissa. – O'g'ri asabiylashyapti!

– Unga ayt, hoziroq havoga ko'tarilamiz.

Dvigatellar zo'riqib guvullar ekan, samolyot ulkan qush kabi uchish yo'lagi bo'ylab pildiray ketdi. Yerdan ko'tarilib, tun osmoni bag'rida qora ko'lankaga aylandi. Samolyot sohilga yetay deb qolganda xavfsizlik xizmati xodimining ovozi yangradi:

– Tasqara Vagner joyidami?

– Qayoqqa ham borardi, kasofat, – zarda bilan dedi birinchi uchuvchi. – Nihoyat, hademay hojatxonadan chiqsa kerak. Lekin chiqishi bilan suv ustida uchayotganimizni ko'radi... – Uchuvchi boshi bilan imo qildi va boshqa gap aytmadı.

– Aloqani uzmang, hamisha bog'lanishda bo'ling!

– Kapitan!

– Nima gap, Klarissa?

– U chiqmoqchi bo'layotir.

– Gapimga qulqoq sol, qizaloq! – Littljon ataylab ovozini balandlatdi. – Sening mikrofoning shnuri yetarli darajada uzun, binobarin, birinchi qator-dagi o'rindiqqa ham joylashib olishing mumkin. Joylashib olgach, himoya kamarini taqib ol. Qaroqchining qo'lidan omon qutulgach, Milli ham shunday qilsin. Tushundingmi? Anovi surbet xoh-lagan joyida sakrab, jahannamning qa'riga tush-

maydimi! Lekin sizlarni Xudoning o'zi panohida asrasin! Gapimni eshitdingmi?

– Ha, kapitan, ha... Kamarni taqib oldim. Bir daqiqa!.. U chiqayotir!

– Milli-chi?

– U ham. Voy Xudoym, adoyi tamom bo'libdi, bechora Milli! Bu yoqqa kel... Mening yonimga o'tir. Kel, himoya kamarini taqib qo'yaman. Mana shunday, bo'ldi...

Sukunat cho'kdi, faqat qizlarning piqillab yig'-lagani eshitilardi.

– Kapitan, suv uzra uchayotganimizni payqab qoldi! Voy!.. To'pponchasini chiqarayotir... Voy Xudoym!.. Sohil tomon uchishni talab qilayotir, kapitan... U...

O'q ovozi yangradi, Klarissaning keyingi so'zlarini eshitib bo'lmasdi.

– Diqqat, kapitan! Mayor Uillobi gapiryapti. Buryaman: samolyotni sohil tomonga buring!

– Klarissa, nima bo'ldi?! – samolyotni sohil tomon asta burarkan, Littlon qichqirdi.

– Xudo asradi... – ovozi titragancha dedi styuardessa. – U ochiq eshik tomon o'q uzdi. U ayt-yaptiki...

– To'xta! Uni yoningga chaqir, nima dardi bo'lsa, mikrofonga o'zi gapisin.

– Hozir... – Klarissaning ovozi zo'rg'a eshitildi. – Kapitan, u siz bilan gaplashmoqchi emas. Avval Okala, keyin Tampa tomon uchishingizni talab qilayotir. Tampada bemalol yerga qo'nasizlar, men yo'l-yo'lakay sakrayman, deb va'da ber-yapti.

Yana mayor Uillobining ovozi yangradi:

– Kapitan, qaroqchining hamma talablarini bajaring. Soqchi samolyotlar havoga ko‘tarilgan, siz-larga yetib oladi. Butun Florida politsiyasi oyoqqa turgan, barchasi „Vagner“ degan kimsaning iziga tushadi, qochib ketolmaydi.

– Floridada pana-pastqam joylar ko‘p-ku... – ik-kilanib javob berdi Littlon. – Mayli, men nima ham derdim. – Biroz sukut saqlagach, qo‘sib qo‘ydi: – Mayor, iltimos, Tampaga oyog‘imiz tortmayapti. Mayamiga qo‘nishga ruxsat bersangiz. Agar iloji bo‘lsa, biror mehmonxonaga dam olish uchun xonalar buyurtma bersangiz. Bu qaroqchining dastidan hammamiz, ayniqsa, qizlar juda holdan toydi.

– Yaxshi, Mayamiga uchaveringlar. Mehmonxonaga buyurtma berishga ham harakat qilaman...

Oraga yana Klarissa suqildi:

– Kapitan, u bizning ham uchuvchilar kabina-siga kirishimizni talab qilayotir. Sakraganini hech kim ko‘rmasligi kerak emish...

– Na iloj, kira qolinglar...

Oradan hech qancha o‘tmay ikkala styuardessa ham kabinada turardi. Klarissa hech narsa bo‘limganday xotirjam ko‘rinar, jimjiloqday Milli esa hushidan ketadigan ahvolda edi. Uning dokaday oqarib ketgan yuziga tikilarkan, Littlon Klarissaga dedi:

– Unga tinchlantiradigan biror narsa bersang-chi!

– Hammasi o‘tib ketdi, kapitan, ortda qolgani rost bo‘lsin... – asta shivirladi Milli.

Littlon pastga qaradi, janub tun bag‘rida mudrar, zamin va samo zulmat bilan qoplangan-

di. „Soqchi samolyotlar bunday zulmat ichida ni-mani ham ilg‘ardi“, – degan fikr uning ko‘nglidan kechdi.

Nihoyat, pastda g‘arbiy Florida sohilining chiroqlari miltiray boshladi.

– Naplesdan o‘tdik, – dedi xaritaga qarab cha-malagancha aloqachi.

Littljon ikkinchi uchuvchiga o‘girildi:

– Maykl, salondan xabar ol. Lekin ehtiyot bo‘l!

– Xotirjam bo‘l, – dedi u o‘rnidan turarkan. U kerishib oldi-da, ikki qizning o‘rtasidan sirg‘alib o‘tib, yo‘lakka chiqdi.

– Hech kimsa yo‘q, – dedi u bir necha soni-yadan keyin qaytib kirkach.

– Rostdanmi?

– Qo‘ldan chiqardik! – dinamikdan mayor Uil-lobining alamli ovozi eshitildi. – Holbuki, soqchi samolyotlar siz bilan izma-iz uchayotgandi... Hechqisi yo‘q! Yerda uni quchoq ochib kutib oli-shadi. Mayli, kapitan, Mayamiga sog‘-salomat yetib olib, yaxshi dam olinglar.

– Rahmat, mayor! – Littljon bo‘g‘imlarini qirsil-latib kerishdi, keyin esa ekipaj a’zolariga yuzlandi: – Juda og‘ir kun bo‘ldi, do‘sstar. Endi yengil tin olsak ham bo‘ladi, Mayamida esa bemalol hordiq chiqaramiz. – U birinchi marta yayrab kului va mayor Uillobi bilan xayolan xayrlashdi.

Littljon xaritani chetga uloqtirib, o‘rindiqning tagidan ixcham jomadonni oldi.

– Xullas, hamkasblar, bu yerda har birimizga ellik ming dollardan sarmoya bor. Bir necha soatlik „zahmat“ uchun chakki moyana emas-a? Hech qanday soliq ham to‘lamaymiz!

U mammun jilmayarkan, hammani birma-bir ko'zdan kechirdi.

– Biroz kallani ishlatishning sharofati bu! Nima deysizlar, qizlar?

– Umuman, – dedi sal chaynalgancha Milli, – shaxsan menga biroz qo'shib berilsa, chakki bo'lmasdi. Axir, murda bilan naq besh soat hojatxonada tik turishning o'zi bo'lmaydi!

– Sengami? – pisanda qildi qulog'igacha qizarib Klarissa. – Iskovchi politsiyachini chuv tushirgan kaminaga shuning o'zi ham bo'laveradimi? Holbuki, la'nati politsiyachi butun salon bo'ylab...

– Shoshmanglar, qizlar, shoshmanglar, – uning gapini bo'ldi aloqachi. – Butun ishning tamal toshi shundaki, hammasini tashkil qilish, hatto jasadni ham topib kelish kerak edi. Yoki yo'qmi? Binobarin, qo'shimcha mukofot faqat menga berilishi kerak!..

Ikkinchchi uchuvchi tortishuvga aralashmay, dasta-dasta pullarni charm kurtkasining cho'ntaklariga joylashtirar ekan, bamaylixotir o'ylardi: „Manovilarning bir-birini cho'qiganini qarang. Murda bilan bir yo'la ikki parashutni ham suvga uloqtirish menga ham oson bo'lgani yo'q...“

Bu suhbatni boshdan oxirigacha eshitgan mayor Uillobining toshday qotib qolganini ularning hech biri hatto xayoliga ham keltirmasdi. Axir, Littlon bexosdan qaltis xato qilgani, tashqi radio-aloqa o'rniga ichki aloqa tizimini o'chirganidan ular tamomila bexabar edi.

Abduhamid PARDAYEV tarjimasi

MORELLA

*Yakka-yu yagona bo'lganining holda
o'zingga, faqat o'zingga o'xshagin.*

Aflatun

Men qadrdon Morellaga samimiy, chinakamiga ipsiz bog'lanib qolgandim. Biz ko'p yillar muqaddam tasodifan tanishgandik, uni birinchi marta ko'rganimdayoq yuragimni alanga chulg'ab oldi. Garchi bu ehtiros alangasi bo'lmasa ham, uning mavhum mohiyatini anglay olmasligim va xira yolqinini udda qilolmasligimga ishonch hosil qilguncha uzoq vaqt ikki o't orasida qoldim. Taqdir bizni bir-birimizga ro'para qilgandi, nihoyat, nikohdan o'tdik. Shunga qaramay ehtiros olovi yuragimni o'rtamas, binobarin, muhabbat haqidagi so'z ham bo'lishi mumkin emasdi. U esa hammadan o'zini olib qochar, butun borlig'ini menga baxshida etib, kaminani baxtiyor qildi. Zotan, mulohaza yuritib ham, shirin xayollar og'ushida ham baxtiyor bo'lish mumkin.

Morellaning o'qimagan kitobi yo'q edi. Qasam ichib aytamanki, u nihoyatda qobiliyatli bo'lib, tafakkuri ham teran va antiqa edi. Men uning noyob xislatini qadrlash barobarida undan ko'p narsalarni o'rgandim. Lekin ko'p o'tmay u (ehti-

mol, bu Presburgda tarbiya olganining oqibatidir) menga hamisha mistik, ya’ni g’ayrioddiy voqealarga bag‘ishlangan asarlarni tavsiya qilayotgанини payqab qoldim. Binobarin, bunday asarlar ibtidoiy nemis adabiyotining bema’ni uydirmalari hisoblanadi. Men sira ham tushuna olmaydigan sabablarga ko‘ra, u ayni shunday asarlarni qo‘ldan qo‘ymay sevib mutolaa qilardi. Keyinchalik kamina ham mazkur asarlarga ruju qo‘yganim esa Morellaga ergashganim tufayli odat tusini olgan edi.

Agar o‘zimni aldamayotgan bo‘lsam bunga tafakkurimning hech qanday daxli yo‘q edi. Men o‘qigan asarlardagi mistik voqealar – balki, qattiq yanglishayotgandirman – na ishonch-u e’tiqodingga, na xatti-harakatlarimga, na fikr-mulohazalarimga hech qanday ta’sir ko‘rsatgani yo‘q. Bu borada sobitqadam bo‘lganim holda inon-ixtiyorimni xotinimning qo‘liga topshirdim va birorta ham tukim qilt etmasdan unga xos izlanishlarning boshi berk ko‘chalariga sho‘ng‘idim. Deyarli taqiqlangan sahifalar uzra bosh egarkanman, ko‘nglim ichra taqiqlangan g‘alayonlar bosh ko‘tarayotganini his etardim. Morella esa muzday kaftini qo‘limga qo‘yar ekan, mavhum falsafaning kullari ostidan ohori ketgan antiqa so‘zlarni paypaslab topar, bu so‘zlarning sirli mazmuni xotiramga tamg‘aday muhrlanardi. Men uning yonida soatlab o‘tirgancha talaffuzidagi sehrli ohangga mahliyo bo‘ladim, oxir-oqibat uning musiqaday ovozi yuragimga vahima sola boshladi – ko‘nglimni qandaydir ko‘lanka qoplab oldi va zaminga deyarli begona bu nidolardan rangim o‘chib, vahimaga tushadi-

gan bo'lib qoldim. Shod-u xurramlik shu asnosida daf'atan dahshatga, go'zallik timsoli esa vahimali manzaraga aylandi.

Men qayd etgan risolalar asosida kechadigan suhbatlarimiz mazmunini bayon qilishimning hojati yo'q, lekin biz uzoq yillar mobaynida Morella bilan faqat shu mavzuda bahslashardik. Ta'bir joiz bolsa, ilohiyot axloqi deya nomlanadigan ilm bilan shug'ullangan odam borki, bizlar nimalar haqida suhbatlashganimizni tezda anglab oladi, biroq bu ilmdan yiroq kimsalar bizning suhbatimiz mohiyatini hech qachon tushuna olmaydi. Fixtening qizg'in nasihatbozligi, Pifagor izdoshlarining ikkinchi marta tug'ilishga oid ta'limotlarining biroz buzilgan shakli hamda eng asosiysi Shelling ta'riflagandek, ayniyat, aynan o'xshashlik ta'limoti – nihoyatda serhayajon, Morella ayni shu mavzularga alohida ixlos bilan qarardi. Shaxsiy ayniyatni, o'xshashlikni, yanglishmasam, janob Lokk: „Mulohazakor jonzotning oqilona tafakkur yuritishi“, – deya ta'riflaydi. „Shaxs“ deganda esa toki mulohaza yuritish qobiliyatiga ega ratsional ibtidoni anglar ekanmiz, qolaversa, ong hamisha mulohaza yuritgani bois ayni mana shu jihatlar fikrlaydigan boshqa jonzotlardan bizlarni ajratib turadi. O'limdan keyin yo'qolib ketadigan – balki, yo'qolmaydigan shaxs bilan bog'liq tasavvur hamisha meni astoydil qiziqtirardi. Nainki jozibador va ziddiyatli bo'lgani bois, balki Morella bular haqida hayajon bilan hikoya qilgani tufayli bu jumboq fikr-u zikrimni rom qilib olgandi.

Oxir-oqibat shunday vaqt keldiki, xotininming aql bovar qilmas sirli fe'l-atvori go'yo yovuz qa-

samyod singari meni g'azablantira boshladi. Uning ingichka rangpar barmoqlarini ushslash-dan ham, sokin musiqaday ovozidan ham, g'am-gin nigohlarining beozor yolqinlaridan ham jir-kanadigan bo'lib qoldim. Buni u ham sezardi, biroq ta'na qilmasdi. Nazarimda, mening ojizligimni, to'g'rirog'i, telbaligimni anglab yetgandi, buni qismat deb atay boshlagandi. Yana shunday tuyulardiki, meni asta-sekin begonalashtirgan mavhum sababni xotinin bilardi, lekin bu nima ekani haqida menga bir og'iz ham gapirmagan, hatto sha'ma ham qilmagan. Ammo nima bo'l-ganda ham u ayol edi va kun sayin so'nib borardi. Nihoyat, yonoqlarida bir just qizil dog' paydo bo'ldi, dokaday oppoq manglayidagi ikkita qil-day qon tomirlari esa ko'kimtir tus olib, ko'zga tashlanib qoldi. Bir soniya unga rahmim kelib mehrim tovlandi, lekin uning iztirob to'la ko'zla-riга nigohim tushgani zahoti yuragimni shunday sarosima va qo'rquv qurshab oldiki, tubsiz chohga ko'zi tushganda boshi aylanib ketgan odam shunday vahimaga tushadi.

Morellaning, nihoyat, jon taslim qilishini izti-roblи sabrsizlik bilan kutganimni qanday bayon qilsam ekan? Men tezroq undan xalos bo'lishni istardim, biroq uning joni holdan toygan tanasiga chippa yopishib olgandi. Bu azob kunlab, hafta-lab, oylab davom etishi oqibatida aql-u hushimni yo'qotib, jazavaga tushdim va xotinimning qisqa hayoti so'nib borgani sayin go'yo uzaygandan uzayib borayotgan – kun zavolga yuz tutganda soyalar shu asno uzayadilar – kunlar, soatlar, lahzalarни alam bilan la'natlay boshladim.

Lekin samoda shamollar ham tingan kuz kunarining birida Morella meni to'shagi yoniga chorladi. Butun zamin uzra rangpar tuman pardasi to'shalgan, havzalardagi suv yuzida quyosh nurlari jilvalananar, oltinday o'rmonlar uzra kamalak tovlanardi.

– Nihoyat, muborak sana keldi, – dedi u men yaqinlashganimda. – Bu yashash uchun ham, jon taslim qilish uchun ham muborak kun. Zamin va hayot o'g'lolnari uchun sharaflı kun... lekin samovot va ajal qizlari uchun yana ham hayrato-muz sana!

Men manglayidan o'pdim, u davom etdi:

– Men jon beryapman, lekin barhayot yashayman.

– Morella!

– Butun hayotimiz mobaynida meni sira ham sevganining yo'q, biroq hayotligimda mendan jirkangan bo'lsang ham, vafot etganimdan keyin xotiramga sig'inib yashaysan.

– Morella!

– Men nihoyat jon taslim qilyapman. Lekin bagrimda sen Morellaga ilingan bir paysa, atigi bir paysa mehringning samarasi barhayot. Men jon berishim arafasida sening va mening, ya'ni Morellaning farzandi dunyoga keladi. Biroq sening hayoting qayg'ular girdobida kechadi, sarv barcha daraxtlardan chidamli bo'lgani kabi o'zga barcha tuyg'ular orasida bu qayg'uga ham zavol begona. Zero, saodatli onlaring ortda qolib ketdi, shod-u xurramlik chechagi esa bir inson hayotida ikki marta gullamaydi, faqat Pestumgina yiliga ikki marta gullaydi. Anakreont singari ortiq vaqt bilan

o'ynashmaysan, lekin chambar va novdalardan uzilgan barg kabi aftodahol o'limni bo'yniga olib haj safariga otlangan mo'min kabi hamisha ka-fanga chulg'anib yurasan.

– Morella! – qichqirdim men. – Morella, bular-ning barchasini sen qayoqdan bilasan!

Lekin u yuzini o'girib oldi, oyoq-qo'li xiyol tit-radi. Shu tariqa jon berdi, uning ovozini ortiq eshitmadim.

Biroq u karomat qilgandek, hayotdan ko'z yuma turib dunyoga keltirgan qizalog'i, onasining nafasi to'xtashi bilan nafas ola boshlagan bolasi haqiqatan ham tirik qoldi. Qolaversa, qizim jismonan va ruhan juda g'alati tarzda ulg'aya boshladi. Shuningdek, u marhuma onasiga ikki tomchi suvdek o'xshardi va men zamin farzandlariga nisbatan bunday tuyg'uni his etib bo'lmaydi, degan azaliy fikrimga zid ravishda unga cheksiz mehr qo'ydim.

Lekin mazkur beg'ubor muhabbat osmonini ko'p o'tmasdan xavotir, dahshat va kulfat bulutlari qurshab oldi. Qizaloq jismonan va ruhan g'alati tarzda ulg'aya boshlaganini aytdim. U g'alati tarzda bo'y cho'zardi, lekin ruhan ulg'ayishini kuzatish asnosida ko'nglimni dahshatli, hatto o'ta dahshatli fikrlar chulg'ab oldi! Norasida qizaloqning so'zlarida balog'at yoshidagi ayolning tafakkuri va qobiliyatları aks etayotganini har kuni ko'raverganimdan keyin dahshatga tushmay nima ham qila olardim? Yoshgina qizaloq tajribali inson xulosalarini bayon qilardi-da. Boz ustiga uning yirik o'ychan ko'zlarida har soatda tamomila boshqa yoshdagi insonga xos donishmandlik va ehtirosning guvohi bo'lardim. Bularning bar-

chasi, yana takrorlayman, dahshatdan falajlanib qolgan kechinmalarim uchun kunday ravshan bo'lganda, bularning barchasini o'zimdan ham yashira olmaydigan, hatto inkor etish tashnaligi bilan ortiq kurashishga holim qolmaganda, daxmada mangu uyquda yotgan Morellaning g'ayri-oddiy taxayyuli va g'aroyib ta'llimotlariga fikran jonholatda murojaat qilganimga oid g'alati va vahimali gumonlar girdobida qolganimga ajablanishning hojati bormikan? Taqdir meni sig'inishga majbur qilgan nuridiydamni, jonimdan ham ortiq yaxshi ko'rgan farzandimni qiziquvchan nigohlaridan panada, deyarli xilvatda hech narsani aymasdan, qolaversa, biror-bir jihatni e'tibordan soqit qilmasdan tarbiyalar edim.

Yillar o'tib borar, men esa qizimning bami-soli rohibalarday, muloyim va jozibali chiroyiga, novdaday qaddi qomatiga uzzukun tikilardim. Uning qiyofasida qayg'uli va marhuma onasi bilan o'xhash jihatlarni kun sayin tobora ko'proq topardim. Bunday o'xhash jihatlar esa soat sayin ko'payib borar, tobora shubhasiz, tobora aniq bo'lib borar, ustiga ustak tobora mavhum va tamomila dahshatli tus olardi. Uning onasi kabi tabassum qilishiga chidardim, biroq xuddi onasidek kulishidan larzaga tushdim. Uning ko'zlar Morellaning ko'zlariga o'xhashiga chidagan bo'lardim, biroq u tobora hukmfarmolik va anglab bo'lmaydigan nigoh bilan ko'ksimni teshib yuborgudek tikilardiki, faqat Morella shunday sirli nigoh sohibasi edi. Uning keng manglayi ham, ipakday mayin sochlari ham, sochlarni taroqday taraydigan rangpar ozg'in barmoqlari ham, qayg'uli yoqimli

ovozi ham xotinimni beixtiyor yodimga solar, nihoyat eng muhimi (ha, ha, eng muhimi!) o'lgan xotinim aytgan so'zlar va iboralarni sevimli qizimning og'zidan takror-takror eshitarkanman, „Yo'q, yo'q, xotinim o'limgan“, degan dahshatli fikrdan vahimaga tushardim!

Oradan qancha vaqt o'tganiga qaramay, qizim hamon mahbusday tutqunlikda yashardi. Men ko'zimning oq-u qorasi bo'lgan qizimdan mehrimni ayamas edim, lekin u tashqi olamdan uzilib qolgani uchun boshqalar bilan suhbatlasha olmasdi. Morella vafot etgandan keyin uning ismini ham unutib yuborishga urindim. Onasi haqida qizimga ham hech qachon hech narsa demaganman – unga onasi haqida so'zlab bera olmasdim. Qisqagina hayoti davomida tutqunlikdagi qizim uchun tashqi olam begonaligicha qoldi. Nihoyat, cho'qintirish marosimi sarosimada qolgan idrokimni xalos qilish va qismat dahshatlaridan najot topishim uchun imkoniyat yaratdi. Cherkovning suv to'la jomi oldida turarkanman, qizimga qanday ism qo'ysam ekan, deya boshim qotdi. Yaqin-u olis o'lkalarda o'tmishda yashagan, qolaversa, ayni kunlarda umrguzaronlik qilayotgan ko'plab oqila va ajoyib ayollarning ismlari ko'nglimdan kechardi, haqiqatan ham qalban beg'ubor, baxtiyor va bag'ri keng go'zal ayollar ko'p-ku, deb o'ylardim. Biroq, ming afsuski, marhum va daxmada yotgan xotinim ruhini bezovta qilishga meni nima undadi? Esga olishning o'ziyoq odamning tepa sochini tikka qilib yuboradigan xotinning ismini qaysi bir yovuz iblisning qutqusi bilan tilga oldim? Nimqorong'i cherkov ichida va sassiz tun

og'ushida ruhoniya qarata uch bo'g'indan iborat Morella ismini aytishga qalbimning tubidagi qanday yovuz kuch majbur qildi? Va yovuz arvohdan ham qudratliroq allaqanday sinoat farzandimning qiyofasiga raxna soldi va hayot zavqini butkul o'chirdi. Ayni shu pallada men shivirlab aytgan ismni eshitgani zahoti shishaday sovuq ko'zlarni zamindan uzib samolarga qadagancha, oilaviy daxmamizning qora toshi uzra ojizona yotarkan, shunday dedi:

– Men shu yerdaman.

Bu oddiy so'zlar yuragimni daf'atan muzlatib yubordi, keyin esa eritilgan qo'rg'oshinday jizil-lagancha idrokimni kuydirdi. Yillar... yillar tarix qa'riga singib, iz qoldirmay g'oyib bo'lishi mumkin, biroq ayni lahza bilan bog'liq xotira – hech qachon ketmaydi! Shu-shu, chechaklar-u gullarni nainki unutib yubordim, balki, mevasiz sarv-u zaharli o't-o'lanlar qora ko'lankaday doimiy hamrohimga aylandi. Shu-shu, zamonni ham, makonni ham unutdim, peshanamga bitgan yulduzlar ham so'ndi. Zamin uzra zulmat cho'kdi, odamlar esa yonimdan xira soyalarday o'tib borishar, ular orasida faqat va faqat Morellani ko'rardim! Shamollar qulog'imga faqat bir so'zni shivirlar, dengiz to'lqlinlari ham faqat Morella ismini takrorlardi. Lekin uning ham umri qisqa ekan, vafot etdi. Uni daxmaga o'z qo'llarim bilan ko'tarib bordim, daxmaga ikkinchi Morellani qo'yganimda birinchisidan nom-nishon ham topa olmasdan, alam bilan, tel-balarday uzoq qah-qah urib kuldim.

Abduhamid PARDAYEV tarjimasi

HAYOTNING BESH TORTIG'I

Bir kuni erta tongda Pari o'z savatini ko'tarib yosh yigitning huzuriga tashrif buyuribdi.

– Bular mening sovg'alarim. Ulardan xohlagan bittasini tanlab ol, qolganini qaytarib olib keta-man. Ammo tanlovda juda ziyrak bo'l, ularning orasida faqat bирgina sovg'a juda qimmatlidir! – debdi Pari yigitga.

Sovg'alar quyidagilardan iborat edi: Shuhrat, Sevgi, Boylik, Rohat va Halollik.

Yosh yigitcha besabrlik bilan debdi:

– O'ylashga umuman hojat yo'q. Men, albatta, Rohatni tanlayman!

Shunday qilib, yigitga uch yil muhlat berilibdi. Ammo qisqagina shu hayot behuda va zerikarli o'tibdi. Oxir-oqibat yigit uch yilini xazon qilgach, „Vaqt ortga qaytsa, Parining boshqa tortig'ini tan-lagan bolardim“, – deb o'kinibdi.

Bir payt uning yonida Pari paydo bo'libdi va shunday debdi:

– Mening to'rtta sovg'am qoldi. Senga yana bir bor tanlash imkonи beriladi. Ularning ichidan eng a'losini tanla!

Yigit uzoq o'ylab, Sevgini tanlashga qaror qilibdi. Ammo Parining ko'zidan tomayotgan ko'z yoshlarni sezmabdi. Oradan belgilangan yil o'tib,

erkak qabr tepasida turardi, yonida esa hech kim yo'q edi.

„Hamma suygan ayollarim mendan voz kechdi. Mana, oxirgi sevgan insonim ham mendan oldin u dunyoga yo'l oldi. Sevgi deya minglab soatlarim anduhda o'tdi. Tanlovimdan afsusdaman!..“

Pari yana uning yonida paydo bo'libdi:

– Yana bir bor tanla. Unutma, ular ichida birgina qimmatlisi mavjud. Juda ehtiyyotkor bo'l!

Erkak o'ylay-o'ylay Shuhratni tanlabdi. Pari esa unga bir so'z demay ko'zdan g'oyib bo'libdi.

Yillar o'tib, Pari uning yoniga yana kelib, erkakning xayolidan o'tayotgan har bir fikrni o'qib olibdi.

„Mening nomim dunyoga tanildi. Ismim tillarda doston bo'ldi, bundan avvaliga mamnun edim. Keyin esa hasad, g'iybat, ig'vo, ko'rolmaslik kabi qora xayollar meni o'rab oldi. Yonimda ishonchli qadrdonim qolmadi, juda g'aribman. Tanlovda yana adashgan ekanman!..“

– Unda yana bir bor urinib ko'r. Atigi ikkita sovg'am qoldi.

– Boylik – bu kuch. Avval ko'r bo'lgan ekanman. Hayotda eng badavlati o'zim bo'laman. Hatto odamlarni ham sotib olaman. Dunyoning barcha lazzatlari oyog'im ostida bo'ladi, umr bo'yi rohatda yashayman. Umrimni noto'g'ri tanlovlarga bag'ishladim, bu gal adashmayman.

Oradan uch yil o'tgach, erkak eski-tuski ro'da-poga o'ralgancha bir chetda turardi. Uning ahvoli g'oyat achinarli, ko'zlaridan tinmay yosh oqardi.

– Men to'rt ajoyib sovg'ani tanladim. Ammo nega bari menga omadsizlik keltirdi? Naqadar

ahmoq ekanman! Pari nazarda tutgan sovg‘ani nega olmadim-a?! Hoy-u havasga, aldamchi va o‘tkinchi narsalarga uchdim.

Pari uning yoniga kelib, bergan to‘rt sovg‘a-sini qaytarib olibdi.

– Menga atalgan o‘sha oxirgi sovg‘ang qani?

– Afsuski, uni boshqa bir inson tanladi. Endi Halollik u bilan toabad birga, qaytarib ololmayman. Senga esa faqat uzoq keksalik hamroh bo‘ladi.

Nodirabegim IBROHIMOVA tarjiması

MUNDARIJA

Nashriyotdan	
Albert Mals. Dunyodagi eng baxtli odam	
<i>Qandilat Yusupova tarjimasi.....</i>	5
Ernest Xeminguey. Yomg'irda qolgan mushuk	
<i>Qandilat Yusupova tarjimasi.....</i>	16
Keyt Shopen. Sog'inib kutaman tunlarni	
<i>Qandilat Yusupova tarjimasi.....</i>	21
Keyt Shopen. Ozodlik	
<i>Qandilat Yusupova tarjimasi.....</i>	24
Ernest Xeminguey. Oddiy sinov	
<i>Qandilat Yusupova tarjimasi.....</i>	27
Shervud Anderson. Gung odam	
<i>Qandilat Yusupova tarjimasi.....</i>	33
Mark Tven. Kuchukcha va uch dollar	
<i>Qandilat Yusupova tarjimasi.....</i>	37
Ernest Xeminguey. Begona mamlakatda	
<i>Qandilat Yusupova tarjimasi.....</i>	42
Keyt Shopen. O'kinch	
<i>Qandilat Yusupova tarjimasi.....</i>	53
Shervud Anderson. Keksalik	
<i>Qandilat Yusupova tarjimasi.....</i>	62
Toni Morisson. Nuridiydam	
<i>Qandilat Yusupova tarjimasi.....</i>	68
Oliver Genri. Nomsiz hikoya	
<i>Qandilat Yusupova tarjimasi.....</i>	81

Robert Fish. Samolyotdagি o'g'ирлик	
<i>Abduhamid Pardayev tarjimasi.....</i>	100
Edgar Po. Morella	
<i>Abduhamid Pardayev tarjimasi.....</i>	114
Mark Tven. Hayotning besh tortig'i	
<i>Nodirabegim Ibrohimova tarjimasi.....</i>	123

Adabiy-badiiy nashr

SOG'INIB KUTAMAN TUNLARNI

Hikoyalari

„Ziyo nashr“ nashriyoti
Toshkent – 2022

Muharrir	<i>Charosxon Rahmonova</i>
Badiiy muharrir	<i>Bahodir Ibragimov</i>
Musahhih	<i>Chamangul Saydazzamova</i>
Sahifalovchi	<i>Lobar Narziqulova</i>

Nashriyot litsenziyasi AA № 0008, 27.03.2019
09.09.2022-yilda bosishga ruxsat etildi. Qog'oz bichimi
84x108¹/₃₂. Ofset qog'oz. „Bookman Old Style“ garniturasida
ofset usulida bosildi. Shartli bosma tabog'i 6,72.
Adadi 1000. Sharhnomalar № 29-22.
Buyurtma raqami

„Ziyo nashr“
Mas'uliyati cheklangan jamiyat
Toshkent shahri, Uchtepa tumani, 23-mavze, 42-uy.

„DIZAYN-PRINT“ va „Yangi asr avlodi“
bosmaxonalarida chop etildi.

„DIZAYN-PRINT“ MCHJ, Toshkent shahar, Chilonzor tumani,
Cho'ponota ko'chasi, 28-a uy.

„Yangi asr avlodi“ MCHJ Toshkent shahar, Chilonzor tumani,
Qatortol ko'chasi, 60-uy.

Sog'inib kutaman tunlarni

Hikoyalar toplami



ZIYO NASHR



[fb.com/ziyonashr](https://www.facebook.com/ziyonashr)



ziyonashr@mail.ru



ISBN 978-9943-8577-6-6

9 789943 857766